

Ya Mangêd ya Habi tungkol kan Apo Jesu-Cristo ya inhulat ni Lucas

Paunan habi

Ya Mangêd ya Habi tungkol kan Apo Jesu-Cristo ya inhulat ni Lucas kan Teofilo ay am-paypamwang ya hi Apo Jesu-Cristo ay yabay ya impangako, ya pinili ni Apo Namalyari hên mag-in Mámilitas hên Israelita, haka hiyan bêngat ya mamiligtas hên balang miha ya magpaligtas kana. Inhulat na êt ni Lucas ya hi Apo Jesu-Cristo ay dinyanan kapangyarihan hên Espiritu ni Apo Namalyari hên mamitoro hên Mangangêd ya Habi ha mangairap. Mapansin êt di ha inhulat ya hadyay kahiglaan lan anghel ha paypamwang ha pamanlumatêng ni Apo Jesu-Cristo.

Bayrin bêngat ha hulat ni Lucas ay mabáha ya tungkol ha anghel ya nipagkanta, haka ya tungkol ha pamaniraw lan pastol ha pangianak kan Apo Jesu-Cristo. Embayro êt bayrin bêngat ay mabáha ya tungkol ha nalyari hên hi Apo Jesu-Cristo ay gintan ha Templo hên hiyay anak pon, haka ya alimbawa ya tungkol ha Samaritano ya nakain-galo, haka ya makotaw ya miyawhay ya nanad nitama. Bayri ha hulat ay dinyanan hên alagá ya panalangin, haka ya Espiritu ni Apo Namalyari. Dinyanan êt alagá di ya pamanawop lan babayi kan Apo Jesu-Cristo, haka ya pamatawad ni Apo Namalyari ha kasalanan.

Hi Lucas êt ya nanulat hên hulat ya ambaêgên ya Dyag lan Apostol. Bayro nan impamwang ya pangapalyari kanlan tagahonol ni Apo Jesu-Cristo ubat yan nag-orong ha langit.

Kabooan hên pinakalaman

Umpisan hulat 1:1-4

Ya Pamipamwang hên tungkol ha pamianak kan Juan Bautista 1:5-2:52

Ya pamanoro ni Juan Bautista 3:1-20

Ya pamawtismo haka pamanukso kan Panginoon Jesus 3:21-4:13

Ya pamanoro ni Panginoon Jesus ha probinsyan Galilea 4:14-9:50

Ya pamanoro ni Panginoon Jesus ha kaatag ya legal paubat ha Galilea angga ha nilumatêng ya ha balayan Jerusalem 9:51-19:27

Ya tawlin parominggo hên biyay ni Panginoon Jesus ha luta 19:28-23:56

Ya pangabiyay oman ni Panginoon Jesus, ya pagpahlêk nan oman, haka ya pamag-orong na ha langit 24:1-53

Ya natupad tungkol kan Apo Jesu-Cristo

¹ Panggalangên kon Teofilo,

Mal-at ya nanulat hên tungkol ha natupad di kantamo ha banson Israel. ² Ya inhulat la ay hatoy impamwang kannaên lan habaytoy nakahêlêk hên natupad. Hilay nakahêlêk hên natupad, ay namipamwang hên habi ni Apo Jesu-Cristo paubat hên babayo yan nanoro. ³ Hên naubuh kinan pinag-aralan hên mangêd ya habayto, paubat hên una, ay naihipan ko etaman hên ipakangêd kon ihulat ya habayto para kamo, panggalangên kon

Teofilo. ⁴ Anhulatan kata ta êmên mo mapaptêgan ya impamwang kamo.

Ya pamipamwang hêng tungkol ha pamianak kan Juan Bautista

⁵ Ha panaon hêng hi Arin Herodes ay manungkul-an ha probinsyan Judea, nag mihay pari bayro, ya hi Zacarias. Hi Zacarias, ay miha kanlan pari ha pangkat ni Abias. Hiya haka ya ahawa na, hi Elisabet, ay parehon kaapo-apoan ni Aaron, ya kauna-unaan pari lan Israelita. ⁶ Hata miahawa ay mangêd ha arapan ni Apo Namalyari. Hinonol lay balang utoh haka patakaran na. ⁷ Noa, ayn hilan anak gawan layuh hi Elisabet, haka toa hilay na.

⁸ Amêhêng, mihay allo, hêng atag lan pangkat ni Zacarias hêng maghuyo ha arapan ni Apo Namalyari, ⁹ langan ni Zacarias ay nabonut hêng nanad ugali lan pari, ta êmên ya humwêng ha Templo, ya pagsimbaan kan Apo Namalyari, êmên mamaahuk hêng pabango ha pamagsimba kana. Kabay hinumwêng yay na hêng mimiha na ¹⁰ hêng mamaahuk hêng pabango, kaban atsi hila ha danin ilwangan ya kal-atan ya ampanalangin. ¹¹ Namakonkaynaman, ay nag anghel ni Apo Namalyari ha dapit panabtab hêng paybul-ihan* pay-paahukan nan pabango ni Zacarias. ¹² Nakatsigag ya hi Zacarias hêng nahêlêk nay anghel. Hadyay limo na.

¹³ Noa, hinabi kana hêng anghel, ya wana, “Paan kan malimo, Zacarias, ta nagilam ya panalangin mo. Hi Elisabet, ya ahawa mo, ay magkaanak

* **1:11** Hêlkêng ha panlêkan labay habiêng hêng habi.

ya kamo hēn mihay lalaki ya pata-ngalanan yon Juan. ¹⁴ Hadyay higla mo. Haka malat ya kaatag ya humigla ha pamianak kana, ¹⁵ gawan hiyay dayêwên ni Apo Namalyari. Hata ianak, ya hi Juan, ay dapat a ya minêm hēn alak, haka hinon makalahing. Ya Espiritu ni Apo Namalyari ay humapat kana hēn paubat ha hiyay ialêk. ¹⁶ Paorongêñ nay ihip hēn malat ya Israelita kan Apo Namalyari, ya Diyos la. ¹⁷ Hiyay muna kanan Panginoon ha parehon hêkaw haka kapangyarihan ya indin kan apo Elias, ya mámpamwang hēn impaihip kana† ni Apo Namalyari hēn hato. Paorongêñ nay pamanlugud ha balang mitataanak, haka na paorongêñ hilay anhumalanghang hēn mag-in nanad kanlan mahonol kan Apo Namalyari. Daygêñ nay habayota êmén mail-an ya ihip lan pinili na, ha pamanlumatêng hēn Panginoon.”

¹⁸ Amêhêñ, hinabi ni Zacarias kanan anghel, ya wana, “Ay-êmén kon mapaptêgan no matupad ya hatsi? Mantêg kinan toa haka mantêg toa ya ahawa ko.” ¹⁹ Hinabi nan anghel, ya wana, “Hikoy Gabriel ya panay pan-iutoh ni Apo Namalyari. In-utoh na ko êmén ipamwang kamo ya hata mangangêd ya habi. ²⁰ Noa, gawan a ka naniwala ha hinabi ko, ay a ka pon makahabi angga ha a pon matupad ya hata impamwang ko kamo ya taganán matupad.”

²¹ Hilay kal-atan ya atsi ha danin ilwangan, ya ampanalangin, ya ampangênggan kan Zacarias, ay nag-êpapah no awta hadyay buyot na ha lalê hēn

† **1:17** propeta.

Templo. ²² Hêñ inumawah ya, ay a yay na makahabi. Panay singyal tana ya ginamit na. Kabay namwangan la ya nakahélék yan kapapaépapah bayro ha lalén Templo. Taganán a yay na makahabi hi Zacarias.

²³ Hêñ nayari nay na ya pandaygén na ha Templo, ay nuli yay na. ²⁴ A nabuyot ay nangalék ya ahawa na, hi Elisabet. Mana ya tana ha bali la hêñ limay buwan. ²⁵ Amêhén, naghabi ya hi Elisabet, ya wana,

“Dinambi ko ni Apo Namalyari. Dinyag nay hatsi ta êmén maalíh ya dêng-éy ko ha kapareho ko.”

Ya pamipamwang hêñ tungkol ha pamianak kan Apo Jesus

²⁶ Amêhén, ha pang-anêm ya buwan hêñ buktot ni Elisabet, ay in-utoh ni Apo Namalyari hi Gabriel, ya habaytoy anghel, ha balayan Nazaret ha probinsyan Galilea ²⁷ ha mihay dalaga ya nag langan Maria, ya kabaan ni Jose, ya mihay kaapo-apoan ni Arin David. ²⁸ Hêñ nilumatêng ya kanlan Maria, ay hinabi nan anghel, ya wana, “Iningalwan ka ni Apo Namalyari kabay atsi ya kamo.”

²⁹ Nakatsigag hi Maria ha hinabi na haka nan an-ihip-ihipén no hinoy labay nan habiên hêñ hatsi. ³⁰ Noa, hinabi nan anghel kana, ya wana, “Paan kan malimo Maria, ta iningalwan ka ni Apo Namalyari. ³¹ Manggilam ka! Mangalék ka ta mamianak ka hêñ lalaki ya pata-ngalanan mon Jesus. ³² Hiyay itag-ay ni Apo Namalyari haka hiyay baégén Anak ni Apo Namalyari. Idin kana ni Apo Namalyari ya panungkulon ya nanad panungkulon ni Arin David, ya mihay ninuno na.

³³ Kabay hiyay manungkuluan kanlan Israelita hēn ayn angga. Ya pamanlokop na ay ayn angga.”

³⁴ Kabay hinabi ni Maria ha anghel, ya wana, “Ay-êmēn malyari ya hatsi, ha dalaga ko pon?”

³⁵ Amêhēn, wanana anghel ya êmēn di, “Ya Espiritu ni Apo Namalyari ay lumatêng kamo ta ya kapangyarihan na ay magdahêl kamo. Kabay ya ianak mo ay ayn hinon kasalanan haka baêgên yan Anak ni Apo Namalyari. ³⁶ Hêlkêñ mo hi Elisabet, ya kamag-anak mo. Muwang lan kaltatan ya layuh ya. Yan nangalêk ya, haka atsi yay na ha pang-anêm ya buwan hēn buktot na, agyan toa yay na. ³⁷ Hinoman ya labay nan daygêñ ni Apo Namalyari, ay madyag na.”

³⁸ Kabay hinabi ni Maria, ya wana, “Humonol ako kan Apo Namalyari. Malyari dayi kangko ya hinabi mo.” Haka nag-alíh yay nay anghel.

Naniraw hi Maria kan Elisabet

³⁹ A nabuyot, namarah-parah hi Maria ha bali lan Zacarias ha mihay balayan ha kabung-oyan hēn probinsyan Judea. ⁴⁰ Hêñ nilumatêng ya ha bali la, ay binaêg na hi Elisabet, bayo hinumwêñ yay na. ⁴¹ Hêñ nagilam ni Elisabet ya baêg ni Maria, ay nagkimit ya anak ha bitoka na haka hinumapat kana ya Espiritu ni Apo Namalyari.

⁴² In-ikhaw nay habi na, ya wana, “Iningalwan ka kanlan kaganawan babayi haka ya ianak mo, ay iningalwan etaman ni Apo Namalyari.

⁴³ Hino ko ta hiniraw ako hēn indo hēn Pangnoon ko? ⁴⁴ Nahêñ nagilam koy baêg mo, ay nagkimit ya anak ha bitoka ko, gawan kahiglaan

na. ⁴⁵ Iningalwan ka gawan naniwala ka ya matupad ya impahabi kamo ni Apo Namalyari.”

Ya dururoh ni Maria

- ⁴⁶ Amêhén, hinabi ni Maria, ya wana,
“Ampurién ko hi Apo Namalyari.
- ⁴⁷ Mahigla ko gawan hiyay Mámiligtas ko.
- ⁴⁸ Hiyay purién ko, gawan miha ko man ya mairap
ya ipoh na, ay dinambi na ko. Ubat amêhén
angga-angga, ay baégén la ko hén iningal-
wan,
- ⁴⁹ gawan ha kapapaêpapah ya dinyag na kangko ni
Apo Namalyari ya makapangyarihan haka
banal.
- ⁵⁰ An-ingalwan nay balang ampagpalokop kana,
paubat hén unan panaon hén angga-angga.
- ⁵¹ Impakit nay kapangyarihan na hén pinitatayak
na hilay mapaglalang.
- ⁵² Impaalih nay manungkulan ha tungkulan
la haka impatag-ay na hilay alwan
mapaglalang.
- ⁵³ Pinabhoj na hilay matsin lonoh hén man-
gangéd, haka impaalih na hilay mabandi
hén ayn hino.
- ⁵⁴ Hinawpan na kitamo ya Israelita ya nagpalokop
kana gawan hiyay maingaloén. Ha êmbayro
ay tinupad nay pangako na
- ⁵⁵ Kan apo Abraham, ya ninuno tamo, boy
kantamo haka kanlan kaganawan kaapo-
apoan ni apo Abraham ya hawpan na
kitamo hén angga-angga!”
- ⁵⁶ Naglaêh hi Maria kanlan Elisabet hén tatloy
buwan bayo nuli yay na.

Ya pamianak kan Juan Bautista

⁵⁷ Amêhén, hén nilumatêng ya oras hén panganan ni Elisabet ay in-anak nay mihay lalaki.

⁵⁸ Hén namwangan lan kabaryo na haka kamaganak na, ya impahlék kana ni Apo Namalyari ya ingangalo na, ay hinumigla hila etaman.

⁵⁹ Hén nilumatêng ya pangwalon allo ay naniraw hila kanlan Zacarias, ta tulien lay habaytoy anak. Pata-ngalanan la ya dayin Zacarias nanad hén toa na. ⁶⁰ Noa, hinabi ni Elisabet, ya wana, “Alwan Zacarias, ta Juan ya ipata-ngalan kana.”

⁶¹ Amêhén, hinabi la kana, “Ayn kanlan kamaganak mo ya nag langan Juan.” ⁶² Bayo siningyalan la hi Zacarias no hinoy labay nan ipata-ngalan ha anak na. ⁶³ Namakwa yan mapanulatan ta nanulat ya hén hatsi, “Ya langan na ay Juan.” Naubuh hilan nag-êpapah. ⁶⁴ Namakonkaynaman ay naka-paghabi yay nan oman, kabay pinuri na hi Apo Namalyari! ⁶⁵ Nalimwan ya kabaryo la, haka hata nalyari ay impamwang ha kaganawan baryo ha kabung-oyan hén probinsyan Judea. ⁶⁶ Habaytoy nalyari ay ampapakaihipên hén balang nakagilam ha nalyari, haka ampikokotang hila no hinoy mag-in kapalaran nan anak, ta malinaw kanla ya atsi kanan anak ya kapangyarihan ni Apo Namalyari.

Ya dururoh ni Zacarias

⁶⁷ Amêhén, hinumapat kan Zacarias ya Espiritu ni Apo Namalyari. Impapêt na ya êmén di, ya wana,

- 68 "Purién tamo hi Apo Namalyari, ya Diyos tamon Israelita. Iningalwan na kitamoy am-pagsimba kana ta inakbus na kitamo.
- 69 In-utoh na kantamo ya makhaw ya Mámiligtas, ya mihay kaapo-apoan ni Arin David, ya naghuyo êt kana.
- 70 Habaytoy impamwang na kanlan banal ya mámipamwang hên an-ipaihip na kanla hên unan panaon. Hinabi la
- 71 ya iligtas na kitamo kanlan kapatsi tamo, haka kanlan kaganawan anhumêmêk kantamo.
- 72 Ingälwan nay ninuno tamo ta tuparén nay banal ya kahundoan na kanla,
- 73 ya impangako na kan apo Abraham, ya ninuno tamo,
- 74 ya iligtas na kitamo kanlan kapatsi tamo ta êmên mapaghuyuan tamo ya hên ayn limo,
- 75 hên main kabanalan, haka hên main pamanhumonol kana angga ha anggaan biyay tamo ha luta."
- 76 Amêhêñ, hinabi ni Zacarias kanan anak na, ya wana,
"Hika, anak ko ay baégén la kan propeta ni Apo Namalyari gawan muna ka ha Panginoon tamo ta êmên mo mail-an ya danan na ha pamanlumatêng na.
- 77 Ipamwang mo ha pinili na, ya patawarén hila haka iligtas hila ha parusa ya lumatêng kanla gawan kasalanan la.
- 78 Hatsi ay gawan ingangalo haka pamanlugud ni Apo Namalyari,
- 79 ya mamahawang hên nanad allo kanlan atsi ha kariglêman, ya maranin matsi, haka hiyay

mamitoro kantamo hēn dann ya palakon kapatêkbēkan.”

⁸⁰ Amêhēn, hinumlay ya hata anak haka nagkaihip. Napaidi ya ha kabalah-balahan, hēn angga ha hiyay napabalay kanlan Israelita.

2

*Ya pamianak kan Apo Jesus
(Mateo 1:18-25)*

¹ Amêhēn, hēn habayton panaon, kaban hi Arin Herodes ay manungkulon ha probinsyan Judea, ya pinakapoon la ha Roma, ay hi Emperador Augusto. Namiutoh ya hi Emperador Augusto hēn mangwa hilan sidula, ya balang miha ya angkasakopan na, ta êmēn ya makakwan bayad hēn buwih la. ² Habaytsi ya unan utoh tungkol ha mangwan sidula ay nalyari hēn hi Cirenio ay gobernador ha probinsyan Siria. ³ Kaganawan ya atsi ha lokop hēn bansan Roma, anggan hilay Israelita, ay nammita ha balayan lan ninuno la, ta êmēn mangwan sidula.

⁴ Hi Jose, ya taga-balayan Nazaret, ha probinsyan Galilea, ay mihay kaapo-apoan ni Arin David ya in-anak ha balayan Betlehem ha probinsyan Judea. Kabay nammita hilan Jose hēn mangwan sidula ha Betlehem. ⁵ Lamo na ya hi Maria, ya kabaan na, ya nabuktot gawan ha kapangyarihan nan Espiritu ni Apo Namalyari. ⁶ Kaban atsi hila bayro ha Betlehem, ay ampiapaanak yay na. ⁷ Noa, gawan ayn dyanan ha bali lan tawo ay nagdahēl hila tana ha paydyanan ayop. Bayron in-anak ya punganay na ya lalaki. Inupungan na yan takop,

bayo na ya impakatuloy ha panganan hēn baka ya nag aray.

⁸ Habayton yabi, bayro êt ha danin Betlehem ay main nagdangho ya pastol ya ampipagbantay ha tupa la. ⁹ Namakonkaynaman ay nagpahlêk kanla ya mihay anghel ni Apo Namalyari, haka hinumawang kanla ya kapahilêw ya kahampatan ni Apo Namalyari. Kabay hadyay limo la. ¹⁰ Noa, wanana anghel, “Paan kaw malimo ta ampantan kataw hēn mangêd ya habi ya mamahigla hēn balang miha. ¹¹ In-anak amêhêن yabi ya Mesias, ya Cristo, ya impangakon Mámiligtas, ya Pangnoon. Bayri yan in-anak ha Betlehem, ya balayan ni Arin David. ¹² Êmén di yo yan mammwangan. Matsikap yoy mihay kapianak ya inupong haka nakakatuloy ha panganan hēn baka ya nag aray.”

¹³ Namakonkaynaman ay nagpahlêk kanla ha danin anghel ya mal-at ya kalupa na ya ubat ha langit ya ampagpuri kan Apo Namalyari hēn êmén di, ¹⁴ “Purién hi Apo Namalyari ya atsi ha langit. Haka magkamain dayin kapatêkbékan ya hilay atsi ha luta ya ampamahigla kana.”

¹⁵ Hēn nakabita hilay nay anghel paorong ha langit, nihahabi hilay pastol. “Mita kitamina ha Betlehem ta êmén tamo mahêlêk ya hata nal-yari ya impamwang ni Apo Namalyari kantamo.”

¹⁶ Kabay pinarah-parah lan nammita. Natsikap la hi Maria haka hi Jose. Habaytoy kapianak ay nakakatuloy ha panganan hēn baka ya nag aray.

¹⁷ Hēn nahêlêk lay kapianak, ay impamwang lay nay hinabi nan anghel ya tungkol kana. ¹⁸ Naubuh hēn nikaêpapah ya nakagilam hēn habaytoy habi

lan pastol. ¹⁹ Nitanêm ha ihip ni Maria ya hata habi la haka na pinag-ihip-ihipan. ²⁰ Kaban ampag-orong hilay pastol, ay ampuriên la hi Apo Namalyari bayro ha nagilam la haka nahêlêk la gawan napaptêgan lay hinabi nan anghel.

Pinata-ngalanan hi Apo Jesus

²¹ Hêñ waloy nay allo nan hata anak, hiya ay tinuli haka pinata-ngalanan Jesus, ya langan ya indin nan anghel hêñ a ya pon in-alêk.

Hi Apo Jesus ay gintan ha Templo

²² Amêhêñ, nilumatêng ya ikaapatapoy allo ni Maria hêñ ubat nanganak. Habaytsi ya allo hêñ pamaglinis* kanla, ay hinumwêñ hila ha Templo ha Jerusalem hêñ pamanhumonol ha Kautuhan ni apo Moises. Gintan la ya etaman hi Jesus ta iarap kan Apo Namalyari.[†] ²³ Dinyag lay habayto hêñ pamanhumonol ha nakahulat ha Kautuhan ni Apo Namalyari ya balang punganay ya lalaki ay idin kana, ta êmêñ hila maghuyo kana. ²⁴ Amêhêñ, namiátang hila gawan Kautuhan ni Apo Namalyari ya wanán hulat, “Loway kokolok o loway oymok hêñ pati-pati.”

²⁵ Amêhêñ, main mihay lalaki ha balayan Jerusalem ya nag langan Simeon. Hi Simeon ay mangêd ha arapan ni Apo Namalyari haka hinonol nay Kautuhan na. Pan-êngganan nay pamilitas kanlan Israelita haka atsi kana ya Espiritu ni Apo Namalyari. ²⁶ Impamwang

* ^{2:22} Ha Kautuhan lan Israelita ay nakahulat ya narêmêk ya balang indo hêñ 40 ya allo hêñ ubat nanganak. Ha ikaapatapoy allo ay mamiátang ya ha pagsimbaan la bayo malinis yay na êt. † ^{2:22} Exodus 13:2.

kana hên Espiritu ni Apo Namalyari, ya a ya matsi, angga ha a na mahêlêk ya Mesias, ya Cristo, ya impangakon Mámilitgas ya pinili ni Apo Namalyari hên mamaala. ²⁷ Amêhêñ, impalako ya ha Templo hên Espiritu ni Apo Namalyari. Kaban atsi ya bayro, inhowêñ lan Maria ya bingot ya hi Jesus ta honolên lay Kautuhan. ²⁸ Kingwa ni Simeon ya bingot hên inampon bayo pinuri na hi Apo Namalyari hên êmêñ di, ²⁹ “Apo Namalyari, tinupad moy pangako mo. Malyari kinan matsi hên napatêkbék, ³⁰ gawan nahêlêk kinay Mámilitgas ya impangako mo, ³¹ ya inlêan mo para ha kaganawan bansa. ³² Kaalimbawaan nay hawang ya mamahawang hên dann lan alwan Israelita hên palako kamo. Gawan hata anak, ay dayêwêñ hilay Israelita.”

³³ Nag-épapah hi Maria haka hi Jose ha hinabi ni Simeon ya tungkol ha bingot. ³⁴ Inhalangin na hila ni Simeon bayo na hinabi kan Maria ya indo ni Jesus, ya wana, “Hata anak ay mag-in ikaparusa o ikaligtas hên mal-at ya Israelita. Hiyay palatandaan ya ubat kan Apo Namalyari ya halanghangêñ lan kal-atan. ³⁵ Kabay mipamwang ya laman ihip hên kal-atan. Haka kamo, Maria, lumatêng ya kamo ya hadyay kalungkutan, ya nanad nilatog hên êtak ya nakêm mo.”

³⁶ Amêhêñ, atsi ya êt ha pagsimbaan ya mihay mâmipamwang hên an-ipaihip kana[‡] ni Apo Namalyari ya nag langan Ana, ya anak ni Fanuel, ya kaapo-apoan ni Aser. Hi Ana ay toay na. Pitoy taon hilan nilamo hên ahawa na ³⁷ bayo ya

[‡] **2:36** propeta.

nabawo. Amêhén walumpo boy apat ya taon nay na. Panay yan atsi ha Templo hén ampagsimba kan Apo Namalyari hén allo-yabi. Ha panalangin na ay a na angkadambi ya pangan na. ³⁸ Sakton habayto, ay napakarani ya kanla hén ampahalamatan na hi Apo Namalyari. Impamwang na êt ya tungkol kanan hata bingot kanlan balang ampangênggan hén pamibuhan kanlan Israelita.

Ya pag-orong la ha balayan Nazaret

³⁹ Amêhén, hén nahonol lay nay balang utoh hén tungkol ha mitaindo ha pamanhumonol ha Kautuhan ni Apo Namalyari, ay nag-orong hilan Maria ha balayan Nazaret, ya balayan la, ha probinsyan Galilea. ⁴⁰ Amêhén, hi Jesus ay hinumlay, nagkaihip, haka nag-in matalino gawan atsi kana ya ingalo ni Apo Namalyari.

Hi Jesus ay ampikno hén kalamo lan ampamitoro ha Templo

⁴¹ Balang taon main pista hilay Israelita ha Jerusalem, ta êmén la maihipan ya pamilitas ni Apo Namalyari kanlan ninuno la ha bansan Egipto. Nakaugalian lan Maria haka hi Jose hén makipista. ⁴² Hén nag labinloway taon hi Jesus, ay nakipista hilay na êt, haka gintan la hi Jesus. ⁴³ Hén nayari ya pista, ha pamag-orong la ay napaibalag ya ha Jerusalem hi Jesus ya anak la. Noa, a la muwang hén toa na. ⁴⁴ Endat la no kalamo la ya ha kal-atan ya namapayabi hén ampita hén ampag-orong ha bali la. Habaytoy yabi, ay tinapol la ya ha kamag-anak la haka kababay la. ⁴⁵ Amêhén, hén a la ya matapol ay

nag-orong hilay na êt ha Jerusalem ta tapolên la ya bayro. ⁴⁶ Hêñ ikatloy nan allo hêñ panapol la kana, ay natapol la ya ha Templo hêñ kalamo lan mánoro. Ampanggilam ya kanla, haka ya ampangotang kanla. ⁴⁷ Hilay nakagilam habi na ay nipag-épapah ha kagalingan ihip na haka ha kagalingan pamakibat na ha kotang la. ⁴⁸ Nag-épapah hilan Maria haka hi Jose hêñ nahêlêk la ya. “Anak ko,” wani Maria kana, “awta dinyag moy hatsi kannaén? Pinayagah mo kay hêñ nanapol kamo.” ⁴⁹ Amêhêñ, wani Jesus kanla, ya wana, “Pata antapolên yo ko, Indo? Awta a yo muwang ya kailangan hêñ atsi ko di ha balin Tatang ko?” ⁵⁰ Noa, a la naintindihan ya hinabi na kanla.

⁵¹ Amêhêñ, nakihonol yay na kanla hêñ nuli ha balayan Nazaret ta dinyag na ya kaganawan labay lan toa na. In-ubuh nan intanêm ni Maria ya nalyari ha ihip na. ⁵² Hi Jesus ay nagkaihip haka hinumlay. Hinumigla kana hi Apo Namalyari haka hilay tawo.

3

Ya panoro ni Juan Bautista (Mateo 3:1-12; Marcos 1:1-8; Juan 1:19-28)

¹ Hêñ nakalabah ya ungnoy taon, ay ikalabin-limay taon hêñ pamamaala nan pinakapoon ha bansan Roma, ya hi Emperador Tiberio. Ya gobernador ha Judea, ay hi Poncio Pilato. Ya gobernador ha Galilea, ay hi Herodes Antipas, haka ya kapotoh pohêl na, ya hi Felipe ay gobernador ha Iturea haka Traconite. Hi Lisanias etaman ay gobernador ha Abilinia. ² Ya pinakapoon pari lan

Israelita, ay hi Anas haka hi Caifas. Hêñ habayton panaon, ay ampaidi ya ha legal ya kabalahbalahan hi Juan, ya anak ni Zacarias, haka bayron nilumatêng kana ya utoh ni Apo Namalyari,
³ kabay nammita yay na hêñ nanoro ha mitatalipay hêñ Ilog Jordan. Impamwang na kanlan dinumani kana, ya dapat lan paghêhêan ya pamanayag lan kasalanan, bayo dapat pabawtismo hila, haka patawarên hila bayto ni Apo Namalyari.
⁴ Ha dinyag ni Juan, ay natupad ya hinabi ni Propeta Isaias ya mihay mampamwang hêñ anipaihip kana ni Apo Namalyari hêñ hato. Ya habaytoy hinabi na ay nakahulat, ya êmêñ di, “Main ampan-angaw ha legal ya kabalahbalahan, ya wana kanlan kal-atan ya naka-tsipon,

‘Il-an yoy nakêm yo ha pamanlumatêng hêñ Panginoon,

Ya nanad ha pamil-an hêñ dann ha pamanlumatêng hêñ mihay matag-ay ya manungkulan.

Itoynung yoy danan na.

⁵ Taphonan yoy kaganawan nalêhêk, haka patagêñ yoy kaganawan tawtgug haka bung-oy.

Itoynung yoy nabalingkêwêd ya dann, haka yo patagêñ ya nikakikilhung ya dann.

⁶ Ya balang miha ay makahêlêk hêñ pamilitas ya daygêñ ni Apo Namalyari.”*

⁷ Mal-at ya dinumani kan Juan ta êmêñ hila pabawtismo. Wana kanla, “Nanad kaw utan ya makamatsi. Hinoy nampamwang kamoyu hêñ

* **3:6** Isaias 40:3-5.

tumakah ha parusa ya lumatêng? ⁸ Daygên yo ya pamaptêg hêñ naghêhê kaw ha pamanyag yon kasalanan. Paan kaw mangihip hêñ mailigtas kaw ha parusa ni Apo Namalyari, gawan hi apo Abraham ay ninuno yo. Agyan hata bato, ay madyag ni Apo Namalyari hêñ kaapo-apoan ni apo Abraham. ⁹ Ya pamanatol ni Apo Namalyari ay nanad ha payakol ya naitag-ay hêñ mihay ampamotoh hêñ kayo. Balang kayo ya a ampanagêy hêñ mangangêd, ay potohêñ ta iulam ha apoy. Haka hikaw ay maialimbawa ha kayo ya a ampanagêy hêñ mangangêd.”

¹⁰ Amêhêñ, hinabi lan kal-atan, ya wanla, “No êmbayro, ay hino ya dapat naêñ daygên?” ¹¹ Hinabi ni Juan, ya wana, “No main kaw loway takop, ay idin yoy miha kanan ayn. Êmbayro êt ya daygên yo ha kaganawan maêkan.” ¹² Agyan hilay máningil buwih ay dinumani kan Juan ta êmêñ hila pabawtismo. Naghabi hila kan Juan, ya wanla, “Hino ya dapat naêñ daygên?” ¹³ Amêhêñ, hinabi na kanla, ya wana, “Paan kaw mangwa hêñ sobra ha an-ipahingil kamoyu hêñ gobyerno.” ¹⁴ Main hundaloh bayro, ya nangotang, “Ay-êmêñ kay, hinoy dapat naêñ daygên?” Hinabi ni Juan kanla, “Paan kaw mangwa hêñ alwan kamoyu ha pamilit o ha pamara hêñ alwan pêtêg. Dapat mahigla kaw ha suweldo yo.”

¹⁵ An-êngganan lan tawo ya marani yay nan lumatêng ya Mesias, ya Cristo, ya impangakon Mámiligtas ya pinili ni Apo Namalyari hêñ mamaala ya impangako. Kabay an-ihip-ihipêñ la no hi Juan ya habaytoy impangako, o no

alwa. ¹⁶ Kabay hinabi ni Juan kanla, “Ya Mesias, ya Cristo, ya Mámiligtas, ay makapangyarihan kangko. Agyan mangokal hén héêl pag-apin bitsih na, ay ayn akon karapatan, ta matag-ay ya tungkuluan na. Hikoy ampamawtismo kamoyu ha lanêm. Noa, hiyay mamawtismo kamoyu ha Espiritu ni Apo Namalyari haka ha apoy. ¹⁷ Hiyay mamipapawa hén mapanyag kangérân kanlan mapanyag karawakan hén nanad ha mihay ampamalohboh. Ta ya trigo ya binalohbohan ay ihimpan, noa, ya apa haka tatap ay ulamên ha apoy ya a angkапарé.”

¹⁸ Mal-at pon ya in-arat ni Juan kanlan kallatan, ha pamipamwang na kanla ya Mangangéed ya Habi. ¹⁹ Noa, hi Herodes Antipas, ya gobernador ha probinsyan Galilea, ay hinabyanan ni Juan hén mahakit, gawan bat nan pinag-ahawa hi Herodias, ta hi Herodias, ay ahawa ni Felipe, ya ali ni Herodes Antipas, haka gawan mal-at êt ya nangarawak ya pandaygén ni Herodes Antipas. ²⁰ Napahanan êt ya nangarawak ya dyag na hén impahukul na hi Juan.

*Ya pamawtismo kan Apo Jesus
(Mateo 3:13-17; Marcos 1:9-11)*

²¹ Hén a ya pon impahukul hi Juan, hén naubuh na hilan binawtismoan ya labay hén pabawtismo, ay nagpabawtismo hi Apo Jesus etaman. Kaban ampanalangin hi Apo Jesus, hén ubat nagpabawtismo, ay nagloat ya langit, ²² bayo inumaypa kana ya Espiritu ni Apo Namalyari hén nanad ha mihay pati-pati. Main habi ya ubat ha

langit, ya wana, “Hika ya panlugurên kon Anak ya ampamahigla kangko.”

*Ya ninuno ni Apo Jesus
(Mateo 1:1-17)*

²³ Mag tatlumpo ya taon hi Apo Jesus hêñ nagumpisa yan nanoro. Ya muwang lan tawo ay hiya ay anak ni Jose. Hi Jose ay anak ni Eli. ²⁴ Hi Eli ay anak ni Matat, hi Matat ay anak ni Levi, hi Levi ay anak ni Melqui, hi Melqui ay anak ni Janai, hi Janai ay anak ni Jose, ²⁵ Hi Jose ay anak ni Matatias, hi Matatias ay anak ni Amos, hi Amos ay anak ni Nahum, hi Nahum ay anak ni Esli, hi Esli ay anak ni Nagai, ²⁶ Hi Nagai ay anak ni Maat, hi Maat ay anak ni Matatias, hi Matatias ay anak ni Semei, hi Semei ay anak ni Josec, hi Josec ay anak ni Joda, ²⁷ Hi Joda ay anak ni Joanan, hi Joanan ay anak ni Resa, hi Resa ay anak ni Zorobabel, hi Zorobabel ay anak ni Salatiel, hi Salatiel ay anak ni Neri, ²⁸ Hi Neri ay anak ni Melqui, hi Melqui ay anak ni Adi, hi Adi ay anak ni Cosam, hi Cosam ay anak ni Elmadam, hi Elmadam ay anak ni Er, ²⁹ Hi Er ay anak ni Josue, hi Josue ay anak ni Eliezer, hi Eliezer ay anak ni Joram, hi Joram ay anak ni Matat, hi Matat ay anak ni Levi, ³⁰ Hi Levi ay anak ni Simeon, hi Simeon ay anak ni Juda, hi Juda ay anak ni Jose, hi Jose ay anak ni Jonan, hi Jonan ay anak ni Eliaquim, ³¹ Hi Eliaquim ay anak ni Melea, hi Melea ay anak ni Mennan, hi Mennan ay anak ni Matata, hi Matata ay anak ni Natan, hi Natan ay anak ni David, ³² Hi David ay anak ni Jesse, hi Jesse ay anak ni Obed, hi Obed ay anak ni Booz, hi Booz ay anak ni Salmon, hi Salmon ay anak ni Naason,

³³ Hi Naason ay anak ni Aminadab, hi Aminadab ay anak ni Admin, hi Admin ay anak ni Arni, hi Arni ay anak ni Esrom, hi Esrom ay anak ni Farez, hi Farez ay anak ni Juda, ³⁴ Hi Juda ay anak ni Jacob, hi Jacob ay anak ni Isaac, hi Isaac ay anak ni Abraham, hi Abraham ay anak ni Terah, hi Terah ay anak ni Nahor, ³⁵ Hi Nahor ay anak ni Serug, hi Serug ay anak ni Reu, hi Reu ay anak ni Peleg, hi Peleg ay anak ni Eber, hi Eber ay anak ni Sala, ³⁶ Hi Sala ay anak ni Cainan, hi Cainan ay anak ni Arfaxad, hi Arfaxad ay anak ni Shem, hi Shem ay anak ni Noe, hi Noe ay anak ni Lamec, ³⁷ Hi Lamec ay anak ni Matusalem, hi Matusalem ay anak ni Enoc, hi Enoc ay anak ni Jared, hi Jared ay anak ni Mahalaleel, hi Mahalaleel ay anak ni Kenen, ³⁸ Hi Kenen ay anak ni Enos, hi Enos ay anak ni Set, hi Set ay anak ni Adan, hi Adan ay anak ni Apo Namalyari.

4

*A ya napatukso hi Apo Jesus hên antuksoên ya ni
Satanas, ya diyablo*

(Mateo 4:1-11; Marcos 1:12-13)

¹ Hêñ ubat yan nagpabawtismo hi Apo Jesus ha Ilog Jordan, ay hiyay pinaihipan hên Espiritu ni Apo Namalyari, ya hinumapat kana, hêñ maglaêh ya pon ha legal ya kabalah-balahan. ² Atsi ya bayro hêñ apatapo ya allo, hêñ antuksoên ni Satanas. Habaytoy apatapo ya allo, ay a ya nangan. Kabay hêñ nalabah ya habayto, ay angkablay yay nan lonoh.

³ Hinabi ni Satanas kan Apo Jesus, ya wana, “No hika ya Anak ni Apo Namalyari, ay daygên mon

puto ya hata bato.” ⁴ Amêhêñ, hinabi ni Apo Jesus kana, ya wana, “Ha habi ni Apo Namalyari ay nakahulat ya êmên di, ‘Ya tawo ay ahê angkabiyay ha kaêñ bêngat.’ ”

⁵ Pangayarin habayto, ay gintan ya ni Satanas hi Apo Jesus ha bapan tag-ay ya legal, ta saguli nan impahlêk ni Satanas kana ya balang bansa ha boon luta. ⁶ Biha hinabi na kan Apo Jesus, ya wana, “Idin ko kamo ya tungkulon haka pibadian hêñ habaytoy bansa. Naidin kangko ya habayto kabay maidin ko ha hinon labay kon dyanan. ⁷ No simbaêñ mo ko, ay iubuh kinan idin kamo ya habayto.” ⁸ Noa, hinabi ni Apo Jesus, ya wana, “Hatsi ya nakahulat ha habi ni Apo Namalyari: ‘Simbaêñ moy Panginoon mo, hi Apo Namalyari, ta hiyan bêngat ya huyuêñ mo.’ ”

⁹ Pangayari, ay gintan ya ni Satanas hi Apo Jesus ha balayan Jerusalem ha têngêl hêñ Templo, haka na hinabi ni Satanas, ya wana, “No pêtêg hêñ hika ya Anak ni Apo Namalyari ay magnabo kan paubat di, ¹⁰ ta êmên di ya nakahulat ha habi ni Apo Namalyari, ‘Iutoh ni Apo Namalyari hilay anghel na hêñ mangillag kamo,’ ¹¹ haka ‘Halorêñ la ka êmên a mahakitan ya bitsih mo ha bato.’ ” ¹² Noa, hinabi ni Apo Jesus, ya wana, “Nakahulat êt ha Kahulatan ya impahulat ni Apo Namalyari, ‘Paan mon subukêñ ya Panginoon mo, hi Apo Namalyari.’ ” ¹³ Amêhêñ, hêñ nayari nay na ni Satanas ya balang pamanukso na, ay nag-alíh yay na pon.

Ya unan panoro ni Apo Jesus ha probinsyan

*Galilea**(Mateo 4:12-17; Marcos 1:14-15)*

¹⁴ Hi Apo Jesus ay nag-orong ha probinsyan Galilea ha kapangyarihan hēn Espiritu ni Apo Namalyari. Ya tungkol kana ay nibahwag ha mamalibot hēn habaytoy legal. ¹⁵ Nanoro ya ha balang sinagoga haka hiyay dinayēw hēn balang miha.

A ya pinaniwal-an hi Apo Jesus ha balayan Nazaret, ya pinanhumlayan na

(Mateo 13:53-58; Marcos 6:1-6)

¹⁶ Amêhēn, nag-orong ya hi Apo Jesus ha balayan Nazaret, ya pinanhumlayan na. Hinumwēn ya ha sinagoga la hēn nanad panay nan pandaygēn no allon pamagsimba. Bayo, nirēng yan namahan habi ni Apo Namalyari. ¹⁷ Ya naka-tsili-tsил ya papel ya pinanulatan hēn hinabi ni Propeta Isaias ya mihay māmipamwang hēn an-ipaihip kana ni Apo Namalyari, ay inggawang kana. Binuhal nay naka-tsili-tsил bayo na binaha ya nakahulat, ya wana,

¹⁸ “Atsi kangko ya Espiritu ni Apo Namalyari gawan hikoy pinili na hēn mamitoro hēn Mangangēd ya Habi na kanlan mangairap.

In-utoh na ko ta êmēn ko ipamwang kanlan nakahukul ya ibuhan hila, haka kanlan buwag ya makahēlēk hila, haka kanlan am-pairapan ya, a hilay nan pairapan,

¹⁹ haka êmēn ipamwang ya nilumatēng ya pamilig-tas ni Apo Namalyari.”*

* **4:19** Isaias 61:1-2.

²⁰ Amêhén, hên nai-tsili-tsil nay na êt ya hatoy hulat, ay in-orong na kanan ampanawop bayro ha sinagoga bayo ya nikno hên nanoro kanla. Namakahêlêk kana ya kaganawan ya atsi bayro ha sinagoga. ²¹ Bayo hinabi na kanla, ya wana, “Amêhén kaban ampanggilam kaw kangko ay natupad ya hatoy binaha ko ubat ha Kahulatan ya impahulat ni Apo Namalyari.”

²² Dinayêw ya hên balang miha ta nag-êpapah hila ha mangangêd ya habi na. Noa, ampihabibi hila ya wanla, “Daptay anak ni Jose ya kabalayan tamo ya habaytsi!”

²³ Kabay wani Apo Jesus kanla, “Siguradon ungkatêن yo kangko ya habaytsi ya kahabian, ‘Doktor, tambalan moy sarili mo. Ya nabalitaan naen ya kapapaêpapah ya dinyag mo ha balayan Capernaum, ay daygêن mo di etaman ha sarili mon logal.’” ²⁴ Bayo wanay na êt ni Apo Jesus, “Pakagilamêن yo, ya mihay propeta ni Apo Namalyari, ay a ampansinêن ha sarili nan balayan. ²⁵ Hêن panaon ni Propeta Elias, ay ayn maêkan gawan ayn uran hên tatloy taon haka anêm ya buwan. Hêن hato, ay mal-at ya babayi ya bawo di ha bansom Israel, ²⁶ noa, hi Propeta Elias ay a ya in-utoh ni Apo Namalyari hên manawop kanla. Hiyay in-utoh kanan mihay babayin bawo ha Sarepta ya sakop hên Sidon. ²⁷ Hêن panaon ni Propeta Eliseo, ay kal-atan ya nag hakit hêن ketong di ha bansom Israel, noa ya inalihan nan bêngat hakit, ay hi Naaman ya taga bansom Siria.”

²⁸ Hêن nagilam lay hinabi ni Apo Jesus, ay naubuh hilan nagtulaw ya atsi bayro ha sinagoga.

²⁹ Namakonkaynaman ay nirêng hila, ta impaplag la ya ha balayan, haka impalako la ya ha palaypay hên bêngaw ha bung-oy ya pinaypairêngan balayan la, ta itoron la ya dayi. ³⁰ Noa, nammita ya hêñ nagdann ha pibonakan la.

*Namipaplag hi Apo Jesus hêñ narawak ya a angkahêlêk ya hinumapat ha mihay lalaki
(Marcos 1:21-28)*

³¹ Ubat bayro, ay nilumohan ya hi Apo Jesus ha balayan Capernaum ha probinsyan Galilea. Ha allon pamagsimba, ay nanoro ya ha sinagoga la. ³² Naubuh hilan nag-êpapah ha panoro na gawan ya panoro na ay nanad panoro hêñ main tungkul-an. ³³ Main lalaki bayro ha sinagoga ya hinapatan hêñ narawak ya a angkahêlêk. Nan-angaw ya hatoy hinumapat kanan lalaki, ya wana, ³⁴ “Jesus ya taga-Nazaret, hinoy pakiêmênan mo kannaêñ? Labay mo kay hêñ parusaan? Muwang ko no hino ka. Hika ya banal, ya ayn hinon kasalanan, ya in-utoh ni Apo Namalyari.” ³⁵ Hêñ nagilam ni Apo Jesus ya hinabi nan hinumapat kanan hatoy lalaki, ay hinabyanan na ya, haka na ya impaplag, ya wana, “Paan kan maglabak! Mag-alîh ka ha hinapatan mo!” Intumba ya lalaki hêñ hinumapat kana ha pibonakan la. Bayo nag-alîh ya, hêñ a na ya pinakahakitan ya lalaki. ³⁶ Nag-êpapah hilay atsi bayro, ta nihahabi hila, ya wanla, “Hino kaya ya magkahabian hêñ hatsi? Nag tungkul-an haka kapangyarihan ya pamì-utoh nan paypaplag hêñ nangarawak ya hinumapat ha tawo, bayo ampag-alîh hila.” ³⁷ Habaytoy dinyag ni Apo Jesus ay nibahwag ha boon logal hêñ habayto.

*Namaalih hi Apo Jesus hēn hakit hēn kal-atan ha bali lan Simon
(Mateo 8:14-17; Marcos 1:29-34)*

³⁸ Amêhēn, nag-alíh yay na hi Apo Jesus bayro ha sinagoga ta nagpakha ya ha bali lan Simon. Hēn habayto ay main matag-ay ya omot ya ampo nay babayi ni Simon. Kabay pinikihabi la kan Apo Jesus ya hawpan na ya. ³⁹ Dinanian ni Apo Jesus ya bakêt. Impaalih nay omot na kabay tambêng yan nirêng ta namakan ya kanlan Apo Jesus.

⁴⁰ Amêhêن, hēn ampinaboy nay allo, ay gintan la kan Apo Jesus ya nipaghakit. Hino-hino kay na hēn ya hakit la. Impalunto nay gamêt na kanlan balang miha kanla ta namaalih yan hakit la. ⁴¹ Haka ya nangarawak ya a angkahêlêk ya hinumapat ha kal-atan ay ampag-alíh kanla. Ampan-angaw hilay habaytoy nangarawak ya espiritu, ya wanla, “Hika ya Anak ni Apo Namalyari.” Noa, binawal hila ni Apo Jesus hēn maghabi gawan muwang la, ya hiyay Mesias, ya Cristo, ya pinili ni Apo Namalyari hēn mag-in habaytoy Mámiligtas ya impangako na.

*Nanoro hi Apo Jesus kanlan Israelita
(Marcos 1:35-39)*

⁴² Hēn maranon, ay nammita ya hi Apo Jesus ha mihay legal ya marayo ha tawo ta êmén ya manalangin. Kabay tinapol la yan kal-atan. Hēn natapol la ya, ay pinikihabian la ya hēn a ya pon dayi mita. ⁴³ Noa, hinabi kanla ni Apo Jesus, ya wana, “Ya Mangêd ya Habi tungkol ha paman-lokop ni Apo Namalyari, ay kailangan kon itoro ha kaatag ya legal. Kabay in-utoh na ko di ha

luta.” ⁴⁴ Bayo inhundo nay panoro na ha mal-at ya sinagoga lan Israelita.

5

Ya pamanagyat ni Apo Jesus ha unan nag-in tagahonol na

(*Mateo 4:18-22; Marcos 1:16-20*)

¹ Minghan hên atsi ya hi Apo Jesus hên ampanoro ha laylay hên Dagat-dagatan hên Genesaret, ay pinilolopungan la ya hên kal-atan ya labay manggilam hên habi ni Apo Namalyari. ² Amêhêñ, nakahêlêk yan loway bangka ya narani ha laylay, ya ayn tawo gawan hilay magdadakêp kênan lanêm, ay atsi ha lanêm hên ampanguyah hên lambat la. ³ Hinumakay ya hi Apo Jesus ha bangka ni Simon, haka ya nakihabi kan Simon ya ipabita ya bangka hên pérâd ha laylay. Bayro yan nikno hên nanoro kanlan kal-atan.

⁴ Hêñ nayari yay nan nanoro ay hinabi na kan Simon, ya wana, “Ipalako yo ya hata bangka ha malalê bayo yo iaypa ya lambat ta êmêñ kaw makakwa.” ⁵ Kabay wani Simon kana, “Mánoro, mamapayabi kay hên nagpagal hên an-iaypa ya lambat, noa, ayn kay hêñ nakwa. Êmbayro man, gawan ha hinabi mo, ay iaypa koy lambat.” ⁶ Hêñ nadyag la ya habayto, ay pérâd tanan nagihi ya habaytoy lambat gawan kal-atan ya nakwa la. ⁷ Kabay siningyalan lay kalamo la ha mihay bangka, ta pahawop hila kanla. Dinumanî hila bayo la pinno ya loway bangka angga ha mamérâd hila tanan nilêmêñ. ⁸ Hêñ nakit ni Simon Pedro ya habayto ya nalyari, ay nandoko yan nakadêngdêng ha arapan ni Apo Jesus ta wana,

“Panginoon, pakarayo ka kangko ta makasaralan ako.” ⁹ Hinabi nay habayto gawan nag-êpapah ya haka hilay kalamo na gawan mal-at ya nakwa la. ¹⁰ Nag-êpapah etaman ya maának ni Zebedeo ya hi Santiago haka hi Juan, ya kala-kalamo ni Simon. Amêhén, hinabi ni Apo Jesus kan Simon, ya wana, “Paan kan malimo. Paubat amêhén, ay daygén katan mámpakarani hên tawo kangko, ta êmén hila maniwala.” ¹¹ Hêñ ginuloy lay nay bangka la ha laylay laném, ay in-ubuh lan imbalag ya habayto, ta nakhonol hila kan Apo Jesus.

Namaalíh hi Apo Jesus hêñ hakit ketong ha mihay lalaki

(*Mateo 8:1-4; Marcos 1:40-45*)

¹² Minghan hêñ atsi ya hi Apo Jesus ha mihay balayan, ay dinumani kana ya mihay lalaki ya nag hakit ketong. Nandoko ya ha arapan na, ta wanana nakiingalo, “Panginoon, no kalabayan mo, ay paalihêñ moy hakit ko, êmén luminis ya lawini ko.” ¹³ Impalunto ni Apo Jesus ya gamêt na ha nag hakit hêñ ketong, bayo wana, “Labay kon paalihêñ ya hakit mo. Luminis ka!” Tambéng naalíh ya hakit na. ¹⁴ Bayo in-utoh na ya ni Apo Jesus hêñ main pamamawal, ya wana, “Paan mo pon ipamwang ya hatsi ha hinoman. Pakha ka ha pari ta ipahlêk mo kana ya ayn kay nan ketong. Mantan kan maiparaya ha pamanhumonol mo ha utoh ni apo Moises,* êmén paptégan kanlan kaatag ya malinis kay na.” ¹⁵ Noa, lalon nibahwag ya

* **5:14** Levítico 14:2-33.

tungkol kan Apo Jesus, kabay kal-atan ay nangamat kana hēn manggilam panoro na. Haka im-paalíh la êt ya hakit la kana. ¹⁶ Noa, hi Apo Jesus ay panay hēn nagdayo ha kal-atan hēn nanalangin.

Ya mihay a ampakabita, ya in-arap kan Apo Jesus

(Mateo 9:1-8; Marcos 2:1-12)

¹⁷ Amêhēn, mihay allo, hēn ampanoro ya hi Apo Jesus, ay main bayron Pariseo haka mánoron Kautuhan ni apo Moises. Main kanla ya tagabalyan Jerusalem, haka main ubat ha balayan hēn probinsyan Galilea haka probinsyan Judea. Atsi kan Apo Jesus ya kapangyarihan ni Apo Namalyari hēn mamaalíh hēn hakit. ¹⁸ Main nilumatêng ya ungnoy lalaki ya ampantan hēn mi-hay lumpo ya atsi ha langkayan. Iarap la ya dayi kan Apo Jesus. ¹⁹ Noa, gawan ha kal-atan, ay ayn hilan madanan. Kabay nunik hila ha bubungan ta nilubtan lay atêp ha dapit ugto ni Apo Jesus. In-antotoh lay lumpo ha pibonakan lan kal-atan ha arapan ni Apo Jesus. ²⁰ Hēn nahêlêk ni Apo Jesus ya paniwala la kana, ay hinabi na kanan lumpo, “Pakhawēn moy nakêm mo, ta pinatawad ya kasalanan mo.”

²¹ Amêhēn, ampangihip hilay Pariseo haka mánoron Kautuhan ni apo Moises hēn êmên di, “Hinoy hatsi ya an-ipantag nay sarili na kan Apo Namalyari hēn ampamatawad hēn kasalanan? Yarin a nan ammusmusén hi Apo Namalyari ya tawo yan bêngat! Mimiha na ni Apo Namalyari ya makapatawad hēn kasalanan.”

22 Muwang ni Apo Jesus ya laman ihip la. Kabay wana kanla, “Pata ampangihip kaw hên êmbayro?

23 Hino awud ya maparah hên habiên kanan mi-hay a ampakabita, no wangko, ‘Napatawad kay na ha kasalanan mo,’ o no wangko, ‘Hali, mirêng ka ta mita kay na.’ **24** Noa, êmén yo mamwangan ya hiko, ya Taga-Langit, ya In-anak Tawo, ay main tungkulon di ha luta hên mamatawad kasalanan, ay habiên ko kanan lumpo, ‘Mirêng ka. Hapwatén moy langkayan mo ta muli kay na.’” **25** Tambêng yan nirêng ha arapan la ya habaytoy lumpo. Hinapwat nay langkayan na, ta nuli ya hên ampuriên na hi Apo Namalyari.

26 Naubuh hilan nag-êpapah ya atsi bayro. Pinuri la hi Apo Namalyari hên main lamoy êpapah, ya wanla, “Amêhêñ allo ay nakahêlêk kitamo hên kapapaêpapah.”

*Hi Levi ya ambaêgêñ êt Mateo, ya máningil buwih,
ay hinagyat ni Apo Jesus*

(Mateo 9:9-13; Marcos 2:13-17)

27 Pangayari hên habayto, ay nammita yay na hi Apo Jesus, haka nakahêlêk yan mihay máningil buwih ya nag langan Levi, ya ampikno ha paningilan na. Hinabi ni Apo Jesus kana, ya wana, “Kihonol ka kangko.” **28** Nirêng ya etaman hi Levi, haka in-ubuh nan imbalag ya obra na, ta nakihonol ya kan Apo Jesus.

29 Amêhêñ, pinayhanda ni Levi hilan Apo Jesus hên kal-atan maêkan. Kal-atan máningil buwih ya kapareho ni Levi, haka kaatag êt, ay kalamo la hên nangan. **30** Noa, hilay Pariseo haka hilay kalamo lay mánoron Kautuhan ni apo Moises ay

nagmulongan kanlan tagahonol ni Apo Jesus, ya wanla, “Pata ampakiaêm kaw hêñ kalamo lan máningil buwih haka kaatag êt ya makasalanan?” **31** Hêñ nagilam nay hinabi la, ay nangalimbawa hi Apo Jesus, ya wana, “Hilay main hakit, ay ampangailangan doktor, alwan hilay ayn hakit. **32** Èmbayro êt, atsi ko di ha luta ta êmên ko mahagyat hilay ampangamin makasalanan hila, hêñ maghêhê hêñ manalibokot ha pamanyag lan kasalanan. Noa, hilay ampaghabin ayn hilan kasalanan, ay a ko hawpan.”

Pinakibatan ni Apo Jesus ya kotang tungkol ha pagtêêh hêñ a mangan ta êmên a maabala ya panalangin

(Mateo 9:14-15; Marcos 2:18-20)

33 Main ungno bayro ya naghabi kan Apo Jesus, ya wanla, “Hilay tagahonol ni Juan haka hilay tagahonol lan Pariseo ay panay hêñ ampagtêêh hêñ a mangan ta êmên a maabala ya panalangin la. Pata alwan èmbayro ya andaygêñ lan tagahonol mo?” **34** Kabay in-alimbawa ni Apo Jesus ya sarili na ha lalaki ya an-ikasal, ya wana, “Èndat yon mabawal yon mangan ya bisita ha kasálan no kalamo laylalaki ya an-ikasal? A yo hila mabawal. **35** Lumaténg ya allo, ya idayo lay lalaki ya an-ikasal, ay bayro hilay nan a mangan.”

Ya toro ni Apo Jesus ay a mailamo ha toro lan ninuno lan Israelita

(Mateo 9:16-17; Marcos 2:21-22)

36 Amêhêñ, intoro ni Apo Jesus ya a mailamo ya toro na, ha toro lan ninuno la, ya wana, “Ayn mangguntsing hêñ bayoy baro ta itagpi ha gihi

hēn manan takop. No alimbawa ta daygēn nay habayto, ay mahira ya bayoy baro, haka habaytoy bayoy intagpi, ay a mpareho ha manan takop. ³⁷ Ayn mamitugtug hēn bayon alak, ha ubatan hēn manan alak, gawan lumtoh ya pamyanan, haka mibullog ya alak.† ³⁸ Ya bayoy alak, ay dapat itugtug ha bayoy pamyanan. ³⁹ Ayn labay minēm hēn bayoy alak no nakainēm yay na hēn mana ta habiēn na, ya naayang ya mana.”

6

Ya toro ni Apo Jesus tungkol ha allon pamagsimba

(Mateo 12:1-8; Marcos 2:23-28)

¹ Mihay allon pamagsimba, hēn nipadann hilan Apo Jesus ha nag trigo ya narani ha dann, ay nantē hilay tagahonol na hēn pērad. Niyēhē la ya hata trigo ta nilēēm la ha pammita la. ² Noa, nag Pariseo bayro ya naghabi kan Apo Jesus, ya wanla, “Pata nantē kaw ha allon pamagsimba, bawal man ya habayto ha Kautuhan tamo?” ³ Wana etaman ni Apo Jesus, “Kayno a yo pon nabaha ya dinyag ni Arin David hēn hiya haka hilay kalamo na ay angkablay hēn lonoh. ⁴ Hinumwēn ya ha bali ni Apo Namalyari, ta nangwa yan puto ya imparaēp kan Apo Namalyari ya pangkaēn lan bat hēn pari. Bawal man ha Kautuhan ni apo Moises hēn mangān hēn habayto, ay nangan ya, bayo nam-i ya êt kanlan kalamo na.” ⁵ Inhundo ni Apo Jesus ya pamaghabi na kanlan Pariseo, ya wana, “Hiko ya

† **5:37** Ya pamyanan la hēn alak ay dyag ha balat kambing, kabay minghan lan bēngat magamit gawan angkumita.

Taga-Langit, ya In-anak Tawo, ay nag tungkulan hên maghabi no hinoy malyarin daygên ha allon pamagsimba.”

*Ya lalaki ya natsi ya mihay gamêt
(Mateo 12:9-14; Marcos 3:1-6)*

⁶ Ha mihay na êt ya allon pamagsimba la, hên hinumwêñ ya ha sinagoga ta manoro, ay nag lalaki bayro ya natsi ya panabtab gamêt. ⁷ Hilay Pariseo haka mónoron Kautuhan ni apo Moises, ay ampangimaton kan Apo Jesus, no mamaalíh yan hakit ha allon pamagsimba, ta êmén la yan bad-an hên ampanyag yan bawal ha allon pamagsimba. ⁸ Agyan muwang na ya laman ihip la, ay wani Apo Jesus kanan lalaki ya natsi ya gamêt, “Mirêng ka di ha arapan lan kal-atan.” Dinyag nay kalabayan ni Apo Jesus. ⁹ Bayo kinotang ni Apo Jesus, hilay Pariseo haka mónoron Kautuhan ni apo Moises, ya wana, “Hinoy nakahulat ha Kautuhan ni apo Moises ya tungkol ha dapat daygên ha allon pamagsimba? Manyag hên kangêran o manyag karawakan? Mamiligtas o mamatsi?” Noa, ayn miha man ya naghabi. ¹⁰ Hinlêk na hilangan ni Apo Jesus. Bayo wana kanan lalaki ya natsi ya gamêt, “Ipaktang moy gamêt mo.” Hêñ impaktang na, ay naalíh ya hakit ha gamêt na. ¹¹ Noa, hadyay huluk lan Pariseo, kabay pinipupulungan lay na hi Apo Jesus.

*Namili hi Apo Jesus hên labinloway apostol na
ya in-utoh na hên manoro
(Mateo 10:1-4; Marcos 3:13-19)*

12 Hêñ habayto, ay nilumakat ya hi Apo Jesus ha mihay tawtgug, ta êm  n ya manalangin. Namawatah yan nanalangin kan Apo Namalyari. **13** H  n alloy na, ay bina  g na hilay tagahonol na h  n dumani kana, ta mamili ya h  n labinlowa kanla ya pinata-ngalanan nan apostol. **14** Hila ay hi Simon, ya pinata-ngalanan nan Pedro, haka hi Andres ya kapotoh poh  l ni Pedro. Pinili na   t hi Santiago, hi Juan, hi Felipe, hi Bartolome, **15** hi Mateo, hi Tomas, haka hi Santiago ya anak ni Alfeo. Pinili na   t hi Simon ya Makabayen. **16** Pinili na   t hi Judas ya anak ni Santiago haka hi Judas Iscariote ya nay-upit kan Apo Jesus.

*Nanoro ya hi Apo Jesus haka ya namaalih h  n hakit
(Mateo 4:23-25)*

17 Am  h  n, nilumohan hilan Apo Jesus ha napatal ya legal. Kalamo la bayro ya kal-atan kanlan antoroan na haka kal-atan ya ubat ha probinsyan Judea, balayan Jerusalem, haka ha dani h  n Tiro haka Sidon. **18** Habaytoy kal-atan ay labay manggilam toro na, haka magpaalih h  n hakit la. Impaalih na etaman hilay narawak ya a angkah  l  k, ya ampamairap kanlan kaatag. **19** Gap-an la ya dayi h  n kal-atan hi Apo Jesus, gawan atsi kana ya kapangyarihan ni Apo Namalyari h  n mamaalih h  n kaganawan hakit la.

*Hilay mapat  kb  k ya ihip
(Mateo 5:1-12)*

20 Hinl  k ni Apo Jesus ya tagahonol na, bayo hinabi na, ya wana, “Iningalwan kaw ya mangairap, gawan hikaw ay milamo ha pamanlokop

ni Apo Namalyari. ²¹ Iningalwan kaw ya angkablay amêhêñ, ta mabhoy kaw. Iningalwan kaw ya ampanangih amêhêñ, gawan mangkaili kaw. ²² Iningalwan kaw no gawan bêngat ha paniwala yo kangko ya Taga-Langit, ya In-anak Tawo, ay kahêmêkan la kaw, ipaplag la kaw, musmusêñ la kaw, haka hiraêñ la kaw. ²³ No malyari ya habayto, ay dapat humigla kaw, haka kaw magukdo gawan kahiglaan yo, ta mahlay ya primyo ya matanggap yo ha langit. Ta êmbayro êt ya pamairap lan ninuno la kanlan mâmipamwang hêñ an-ipaihip kanla ni Apo Namalyari.

²⁴“Noa, kaingalo kaw ya mabandi ta nilumatêng kamoyu ya katsighaw yo! Ayn kaw na hêñ maêngganan! ²⁵ Kaingalo kaw ya nabhoy amêhêñ ta hikaw ay mablay hêñ lonoh. Kaingalo kaw ya ampangkaili amêhêñ ta hikaw ay manyêngêñ. ²⁶ Kaingalo kaw no andayêwêñ kaw hêñ kaganawan ta êmbayro êt ya dinyag lan ninuno la kanlan nagbabaran mâmipamwang hêñ an-ipaihip kanla ni Apo Namalyari hêñ hato.”

Ya toro ni Apo Jesus ya tungkol ha pamanlugud ha kapatsi

(Mateo 5:38-48; 7:12a)

²⁷ Inhundo ni Apo Jesus ya panoro na, ya wana, “Panhabiên ko kamoyun atsi di hêñ ampanggilam, ya dapat yon lugurêñ ya kapatsi yo. Daygêñ yoy kangêran kanlan anhumêmêk kamoyu. ²⁸ Ihalangin yo hilay ampanuboy kamoyu, haka hilay ampamairap kamoyu. ²⁹ No main manampaling kapakan pingi yo ay ipatampaling yo êt kanla ya kapaka. No main mangwan sambra

yo, ay idin yo kanla etaman ya kamiseta yo.
³⁰ Mam-i kaw kanlan kaganawan ampakikwa kamoyu, haka no main mangwan pibandian yo, ay paulayan yo hila. ³¹ Ya kangérān ya labay yo hēn daygēn la kamoyu hēn kaatag, ay êmbayro êt ya daygēn yo kanla.

³² “No anlugarêñ yon bêngat hilay ampanlugud kamoyu, ay a na kaw dayêwêñ ni Apo Namalyari. Ta hila man ya makasalanan ay ampanlugud kanlan ampanlugud kanla. ³³ No ampanyag kaw hēn kangérān kanlan bêngat hēn ampanyag kangérān kamoyu, ay a na kaw dayêwêñ ni Apo Namalyari. Hila man ya makasalanan ay ampanyag kangérān kanlan ampanyag kangérān kanla. ³⁴ No mamaram kaw bêngat kanlan ampakapiorong hēn indam la kamoyu, ay a na kaw dayêwêñ ni Apo Namalyari. Hila man ya makasalanan ay ampmaram kanlan kapareho la, ya ampakapiorong hēn indam kanla. ³⁵ Noa, dapat yon lugurêñ ya kapatsi yo. Manyag kaw hēn kangérān. Mamaram kaw kanlan a makabayad hēn indam la kamoyu. No daygēn yoy habayto ay dyanan na kaw ni Apo Namalyari, ya pinakamakapangyarihan, hēn mahlay ya primyo, haka hikaw ay mamwangan maának na gawan hiya man ay an-ingalwan na hilay narawak ya ayn utang nakêm. ³⁶ Dapat kaw mag-in maingaloén hēn nanad kan Apo Namalyari ya Tatang tamo ya maingaloén.”

*Paan miyahatol
(Mateo 7:1-5)*

³⁷ “Paan kaw miyahatol ta êmén a kaw hatolan ni Apo Namalyari. Paan yon parusaan ya kaatag,

ta êmén a na kaw parusaan ni Apo Namalyari. Mamatawad kaw ta patawarêñ kaw êt ni Apo Namalyari. ³⁸ Mam-i kaw ha kaatag ta dyanan na kaw ni Apo Namalyari hên mangêd ya takal ya imbinhêk, intêtê, haka nakatalibohboh. Ta no ay-êmén ya pamaytakal yo ha kaatag, ay êmbayro êt ya takal ya idin kamoyu ni Apo Namalyari.”

³⁹ Hêñ nahabi nay na ya habayto ni Apo Jesus ay intoro nay na êt ya habaytsi ya kahabian kanla, ya wana, “Ya mihay buwag ay a makaakay hên kapareho nan buwag ta pareho hilan minabo ha malalê ya lubot. ⁴⁰ Ayn mag-aryl ya magaling ha ampanoro kana. Noa, hilay natoroan hên mangêd ay mag-in nanad ha ampanoro kanla.

⁴¹ “Panhêlkêñ yoy alwan nabyat ya kasalanan ya nanad poling ha mata hên kaatag, noa, a yo ampansinêñ ya nabyat ya kasalanan yo ya nanad batang ya atsi ha sarili yon mata. ⁴² Ay-êmén yon mahabi ha kapareho yo, ‘Patêl, paulayan mo kon alihêñ ya poling ha mata mo,’ no hikaw êt, ay a yo angkahêlêk ya nanad batang ya atsi ha mata yo. Ampagbabara kaw! Unaêñ yon alihêñ ya nanad batang ya atsi ha mata yo, bayo makahêlêk kaw hên mangêd, ta êmén yo maalíh ya nanad poling ha mata hên kaatag.”

*In-alimbawa ni Apo Jesus ya dyag lan ampagbabara hên ampanoro hilan kaptêgan ha kayo ya ampanagêy hên nangarawak
(Mateo 7:16-20; 12:33-35)*

⁴³ “Hilay mangêd ya kayo, ay a ampanagêy hên nangarawak. Ayn êt kayo ya narawak ya ampanagêy hên mangangêd. ⁴⁴ Ta hilay kayo ay

angkabalayan ha tagêy la. A ya managêy hên igos ya korêrêng-êy. A etaman managêy hên ubas ya tanyuong. ⁴⁵ Hilay mangêd, ay mapanyag hên kangêran, gawan mangêd ya nakêm la. Hilay narawak, ay mapanyag hên karawakan, gawan narawak ya nakêm la. Ta ya laman nakêm ay anumawah ha bêbêy.”

*Ya loway lalaki ya namairêng bali
(Mateo 7:24-27)*

⁴⁶ “Pambaêgên yo ko hên ‘Panginoon, Panginoon,’ noa, a yo andaygên ya panhabiên ko. ⁴⁷ Ipahlêk ko kamoyu no nanad hino hilay andumani kangko hên manggilam habi ko, haka anhumonol ha nalêngê la. ⁴⁸ Hila ay nanad ha mihay lalaki ya nanyag bali. Nangali yan malalê angga ha nidaoh ha dapah, ta bayro nan impairêng ya bali na. Hêñ nanlanab, ay nadanan yan maawêh ya lanêm, noa, a ya nayêgê ya bali na gawan mangêd ya pangadyag na. ⁴⁹ Noa, ya ampakgilam hên habi ko, bayo a manyag hên nagilam na, ay nanad yan lalaki ya nanyag bali ya alwan napah-êy gawan a na impakakali. Kabay hêñ nadanan yan maawêh ya lanab, ay tambêng yan nigêyma. Nangaagwat ya hatoy boon bali.”

7

*Namaalih hi Apo Jesus hêñ hakit hêñ ipoh hêñ kapitan hêñ hundaloh ya taga-Roma
(Mateo 8:5-13)*

¹ Hêñ nayari nay na ni Apo Jesus ya panoro na, ay nammita yay na ha balayan Capernaum. ² Atsi

bayro ya mihay kapitan hēn hundaloh ya taga-Roma. Main ipoh ya hata kapitan ya anlugurēn na. Main hakit ya hata ipoh haka angkaboytoy inanawa na. ³ Hēn namwangan hēn hata kapitan ya tungkol kan Apo Jesus, ay impaalap na ya kanlan toa lan Israelita ya nag tungkulān hēn pakihabian la hi Apo Jesus hēn mamaalíh hakit hēn ipoh na. ⁴ Hēn nilumatēng hilay na kan Apo Jesus ay pinakihabian la yan mangēd hēn daygēn na dayi ya kalabayan hēn kapitan, ta agyan alwa yan Israelita, ay mangēd yan tawo. ⁵ Hinabi la, “Anlugurēn na kitamo ya Israelita, ta hiyay nampairēng sinagoga tamo.”

⁶ Kabay nakihonol ya hi Apo Jesus kanla. Amêhēn, hēn narani hilan Apo Jesus, ha bali hēn kapitan, ay in-utoh nay na êt hēn hata kapitan ya ungnoy kaluguran na hēn manupa kanlan Apo Jesus. Hinabi la, ya wanla, “Panginoon, paan kay na kano hēn paabala hēn humwēn ha bali na ta angkarēng-êy ya kamo. ⁷ Kabay a ya kano hēn umarap kamo, noa, iutoh mo tana kano, ay maalíh ya hakit hēn ipoh na. ⁸ Hiya man kano, ay atsi ha aypa hēn kapangyarihan hēn kaatag, bayo nag hundaloh ha aypan kapangyarihan na. Ya kaganawan utoh na ay daygēn la. No habiēn na kanan miha, ‘Mita ka,’ ay mita yay na. No habiēn na kanan kaatag, ‘Paidani ka di,’ ay dumani ya. No habiēn na kanan ipoh na, ‘Daygēn moy hatsi,’ ay daygēn na.” ⁹ Hēn nagilam nay habayto ni Apo Jesus ay nag-êpapah ya. Inarap nay kal-atan ya ampanhumonol kana ta hinabi na, “Pakagilamēn yo, ayn akon nahêlêk ya miha man ya Israelita, ya

êmbayro ya nakataniêh ya paniwala.” ¹⁰ Hêñ nag-orong hilay nay in-utoh hêñ kapitan, ay ayn nanan hakit ya ipoh.

Biniyay ni Apo Jesus ya lalaki ya anak hêñ mihay babayi ya bawo

¹¹ A nabuyot, ay nammita hi Apo Jesus ha balayan ya ambaêgên Nain. Kalamo na hilay tagahonol na, haka kal-atan ya kaatag. ¹² Hêñ marani yay na bayro ha pahowêñ ha balayan, ay nakatupa hila hêñ kal-atan ya ampammitan mamilbêng, ya kalamo nan indo nan natsi. Ya natsi ay mihay lalaki, ya kamiha-mihaan ya anak hêñ habaytoy babayi ya bawo. ¹³ Hêñ nahêlêk ni Apo Jesus ya habaytoy indo hêñ natsi ay nainggalwan na ya, kabay hinabi na, ya wana, “Paan kan manangih.” ¹⁴ Amêhêñ, dinumani ya hi Apo Jesus ha bangkay hêñ anak nan babayi ta tinalan nay langkayan. Kabay tinunggêñ hilay mamalatay hêñ natsi. Hinabi ni Apo Jesus kanan natsi, ya wana, “Miyawhay, mimata ka.” ¹⁵ Nikno ya hata miyawhay bayo naghabi ya. Amêhêñ, hinabi ni Apo Jesus kanan indo na, ya wana, “Hatsi ya anak mo, ya nabiyay oman.” ¹⁶ Naubuh hilan nipag-êpapah. Pinuri la hi Apo Namalyari, ya wanla, “Main makapangyarihan ya propeta ya nilumtaw kantamo. Hiniraw ni Apo Namalyari hikitamoy Israelita.” ¹⁷ Habaytoy tungkol kan Apo Jesus ay nibahwag ha ayri man ya legal ha probinsyan Judea haka ha mamalibot hêñ Judea.

*Ya kotang ni Juan Bautista, ya atsi ha hukulan
(Mateo 11:2-19)*

¹⁸ Impamwang kan Juan Bautista ya balang habaytoy dinyag ni Apo Jesus hēn tagahonol ni Juan. ¹⁹ In-utoh ni Juan ya lowa kanlan tagahonol na, kan Apo Jesus hēn mangotáng kana, no hiya ya impangakon Mámiligtas ya pinili ni Apo Namalyari hēn mamaala, o no mangēnggan hila pon hēn kaatag. ²⁰ Hēn nilumatēng hila kan Apo Jesus, ay hinabi la, “In-utoh kay ni Juan Bautista, ta labay nan mamwangan no hika ya impangakon Mámiligtas ya pinili ni Apo Namalyari hēn mamaala o no mangēnggan kay pon hēn kaatag.” ²¹ Kanan habayto ay mal-at ya inalihan ni Apo Jesus hēn hinon hakit, haka nangarawak ya a angkahēlēk. Mal-at êt ya buwag ya pinamukat na. ²² Amêhēn, hinabi na kanla, ya wana, “Mag-orong kaw kan Juan ta ipamwang yo kana ya nahēlēk yo haka nagilam yo, ya ampakahēlēk hilay nay buwag, ampakabita hilay nay lumpo, angkaalih ya hakit lan nag ketong, ampakagilam hilay nay têkkēn, ampangoman mabiyay hilay natsi, haka ya Mangēd ya Habi ni Apo Namalyari ay an-ipamwang kanlan mairap. ²³ Iningalwan hilay a ampag-alangan ha paniwala la kangko.”

²⁴ Hēn nakabitay nay in-utoh ni Juan, ay nampamwang hi Apo Jesus hēn tungkol kan Juan kanlan kal-atan, ya wana, “Hinoy nilako yo ha legal ya kabalah-balahan? Éndat yo no ya ihip ni Juan ay nanad tsimbo ya mantēwēg ya angkadanan angin? ²⁵ Hino awud ya nilako yo? Yarin nilako yo ya mihay nakatakop hēn mangahampat! Alwa. Hilay nakatakop hēn mangahampat, haka ampat-sighaw, ay mahēlēk ha balin ari. ²⁶ Hino awud

ya nilako yo? Ya mihay propeta? Awo. Pakag-ilamén yo! Hiyay mihay propeta ya ayn kapan-tag. ²⁷ Gawan tungkol kan Juan Bautista ya hata nakahulat di ha habi ni Apo Namalyari, ya wana, ‘Mangiutoh ako hēn muna kamo, ya mangil-an hēn danan mo.’* ²⁸ Anhabién ko kamoyu, ya ha kaganawan tawo, ayn matag-ay kan Juan Bautista. Êmbayro man, ya pinakamaaypa ya nakapakilamo ha pamanlokop ni Apo Namalyari, ay matag-ay kan Juan.”

²⁹ Ginilam lan kal-atan kalamo lan máningil buwih ya hinabi na, haka hinumonol hilangan ha makatoynungan ya Kautuhan ni Apo Namalyari gawan nagpabawtismo hila kan Juan. ³⁰ Noa, inara lan Pariseo haka hilay mónoron Kautuhan ni apo Moises ya kalabayán ni Apo Namalyari ha biyay la, gawan a hila nagpabawtismo kan Juan.

³¹ Hinabi nay na êt ni Apo Jesus, ya wana, “Hino awud ya pangiparisan ko kanlan tawo amêhén? Nanad hino hila kaya? ³² Nanad hilan anak ya ampipammikno ha pangalindagan hēn ampibabaég, ya wanla, ‘Nanigtsig kay, noa, a kaw tsimmalék. Nanyêngén kay, noa, a kaw nakiyêngén.’ ³³ Ta nilumatêng hi Juan Bautista hēn panay hēn ampagtéeh hēn a ampangan ta êmén a maabala ya panalangin na, haka a ya ampiném hēn alak, noa gawan habayto ay anhabién yo, ya hinapatan yan narawak ya a angkahêlék. ³⁴ Hiko etaman, ya Taga-Langit, ya In-anak Tawo, ay nilumatêng di hēn ampakiaém haka ampiném hēn kalamo yo, noa gawan habayto, anhabién yo

* ^{7:27} Malakias 3:1.

ya hiko kano ay mahiba, mamminêm hên alak haka kaluguran lan máningil buwih haka kaatag ya mapanyag kasalanan. ³⁵ Embayro man, ay mapaptêgan ya pêtêg ya toro naên ni Juan Bautista, gawan habaytoy mahêlêk ha pamimiyay lan anhumonol ha toro naên.”

Nangan hi Apo Jesus ha bali ni Simon ya miha kanlan Pariseo

³⁶ Amêhêñ, main mihay Pariseo ya nag langan Simon ya nanagyat kan Apo Jesus hên mangan. Kabay hinumwêñ ya ha bali na ta nangan. ³⁷ Ha balayan ya habayto, ay nag babayi ya muwang lan kal-atan ya makasalanan ya. Hêñ namwangan nan babayi ya ampangan ya hi Apo Jesus ha bali nan Pariseo, ay pinantan na yan makamal ya pabango ya atsi ha pamyanan ya dyag ha alabastro. ³⁸ Dinumani ya ha bokot ni Apo Jesus, ha dapit bitsih na hêñ ampanangih. Nabahá ya bitsih ni Apo Jesus hêñ luwa na kabay pinunihan nan habot na, haka na inaro ya bitsih ni Apo Jesus bayo tinugtungan na hêñ hatoy pabango. ³⁹ Hêñ nahêlêk nan habaytoy Pariseo ya nanagyat kan Apo Jesus ya dinyag nan babayi ay nangihip yan êmêñ di, “No pêtêg yan propeta ni Apo Namalyari, ay muwang na dayi ya makasalanan ya hata am-panggapa kana haka bawalêñ na ya dayi.”

⁴⁰ Muwang ni Apo Jesus ya laman ihip nan hata Pariseo, kabay wana, “Simon, main akon habiêñ kamo.”

Amêhêñ, wani Simon, ya wana, “Hinoy habayto?”

41 Hinabi ni Apo Jesus, ya wana, “Main loway tawo ya nangútang kanan mihay mámautang pera. Ya miha ay nangútang hén 500 bayo ya miha ay nangútang hén 50. **42** Hén a hila makabayad, ay naingalwan na hila, kabay a na hilay na pinabayad hén utang la. Nanad hilay nan pinatawad. Amêhén, hino kanlan lowa ya mantêg manlugud kanan mámautang pera?”

43 Amêhén, hinabi ni Simon, “Kayno habaytoy nangútang hén mal-at.”

Hinabi ni Apo Jesus, “Awo, hukad ya hinabi mo.” **44** Bayo, pinalingayan nay babayi haka na hinabi kan Simon, ya wana, “Angkahélék moy andaygén hén hata babayi? Hén hinumwén ako ha bali mo ay a mo ko dinyanan lanêm hén panguyah hén bitsih ko. Noa, hata babayi, ay luwa na ya pinanguyah nan bitsih ko bayo pinunihan na hén habot na. **45** A mo ko inaro, noa, hiya, ay a na tinégnan hén inaro ya bitsih ko paubat hén hinumwén ako. **46** A mo dinyanan laro ya ulo ko, noa, hata babayi, ay bitsih koy tinugtugan nan pabango. **47** Kabay anhabién ko kamo ya hadyay lugud na ay pamaptêg ya napatawad ya kal-atan kasalanan na. Hinoman ya pinatawad bêngat hén pérad ay manlugud bêngat hén pérad.” **48** Amêhén, wani Apo Jesus kanan babayi, “Pinatawad ya kasalanan mo.” **49** Hilay kaatag ya kalamo lan ampangan bayro ay naghabi ha sarili la, ya wanla, “Hinoy hatsi ya ampmatawad kasalanan?” **50** Noa, hinabi ni Apo Jesus kanan babayi, ya wana, “Inligtas ka ha parusa hén kasalanan mo gawan paniwala mo kangko. Mag-

orong kay na, hēn mapatēkbēk ya nakêm.”

8

Hilay babayi ya nakihonol kan Apo Jesus

¹ Pangayari, ay nanoro yay na hi Apo Jesus ha mal-at ya balayan haka baryo. Impamwang nay Mangangêd ya Habi ya tungkol ha pamanlokop ni Apo Namalyari. Kalamo na hilay labinloway tagahonol na. ² Kalamo na êt ya ungnoy babayi ya inalihan na hēn hakit haka ya nangarawak ya a angkahêlêk ya hinumapat kanla. Ya miha kanlan hatoy babayi ay hi Maria, ya ambaêgêen Magdalena, ya inalihan hēn pitoy narawak ya a angkahêlêk. ³ Ya miha pon kanla ay hi Juana ya ahawa ni Cusa, ya mihay manungkulon ha sakop ni Herodes. Kalamo la êt hi Susana haka mal-at êt ya kaatag. Ginamit lan habaytoy babayi ya sarili lan bandi ya inhaliw lan kaên lan Apo Jesus.

Ya alimbawa ya tungkol ha bini ya inhabwag (Mateo 13:1-9; Marcos 4:1-9)

⁴ Hēn napi-tsi-tsipon ya kal-atan ya ubat ha ayirin balayan, ay intoro na kanla ni Apo Jesus ya hata alimbawa, ya wana,

⁵ “Main mihay lalaki ya namihabwag hēn bini. Ha pamihabwag nan bini ay main bini ya natata ha dann. Habaytoy natorakan bayo tinuktuk hēn manok. ⁶ Ya kaatag ay natata ha mabato ha mababo ya luta. Tinumubo ya, noa, nayanto, gawan namala ya luta bayro. ⁷ Ya kaatag ay natata ha kadiwian. Tinumubo ya bini, noa, tinumêytêy, gawan diwi. ⁸ Ya kaatag ay natata ha mataba ya luta. Tinumubo ya habaytoy bini haka naubuh

hēn nanagēy hēn manimagatoh ya lahi.” Hēn nahabi nay na ya habayto ni Apo Jesus ay hinabi nay na êt hēn in-ikhaw, ya wana, “Pakaihipēn yoy nagilam yo!”

*No pata paalimbawa ya panoro ni Apo Jesus
(Mateo 13:10-17; Marcos 4:10-12)*

⁹ Hēn labay lan mamwangan hēn labinloway tagahonol ni Apo Jesus no hinoy labay habiēn hēn alimbawa ya tungkol ha bini, ¹⁰ ay hinabi ni Apo Jesus, “Hikaw bat ya makamwang hēn inilihim ya tungkol ha pamanlokop ni Apo Namalyari, noa, kanlan kaatag ay anhabiēn ko ha alimbawan bēngat, ta êmēn ‘Manlēk hila man, ay a la mamwangan ya anhēlkēn la. Manggilam hila man, ay a la maintindihan ya angkagilaman la.’ ”*

*Impamwang ni Apo Jesus ya labay habiēn hēn habaytoy alimbawa ya tungkol ha bini ya inhabwag
(Mateo 13:18-23; Marcos 4:13-20)*

¹¹ “Êmēn ya di ya labay habiēn hēn hatoy alimbawa. Ya bini ay habi ni Apo Namalyari. ¹² Ya nakēm tawo ay in-alimbawa ha natataan bini. Ya bini ya natata ha dann ay habi ni Apo Namalyari ya nagilam lan tawo, noa, nilumatēng hi Satanas ta inalih na ya habaytoy habi ha nakēm la, ta êmēn hila a maniwala kan Apo Namalyari, haka a miligtas ha parusa. ¹³ Ya bini ya natata ha kabatoan, ay habi ni Apo Namalyari ya tinanggap la hēn main kahiglaan, noa, a nimana ha nakēm la. Naniwala hila pon, noa, hēn nilumatēng ya pamanubuk, ay a hilay na naniwala. ¹⁴ Ya bini ya natata ha

* **8:10** Isaias 6:9.

kadiwian ay habi ni Apo Namalyari ya ginilam la pon, noa, tampol nialih ha nakêm la, gawan ha kayagahan, pibandian, haka katsighaw hên biyay la. Kabay a nabayo ya biyay la, hên nanad ha a nanagêy ya bini. ¹⁵ Ya bini ya natata ha mataba ya luta ay habi ni Apo Namalyari ya ginilam la, bayo nimana ha nakêm la, gawan mangêd ya nakêm la. Ha pamagtêêh la, ay nabayoy biyay la.”

*Ya atáng ay dapat idin ha taganán pamyanan
(Marcos 4:21-25)*

¹⁶ “Ayn mamagkêt hên atáng bayo halokoban o idin ha hilong pangkatuluyan. Noa, idin na ha mantêg pamyanan atáng, ta êmén mahawangan ya danan lan anhumwên. ¹⁷ Ayn intago ya a miawah. Ayn êt inlihim ya a mamwangan haka mihungbung.

¹⁸ “Pakaihipêñ yoy angkagilam yo, ta no honolên yoy toro ko, ay mapahanan ya pamangintindi yo, noa, no a yon honolên, ay alihêñ êt kamoyu ya pêpêrad ya naintindihan yo.”

Hilay ampanggilam habi ni Apo Jesus, ay anlugurên na hên nanad ha pamanlugud na ha indo na, haka hilay patêl na

(Mateo 12:46-50; Marcos 3:31-35)

¹⁹ Amêhêñ, nilumatêng ya indo ni Apo Jesus haka hilay patêl na, noa, a hila midani kana gawan ha kal-atan. ²⁰ Main naghabi kana, ya wana, “Atsi di ha ilwangan ya indo mo haka hilay patêl mo. Labay la kan makahabi.” ²¹ Noa, wani ni Apo Jesus kanla, “Hilay ampanggilam habi ni Apo Namalyari haka ampanyag kalabayan na, ay anlugurên

ko hēn nanad ha pamanlugud ko ha indo ko, haka hilay patêl ko.”

*Pinatunggēn ni Apo Jesus ya hadyay angin
(Mateo 8:23-27; Marcos 4:35-41)*

²² Mihay allo, hinumakay ha bangka hi Apo Jesus hēn kalamo na hilay tagahonol na. Hinabi na kanla, “Magbangka kitamo hēn lumipay.” Kabay nag-umpisa hilay nan lumipay. ²³ Ha pamanlumipay la, ay nabêlêw ya hi Apo Jesus ha bangka. Amêhēn, nagkamain hēn hadyay angin, haka ya bangka la ay angkapnoy nan lanêm, kabay atsi hila ha kapapotog. ²⁴ Pinukaw la ya, ya wanla, “Panginoon! Panginoon! Ampilêmêh kitamina!” Nimata ya, ta binawal nay angin haka hadyay tandulon. Tinunggēn ya angin haka tandulon, hēn nagpatêkbék. ²⁵ Hinabi na kanla, ya wana, “Ayn kaw awud hēn tsiwala kangko!” Nalimwan hila. Nag-êpapah hilan nihahabi, ya wanla, “Hino kaya ya hatsi ya ampakabawal hēn angin haka lanêm, bayo anhumonol hila kana?”

Namaalíh hi Apo Jesus hēn nangarawak ya a angkahêlêk, ya hinumapat kanan mihay lalaki ya Gergeseno

(Mateo 8:28-34; Marcos 5:1-20)

²⁶ Amêhêن, nilumatêng hilan Apo Jesus ha legalan Gergeseno† ha lipay lanêm ha êtêb hēn probinsyan Galilea. ²⁷ Pagtaoy ni Apo Jesus ha bangka ay tinupa ya hēn mihay lalaki ya taga bayro ha balayan ya habayto ya hinapatan hēn nangarawak ya a angkahêlêk. Nabuyot yay nan, a ampagtakop. A

† **8:26** Geraseno o Gadareno ha kaatag ya Kahulatan Griego.

yay na ampaidi ha bali, ta ampaidi ya tana ha pay-ilbêngan. ²⁸ Hêñ nahêlêk na hi Apo Jesus, ay nanangaw ya, bayo nandoko ya, hêñ nakadêngdêng ha arapan na, ta makhaw nan hinabi, ya wana, “Jesus, Anak ni Apo Namalyari, awta ampakiêmân mo ko? Ampakihabi ko kamo ya a mo ko dayin parusaan.” ²⁹ Hinabi nay habayto gawan ampaalihêñ ni Apo Jesus ya nangarawak ya nipanhumapat kanan lalaki. Hata lalaki ay panay anhapatan hêñ nangarawak ya a angkahêlêk. Agyan amban-tayan la ya hêñ kabaryo na, haka an-itaykala la ya gamêt haka bitsih na, ay pamboytoên nan bat ya habayto, bayo an-ipalako la ya ha marayo ha tawo hêñ hatoy nipanhumapat kana. ³⁰ Amêhêñ, nangotang hi Apo Jesus, ya wana, “Hinoy langan mo?” Wanlan hinumapat kana etaman, “Libo-Libo.” Hinabi lay habayto, gawan mal-at ya nangarawak ya a angkahêlêk ya nipanhumapat kanan lalaki. ³¹ Habaytoy hinumapat ay nakiingalo kan Apo Jesus, ya paan hila dayin iutoh ha logal ya kaparusaan, ya ayn anggaan ya kalalêan.

³² Main kal-atan baboy bayro ya ampipambuk ha bung-oy ya narani ha lanêm. Nakiingalo hilay hinumapat hêñ paulayan hila dayi hêñ humapat kanlan baboy. Pinaulayan na hila etaman ni Apo Jesus. ³³ Kabay inumalih hila kanan lalaki ta nipanhumapat hila kanlan baboy. Habaytoy baboy ya hinapatan la, ay nipamwayun palohan ha natalindah ya laylay lanêm hêñ nilêmêh ha dagat-dagatan.

³⁴ Hêñ nahêlêk lan manayhay hêñ baboy ya nalyari, ay nipamwayu hila ta impamwang lay

habayto ha kaganawan baryo haka ha balayan la.

³⁵ Hêñ nagilam lay balita la, ay nilako lan hinlêk ya nalyari. Hêñ nilumatêng hila kan Apo Jesus ay nahêlêk lay lalaki, ya inalihan nangarawak ya a angkahêlêk. Nakatakop yay na haka ampikno ya ha dani ni Apo Jesus hêñ mapatêkbêk ya ihip. Nipangkalimo hila ha kapangyarihan ni Apo Jesus. ³⁶ Impamwang lan nakahêlêk ya dinyag ni Apo Jesus, no ay-êmén yan namaalíh hêñ nangarawak ya a angkahêlêk ya hinumapat kanan lalaki. ³⁷ Bayo nakiingalo hilay Gergeseno ya atsi bayro, kan Apo Jesus, ya mag-alíh ya ha legal la. Dinyag lay habayto gawan hadyay limo la. Kabay hinumakay hilan Apo Jesus ha bangka hêñ paorong. ³⁸ Hêñ nakitan nan lalaki ya inalihan nangarawak ya a angkahêlêk, ya paalíh hilan Apo Jesus, ay nakiingalo ya hêñ gêtan ya dayi, noa, impaorong na ya ni Apo Jesus, ya wana, ³⁹ “Muli kay na ha bali mo, ta ipamwang mo ya kangêran ya dinyag kamo ni Apo Namalyari.” Nammita yay nay lalaki ta impamwang na ha boon balayan ya habayto ya tungkol ha dinyag ni Apo Jesus.

*Biniyay ya anak ya babayi ni Jairo haka pinaalíh
ya hakit hêñ mihay babayi ya labinloway taon
nanan ampaghakit*

(Mateo 9:18-26; Marcos 5:21-43)

⁴⁰ Amêhêñ, ha pag-orong lan Apo Jesus hêñ nagbangkan ubat ha lipay, ay hinumigla hilay kallatan ya ampangênggan kana. ⁴¹ Main dinumani hêñ nandoko hêñ nakadêngdêng ha bitsih ni Apo Jesus ya mihay ampamaala ha sinagoga bayro, ya nag langan Jairo. Nakiingalo ya kan Apo Jesus,

ya kihonol ya dayi kana ha bali na, ⁴² gawan am-pamêrad-pêrad yay nan matsi, ya kamiha-mihaan nan anak ya babayi, ya main manga labinloway taon.

Kaban ampita hilan Apo Jesus ha bali ni Jairo, ay ampi-pipiitan la yan kal-atan ya nakihonol kanla. ⁴³ Kalamo lan hata kal-atan, ya mihay babayi, ya labinloway taon nanan andayaên. [Naiubuh nay na ya pibandian na ha hino-hino kay na hên ya doktor, noa, ayn nakaalíh hakit na.] ⁴⁴ Kaban ampammita hila, ay dinumani ya hatoy babayi ta ginap-an nay laylayan takop ni Apo Jesus ha dapit bokotan, haka tambêng tinunggén ya ampantoloy daya na. ⁴⁵ Tampol yan nangotang hi Apo Jesus, “Hinoy nakagapa hên takop ko?” Hêñ ayn mangamin, ay hinabi ni Pedro, “Panginoon, ampi-lolopungan la ka, haka la kan ampi-pipiitan hêñ kal-atan!” ⁴⁶ Noa, hinabi ni Apo Jesus, ya wana, “Main nakagapa hêñ takop ko, ta natanam ko ya main inalihan hakit gawan ha kapangyarihan ko.” ⁴⁷ Hêñ namwangan nan babayi ya napansin ni Apo Jesus ya dinyag na, ay ampamêgpêg yan inumarap kana, hêñ nandoko hêñ nakadêngdêng. Ha arapan lan kal-atan, ay impamwang na no mata ginap-an na ya takop ni Apo Jesus, haka no ay-êmêñ tambêng hêñ tinunggén ya ampantoloy daya na. ⁴⁸ Amêhêñ, wani Apo Jesus kanan babayi, “In-alíh ya hakit mo gawan ha paniwala mo kangko. Muli kay na hêñ mapatékbêk ya ihip.”

⁴⁹ Kaban ampaghabi ya pon hi Apo Jesus, ay main nilumatêng ya ubat ha bali ni Jairo, ya naghabi, “Natsi ya anak mo. A minan abalaêñ hi Apo Jesus hêñ maniraw ha bali.” ⁵⁰ Noa,

hêñ nagilam ni Apo Jesus ya habayto, ay wana kan Jairo, “Paan kan maglungkot. Maniwala ka tana kangko, ta ma-alîñ ya hakit hêñ anak mo.” ⁵¹ Panlumatêng la ha bali lan Jairo, ya pinahowêñ nan bêngat ni Apo Jesus ay hi Pedro, hi Juan, hi Santiago haka hilay toa hêñ hata anak. ⁵² Naubuh hilan ampipanangih haka ampipanyêngêñ ya atsi bayro, kabay hinabi na kanla, “Paan kaw manangih ta a ya natsi. Nabêlêw yan bêngat.” ⁵³ Kinailyan la ya hi Apo Jesus, ta muwang la ya pêtêg yay nan natsi. ⁵⁴ Noa, tinalan ni Apo Jesus ya gamêt nan anak ta hinabi na, “Anak ko, mimata ka.” ⁵⁵ Nabiyyay yan oman haka tambêng yan nimata. Hinabi na êt ni Apo Jesus ya pakanêñ la ya. ⁵⁶ Nag-êpapah ya toa nan anak, noa, binawal na hila hêñ paan ipamwang ha kaatag ya biniyyay nay anak.

9

*Inutuhan na hilan manoro ni Apo Jesus ya labin-loway tagahonol na ya binaêg lan apostol etaman
(Mateo 10:5-15; Marcos 6:7-13)*

¹ Mihay allo, ay tsinipon ni Apo Jesus ya labin-loway tagahonol na, ta dinyanan na hila hêñ kapangyarihan haka tungkulon hêñ mamaalîñ hêñ hakit haka kaganawan nangarawak ya a angkahêlêk. ² Bayo in-utoh na hila hêñ mamitoro hêñ tungkol ha pamanlokop ni Apo Namalyari haka mamaalîñ hêñ hakit. ³ Bayo hila nammita, ay hinabi na kanla, “Paan kaw mantan hêñ hinoman ya nanad ha têkêñ, balutan, puto, pera, haka takop. ⁴ Magdahêl kaw ha balin managyat

kamoyu, haka bayro kaw tana angga ha a pon nayari ya pamitoro yo ha legal ya habayto. ⁵ No a la kaw tanggapêñ ha mihay legal, ay bayo kaw mag-alíh bayro, ay ikampag yoy tuwapok ha bitsih yo, ta êmén la mamwangan ya atsi tana kanla no lumatêng kanla ya parusa ni Apo Namalyari.” ⁶ Amêhên, nammita hilay na hèn mamitoro hèn Mangangêd ya Habi haka hèn mamaalíh hèn hakit ha ayri man ya legal.

*Niyumagah hi Herodes Antipas
(Mateo 14:1-12; Marcos 6:14-29)*

⁷ Hèn nagilam ni Gobernador Herodes Antipas ya ampamaala ha Galilea ya tungkol ha kapapaêpapah ya andaygêñ lan Apo Jesus, ay nanyagah yay na, gawan main ampaghabin hi Apo Jesus ay Juan Bautista ya impapatsi na, ya nangoman nabiyay. ⁸ Main kaatag ya ampaghabin nagpahlék ya hi propeta Elias.* Ampaghabi êt hèn kaatag, ya nangoman nabiyay ya miha kanlan kaatag ya má mipamwang hèn an-ipaihip kanla ni Apo Namalyari hèn haton lagi. ⁹ Amêhên, hinabi ni Gobernador Herodes Antipas, ya wana, “Impapotoh kinay ulo ni Juan Bautista, noa, hinoy hata lalaki ya angkababalit-an kon habaytsi ya angkalyari?” Kabay labay na ya dayin mahélék hi Apo Jesus.

*Liman libo ya pinakan ni Apo Jesus
(Mateo 14:13-21; Marcos 6:30-44; Juan 6:1-14)*

¹⁰ Hèn nag-orong hilay nay labinloway apostol, ay hinabi la kan Apo Jesus ya dinyag la. Gintan na hila, hèn kakapag lan bêngat, ha balayan Betsaida.

* **9:8** Ya mihay má mipamwang hèn an-ipaihip kana ni Apo Namalyari.

11 Hêñ namwangan lan kal-atan, ya atsi hila bayro, ay nangamat hila. Dinambi na hila etaman ni Apo Jesus. Intoro na kanla ya tungkol ha pamanlokop ni Apo Namalyari bayo namaalih yan hakit la.

12 Hêñ maranin matata ya allo ay dinumani kana ya labinlowa hêñ naghabi kana, ya wanla, “Dayi ipalako mo hilay kal-atan ha balang baryo, ya alwan marayo di ta êmén hila makatsikap hêñ maékan la haka mapagdahêlan la gawan ayn bali di.” **13** Noa, hinabi na kanla, ya wana, “Hikaw tanay mam-i kanla hêñ maékan la.” Hinabi la, ya wanla, “Main kitamon bêngat hêñ limay puto haka loway kênán lanêm. Labay mo hêñ manaliw kay hêñ kaén hêñ hatsi ya kal-atan?” **14** Hinabi lay habayto, gawan main manga liman libo ya lałaki bayro. Noa, hinabi ni Apo Jesus kanlan labinloway tagahonol na, ya wana, “Paiknoën yo hilan pusto-pusto ya mani-limampo ha balang pusto.” **15** Dinyag la ya kalabayan ni Apo Jesus. Pinaikno la ya kal-atan. **16** Kingwa ni Apo Jesus ya limay puto haka loway kênán lanêm. Naningla ya, ta pinahalamatan nay hatsi kan Apo Namalyari. Pino-potoh nay habayto, ta impatayak na kanlan tagahonol na. **17** Ya kaganawan tawo ay nakaékan angga ha nangabhoj hila. Hêñ tsinipon la ya tagan, ay nakapno hila êt hêñ labinloway lubon.

*Hinabi ni Pedro ya hi Apo Jesus, ay hiyay Cristo,
ya impangakon Mámiligtas
(Mateo 16:13-28; Marcos 8:27-9:1)*

18 Mihay allo hêñ ampanalangin yan miha na hi Apo Jesus, ay dinumani kana ya tagahonol na. Kinotang na hila, ya wana, “Hino ko kano?”

19 Kabay hinabi la, “Wanlan kaatag ya hika ay hi Juan Bautista. Noa, wanlan kaatag êt ya hika ay hi Propeta Elias. Hilay kaatag êt ay ampaghabin nabiyay hên oman ya miha kanlan unan mâmipamwang hên an-ipaihip kanla ni Apo Namalyari.” **20** Wana êt kanla ni Apo Jesus, “Kamoyu etaman, hino ko ha ihip yo?” Wani Pedro etaman, “Hika ya Mesias, ya Cristo, ya impangakon Mámiligtas ya pinili ni Apo Namalyari hên mamaala.”

21 Noa, binawal na hila hên ipamwang ya hatoy hinabi ni Pedro ha hinoman. **22** Wana êt ni Apo Jesus, “Hiko ya Taga-Langit, ya In-anak Tawo, ay kailangan magtêêh hên hadyay pamagdusa. Hikoy araêñ lan mánoron Kautuhan ni apo Moises. Araêñ la kon toa ya nag tungkulon ha bansa, haka araêñ la ko êt hên ampamaala kanlan pari. Ipatpsi la ko, noa, ha ikatlon allo ay biyayêñ akon oman.”

23 Bayo pinarani nay kal-atan hên kalamoy tagahonol na, ta wana kanla, “Hilay labay hên humonol kangko, ay dapat lan liwaan ya sarili lan kalabayan. Allo-allo ay dapat nakal-an hilan magtêêh hên kairapan, o matsi man, ya maialimbawa ha pamakay hên nabyat ya koros. **24** Hilay a mabay hên humonol kangko, gawan a la labay hên mangoman ya pamimiyay la, ay maalihan êt hên biyay. Noa, hilay matsi gawan ha paniwala la kangko, ay dyanan biyay ya ayn angga. **25** Agyan mikamihan kanan mihay tawo ya pibandian di ha luta, ay a na mapakinabangnan ya habayto, no hiya etaman ay mipalako ha kaparusaan ya ayn angga! **26** Ya balang maykarêng-êý ha toro ko,

haka kangko, ya Taga-Langit, ya In-anak Tawo, ay ikarêng-êy ko hila êt ha pag-orong ko di. Ha pag-orong ko di, ay atsi kangko ya kapahilêw ya kahampatan ko, ya kapahilêw ya kahampatan ni Apo Namalyari, ya Tatang ko, haka ya kapahilêw ya kahampatan lan anghel na. ²⁷ Pakagilamên yoy habaytsi, ya main ungno di kamoyu ya a matsu angga ha mahêlêk la, ya nilumatêng ya paman-lokop ni Apo Namalyari.”

*Hi Apo Jesus, hi apo Moises, haka hi apo Elias
(Mateo 17:1-8; Marcos 9:2-8)*

²⁸ Hêñ nalabah ya manga waloy allo paubat hêñ hinabi nay habayto ni Apo Jesus, ay nilumakat ya ha tawtgut ta manalangin. Pinaglamo na hi Pedro, hi Juan haka hi Santiago. ²⁹ Kaban ampanalangin ya, ay naoman ya itsura na. Ya takop na ay nag-in bapan putsi ya kapahilêw. ³⁰ Namakonkaynaman ay main loway lalaki ya nagpahêlêk ya ampaghabi kan Apo Jesus. Hila ay hi apo Moises haka hi apo Elias ya lowa kan-lan manan mâmipamwang ya an-ipaihip kanla ni Apo Namalyari. ³¹ Bat nilumtaw ya hata lowa hêñ main kapangyarihan haka ya kapahilêw ya kahampatan ni Apo Namalyari, ta pinihabian lay kamatsan kan Apo Jesus ya malyari ha balayan Jerusalem. ³² Hi Pedro haka hilay loway lamo na ay nabêlêw, noa, nipaalmugat hila ta nahêlêk la ya kapahilêw ya kahampatan ni Apo Jesus haka ya loway lalaki ya kalamo na. ³³ Pammita lan lalaki, ay hinabi ni Pedro, ya wana, “Panginoon, mangêd ya atsi kitamo di. Manyag kay hêñ tatloy hawong. Miha kamo, miha kan apo Moises, haka miha kan

apo Elias.” Hinabi nay habayto ni Pedro gawan nakatsigag ya. ³⁴ Ampaghabí ya pon hi Pedro hēn inupungan hila hēn ginêm. Kabay nalimwan hilan Pedro. ³⁵ Haka main hilan nagilam ya habi ya ubat ha ginêm, ya wanana habi, “Hatsi ya anlugurê kon Anak. Gilamên yoy habi na!” ³⁶ Hēn tinunggêna ya habi, ay mimiha na tana ni Apo Jesus ya nahêlêk la. A la pon hinabi ha hinoman ya habaytoy nahêlêk la.

*Namipaplag hi Apo Jesus hēn hinumapat hēn ampamatugaw ha mihay anak ya lalaki
(Mateo 17:14-18; Marcos 9:14-27)*

³⁷ Hēn humonoy allo, hēn nakalohan hilay na ha tawgtug, ay tinupa hilan Apo Jesus hēn kallatan. ³⁸ Namakonkaynaman ay namaêg ya mihay lalaki, ya wana, “Mánoro, ingalwan mo dayi ya anak koy lalaki gawan hiyay kamiha-mihaan kon anak. ³⁹ Bêngat yan andawhongêna hēn anhumapat kana, bayo ampiangaw-angaw ya. An-ibuwad-buwad na yan hata anhumapat kana angga ha ampaggalak ya bêbêy na. Ampakahakitan na ya haka a na labay itêgêna ya pamahakit na kana. ⁴⁰ Impapakahabi kina ha tagahonol mo ya paalihêna ya, noa, a la ya agyu hēn paalihêna.” ⁴¹ Amêhêna, wani Apo Jesus, “Hikaw ya angkabiyay amêhêna ay ayn paniwala haka hadayay karawakan yo. Aydin angga kataw hēn pakilamoan haka pakitagalang?” Bayo wana kanan lalaki, “Gêtan mo di ya anak mo.” ⁴² Kaban andumani ya anak ay impatumba yan hatoy hinumapat kana haka imbuwad-buwad na ya. Noa, hi Apo Jesus ay namawal kanan hinumapat haka namipaplag kana,

bayo in-orong nay anak ha toa na. ⁴³ Naubuh hilan nag-êpapah ha kapangyarihan ni Apo Namalyari.

*Inoman nan hinabi ni Apo Jesus ya patsên ya
(Mateo 17:22-23; Marcos 9:30-32)*

Kaban ampag-êpapah hila ha balang dyag ni Apo Jesus, ay hinabi na kanlan tagahonol na, ya wana, ⁴⁴ “Pakagilamén yo. Hiko, ya Taga-Langit, ya In-anak Tawo, ay i-upit ha kapatsi ko.” ⁴⁵ Noa, a la naintindihan hèn tagahonol na ya habaytoy hinabi na, gawan habaytoy a impamwang kanla ni Apo Namalyari. Haka malimo hila etaman hèn mangotáng.

*No hino ya matag-ay ya tungkulan
(Mateo 18:1-5; Marcos 9:33-37)*

⁴⁶ Mihay allo ay pinihuhubakan lan tagahonol ni Apo Jesus no hino kanla ya matag-ay ya tungkulan. ⁴⁷ Muwang ni Apo Jesus ya laman ihip la, kabay pinairéng nay mihay anak ya nanawa ha dani na. ⁴⁸ Haka wana kanla, “Hinoman ya ampaniwala kangko, ya ampananggap kanlan maaypa ya nakém nanad hata anak, hèn gawan habaytoy paniwala la kangko, ay hila ya matag-ay ya tungkulan. Ta ha pananggap la kanla, ay nanad hiko ya antanggapén la. Hila etaman ya ampananggap kangko, ay antanggapén la hi Apo Namalyari ya namiutoh kangko.”

*Hilay a ampanalanghang kantamo, ay ampana-wop kantamo
(Marcos 9:38-40)*

⁴⁹ Wani Juan kan Apo Jesus, “Nahêlêk naêñ ya mihay lalaki ya ampamaalíh hèn nangarawak ya a angkahêlêk ha langan mo. Binawal naêñ ya

gawan alwa tamo yan kalamo.” ⁵⁰ Noa, wani Apo Jesus kana, “Paan yo yan bawalêñ, ta hilay a ampanalanghang kamoyu ay ampanawop kamoyu.”

A la tinanggap hi Apo Jesus ha mihay baryo ha Samaria

⁵¹ Hêñ marani ya allon pamag-orong ni Apo Jesus ha langit, ay tinalagá na hêñ maniraw ha balayan Jerusalem. ⁵² Main yan in-utoh ya nuna kana ha mihay baryo ha Samaria hêñ namil-an pagdahêlan lan Apo Jesus. ⁵³ Noa, a la ya tanggapêñ bayro gawan magsimba ya ha Jerusalem, haka hilay Samaritano haka hilay ampagsimba ha Jerusalem ay a angkapiintindi. ⁵⁴ Hêñ namwangan lan tagahonol na, hi Santiago haka hi Juan, ya nalyari, ay hinabi la, ya wanla, “Panginoon, labay mo hêñ mamaaypa kay hêñ apoy ya ubat ha langit êmêñ hila mangamamatsi?” ⁵⁵ Noa, pinalingayan na hila, haka hinabyanan na hila. ⁵⁶ Amêhêñ, nammita hila ha kaatag ya baryo.

*Hilay labay hêñ kihonol kan Apo Jesus
(Mateo 8:19-22)*

⁵⁷ Ha pammita la, ay main lalaki ya naghabi kana, “Mánoro, kihonol ako kamo ayri man ya lakwêñ mo.” ⁵⁸ Hinabi etaman kana ni Apo Jesus, “Hila man ya ahon lalê ay main lêyang ya ampaidyanan, haka hilay manok lalê ay main halay, noa, hiko ya Taga-Langit, ya In-anak Tawo, ay ayn dyanan di ha luta.” ⁵⁹ Bayo, hinabi na kanan kaatag, ya wana, “Kihonol ka kangko.” Noa, hinabi nan hatsi, ya wana, “Panginoon, paulayan mo ko pon hêñ mamilbêng toa ko.” ⁶⁰ Noa, hinabi ni Apo Jesus kana, ya wana, “Paulayan mo hilay ayn

biyay ya ayn anggaan hēn mamilbēng kapareho lan natsi. Noa, hika ay dapat hēn mamipamwang hēn tungkol ha pamanlokop ni Apo Namalyari.”

⁶¹ Main kaatag ya naghabi, ya wana, “Panginoon, kihonol ako kamo, noa, paulayan mo ko pon hēn magpamwang ha bali.” ⁶² Hinabi ni Apo Jesus kana, ya wana, “Alwan hēpat ha mihay manyarol hēn panay hēn mamalingay. Embayro êt, alwan hēpat hēn makilamo ha pamanlokop ni Apo Namalyari ya hilay a nakapêptēng ya ihip ha pamanhumonol kana.”

10

Namiutoh ya hi Apo Jesus hēn pitumpo boy lowa ya kaatag ya tagahonol na, ta êmēn hila manoro hēn habi ni Apo Namalyari

¹ Pangayari hēn habayto, ay namili ya hi Apo Jesus hēn pitumpo boy lowa ya kaatag ya tagahonol na. Impauna na hila hēn lowa-lowwa ha balang balayan haka ha balang baryo ya lakwēn na, ta êmēn hila manoro hēn habi ni Apo Namalyari.

² Bayo hila nammita, ay hinabi na kanla, “Hilay kal-atan ya labay hēn manggilam hēn tungkol kan Apo Namalyari, ay nanad hilan pali ya nawto ya maranin gapahēn, gawan nakal-an hilay na hēn maniwala. Mal-at ya gapahēn, noa, u-ungnon bēngat hilay manggapah. Kabay ihalangin yo kan Apo Namalyari, ya nag pali, ya mamiutoh ya hēn kaatag êt, ya kapareho yon manggapah, ta êmēn hila etaman manoro hēn tungkol kana. ³ Hali, mita kaw na. Noa, kaillag kaw, ta hikaw ay nanad anak tupa, ya an-iutoh ko kanlan nanad ahon

lalê, ya mapamatsin tupâ. ⁴ Paan kaw mantan hên pera, balutan, o paghagili hên pag-apin bitsih yo. A kaw magpabuyot hên maghabi ha katupa yo ha dann. ⁵ Bayo kaw hên humwêñ ha mihay bali, ay habiêñ yo pon, ‘Lumatêng dayi kamoyu ya ingalo ya pan-idin ni Apo Namalyari.’ ⁶ No ya nakêm lan hatoy nag bali ya anlakwêñ yo ay nakalan hên mananggap ingalo ni Apo Namalyari, ay makatanggap hilan habayto. No a hila nakal-an hên mananggap ingalo na, ay a hila makatanggap hên habayto. ⁷ Bayro kaw tanan maglaêh ha dinahêlan yoy bali. A kaw paálih-álih hên katuluyan yo. Kaêñ yo, haka inêmêñ yo, ya hinon iarap la kamoyu, ta hilay mag-obra ay dapat dyanan hên suweldo. ⁸ Ha balang balayan ya lakkwêñ yo, no tanggapêñ la kaw, ay kaêñ yo ya iarap la kamoyu. ⁹ Paalihêñ yoy kaganawan hakit lan nipaghakit, bayo habiêñ yo kanlan atsi bayro ya êmêñ di, ‘Dinumani kamoyu ya pamanlokop ni Apo Namalyari.’ ¹⁰ Noa, paglatêng yo ha mihay balayan, ta a la kaw tanggapêñ, ay paan kaw magdahêl bayro. Bayo kaw mita, ay habiêñ yo kanla ya êmêñ di, ¹¹ ‘Agyan tuwapok hên balayan yo, ya nipagpak ha bitsih naêñ, ay ikampag naêñ bayo kay mita, ta êmêñ yo mamwangan ya atsi tana kamoyu no lumatêng kamoyu ya parusa ni Apo Namalyari. Pakaihipêñ yo ya dinumani kamoyu ya pamanlokop na, noa, a kaw nagpalokop.’” ¹² Hinabi nay na êt ni Apo Jesus kanlan tagahonol na, ya wana, “Pakagilamêñ yo, mabyat ya parusa kanlan taga-balayan Sodoma ya inulam ni Apo Namalyari hên hato, gawan hadyay kasalanan

la. Noa, ha allon pamipapawa ni Apo Namalyari hēn nagpalokop kana ha a nagpalokop kana, ay mas mabyat ya parusa kanlan hata balayan ya a nananggap kamoyu kanan parusa kanlan taga-balayan Sodoma.”

*Ya babalá kanlan a nipaghêhê
(Mateo 11:20-24)*

¹³ Inhundo ni Apo Jesus ya paghabi na, ya wana, “Kaingalo kaw ya taga-balayan Corazin haka taga-balayan Betsaida gawan a yo paghêhêan hēn tali-batokan ya pamanyag yon kasalanan, agyan malat ya kapapaêpapah ya dinyag ko bahê. Mabyat ya kasalanan lan taga-balayan Tiro haka taga-balayan Sidon. Noa, no nadyag dayi kanla ya kapapaêpapah ya dinyag ko bahê ha Corazin boy Betsaida, ay tampol la dayi bayton impahlék ha dyag la ya pinaghêhêan haka tinalibatokan la ya pamanyag lan kasalanan, hēn taga-Tiro haka Sidon. ¹⁴ Lumatêng lano ya allon pamipapawa ni Apo Namalyari hēn nagpalokop kana, ha a nagpalokop kana, ay mas mabyat ya pamarusa kamoyun taga-Corazin haka Betsaida kanan pamarusa kanlan taga-Tiro haka Sidon. ¹⁵ Hikaw êt, ya taga-balayan Capernaum, êndat yo no mipalako kaw ha langit hēn mananggap papuri, noa, ihamwag kaw ha impiyerno.” ¹⁶ Hinabi na êt ni Apo Jesus kanlan tagahonol na, ya wana, “Hilay ampanggilam kamoyu, ay ampanggilam kangko. Hilay ampangara kamoyu, ay hiko ya an-araêñ la. Hilay ampangara kangko, ay an-araêñ la hi Apo Namalyari ya namiutoh kangko.” Hêñ nayari yay

nan naghabi hi Apo Jesus, ay nammita hilay nay pitumpo boy lowa.

Ya pag-orong hēn pitumpo boy lowa ya in-utoh ni Apo Jesus

¹⁷ Pag-orong lan pitumpo boy lowa, ay hadayay higla la. “Panginoon,” wanla, “hila man ya nangarawak ya a angkahēlēk ay nag-alih gawan ha kapangyarihan mo hēn impaplag naêñ hila.”

¹⁸ Hinabi ni Apo Jesus kanla, “Nahēlēk ko hi Satanas ya innabo ubat ha langit, ya nanad ha kagalingan hēn kimat. ¹⁹ Dinyanan kataw hēn kapangyarihan hēn torakan ya kapatsi tamo, ya hilan Satanas. Hila ay nanad utan haka mahlay ya konipit ya makamatsi, noa, a kaw mahakitan, torakan yo hila man. ²⁰ Embayro man, ay paan kaw humigla, gawan hikaw ay namaalih hēn nangarawak ya a angkahēlēk. Noa, dapat humigla kaw, gawan nakahulat ha langit ya langan yo, ya labay habiēn ya nag biyay kaw na hēn ayn angga kalamo ni Apo Namalyari.”

Pinuri ni Apo Jesus hi Apo Namalyari

(Mateo 11:25-27; 13:16-17)

²¹ Hēn habayto, ay pinahigla hi Apo Jesus hēn Espiritu ni Apo Namalyari. Nanalangin ya hēn êmēn di, “Tatang ko ha langit, ampahalamatan kata, ya ampamaala ha langit haka luta, gawan impamwang mo ya tungkol kangko kanlan maaypa ya nakêm, ya a mo impamwang kanlan matagay ya pinag-aralan, ya matag-ay ya nakêm. Awo, Tatang, ta habaytoy kalabayan mo.”

²² Bayo wani ni Apo Jesus kanlan kal-atan, “Inubuh nan impamwang kangko hēn Tatang ko, hi

Apo Namalyari ya tungkol kana. Ayn taganán makakilala kangko, ya Anak na, no alwan hiyan bêngat ya Tatang ko. Ayn êt taganá hên makakilala kanan Tatang ko, no alwan hikon bêngat, ya Anak na, haka hilay pilién ko hên makakilala kana.”

²³ Amêhêñ, hinabi ni Apo Jesus kanlan tagahonol nan bêngat, ya wana, “Iningalwan kaw, gawan angkakit yo ya dyag ko. ²⁴ Hêñ hato, ay mal-at ya mampamwang hên an-ipaihip kanla ni Apo Namalyari, haka main ari ya labay dayi hên makahêlêk hên angkakit yo. Labay la dayin magilaman ya angkagilaman yo. Noa, a la nahêlêk ya angkakit yo. A la êt nagilam ya angkagilaman yo.”

Ya alimbawa ya tungkol ha lalaki ya tagaprobinsyan Samaria ya nakaingalo

²⁵ Minghan, main móñoron Kautuhan ni apo Moises ya nirêng, ta tuksoën na dayi hi Apo Jesus, ya wana, “Máñoro, hino ya daygên ko ta êmêñ ako madyanan hên biyay ya ayn angga?” ²⁶ Kabay nangotang hi Apo Jesus kana, “Hinoy nakahulat ha Kautuhan ni Apo Namalyari? Hinoy angabáha mo bayro?” ²⁷ Amêhêñ, hinabi nan lalaki, ya wana, “Dapat lugurên tamo hi Apo Namalyari, ya Panginoon hên boon nakêm, boon ihip, haka boon hêkaw. Dapat tamo etaman hên lugurên ya kapareho tamo hên nanad pamanlugud tamo ha lawini tamo.” ²⁸ “Pêtêg ya hinabi mo,” wani Apo Jesus. “No daygên mo ya habain, ay madyanan kan biyay ya ayn angga.”

²⁹ Nangotang yay na êt kan Apo Jesus ya hatá móñoron Kautuhan, gawan a na labay hên mipakarêng-êy ya, ya wana, “Hinoy kapareho ko?”

³⁰ Kabay hinabi ni Apo Jesus, “Minghan main lalaki ya anlumohan ubat ha balayan Jerusalem palako ha balayan Jerico. Tinambangan la ya hēn nangarawak ya lalaki. Kingwa lay takop na. Pinakatumbuk la ya êt. Bayo imbalag la ya hēn pērad tanan natsi. ³¹ Amêhēn, ay main pari tamon taga-probinsyan Judea, ya nagdann bayro. Hēn nakit nay hatoy pērad tanan matsi, ay nagtugigih ya. ³² Embayro êt ya dinyag hēn mihay Levita, ya kapareho tamon taga-probinsyan Judea ya nagdann bayro, ay nagtugigih ya êt. ³³ Noa, main mihay taga-probinsyan Samaria, ya nagdann bayro. Nahēn nahêlêk nay lalaki ya tinambangan, ay naingalwan na ya. ³⁴ Nilako nay tinambangan, ta tinambalan nan alak haka laro ya manihugat-hugat na, bayo kinêlkêlan nay habayto. Inhakay na ya ha anhakyan na, hēn palako ha mihay bali ya pagdahêlan ya pan-upaan. Hinayhay na ya bayro. ³⁵ Nahēn nagwatah, ay nam-i yan pera kanan hata nag bali, ta wana, ‘Hayhayēn mo ya. No kulang ya hata an-ibalag ko, ay bayaran ko tana ya kulang ha pag-orong ko di.’” ³⁶ Amêhēn, hinabi ni Apo Jesus ha mónoron Kautuhan ni apo Moises, ya wana, “Kanlan hatoy tatlo ya nagdann bayro ha lalaki ya tinambangan, ay hinoy main pamikipatêl ha kapareho na?” ³⁷ “Hatoy nakaingalo kana,” wanán mónoron Kautuhan ni apo Moises. Kabay wani Apo Jesus, “Mita kay na, ta êmbayro êt ya daygêñ mo.”

Hiniraw ni Apo Jesus hilay mitataali, ya hi Marta haka hi Maria

³⁸ Inhundo ni Apo Jesus haka hilay tagahonol na ya pammita la. Nilumatêng hila ha balayan ya main babayi ya nag langan Marta ya nanagyat kanlan Apo Jesus ha bali na, ta mangan. ³⁹ Main yan ali hi Marta hên mihay babayi ya nag langan Maria, ya nikno ha danin bitsih ni Apo Jesus hên ampanggilam toro na. ⁴⁰ Noa, nampotog ya hi Marta ta mal-at ya an-iluto na hên mimiha na. Kabay hinabi na kan Apo Jesus, ya wana, “Panginoon, a mo angkadambi ya pinaulayan na kon ali ko hên manluto hên mimiha ko? Iutoh mo ya dayi hên hawpan na ko.” ⁴¹ “Marta, anak ko, mampotog ka ha kal-atan dyag. ⁴² Mihan bêngat ya kailangan. Pinili ni Maria ya mangêd, ta panggilamên nay panoro ko. Ayn mamawal kana.”

11

Ya panoro ni Apo Jesus ya tungkol ha Panalangin
(Mateo 6:9-13; 7:7-11)

¹ Minghan nanalangin ya hi Apo Jesus ha mihay logal. Pangayari na, ay hinabi kana hên mihay tagahonol na, ya wana, “Panginoon, toroan mo kay dayi hên manalangin hên nanad panoro ni Juan Bautista ha tagahonol na.” ² Hinabi ni Apo Jesus, “No manalangin kaw, ay êmên di ya habiên yo:

“Tatang, puriên ka dayi hên balang miha.

Dayi lumatêng ya pamanlokop mo.

³ Dyanan mo kay dayi hên kaêñ ya kailangan naêñ amêhêñ.

⁴ Patawarêñ mo kay dayi ha kasalanan naêñ ta ampatawarêñ naêñ etaman ya kaganawan ya nakadyag kasalanan kannaêñ.

Paan mo kay paulayan hêñ matukso.’ ”

⁵ Hinabi nay na êt ni Apo Jesus kanlan tagahonol na, ya wana, “Waringan, ya miha kamoyu ay lumatêng ha balin kaluguran na hêñ bonak yabi, ta habiêñ na ya êmêñ di, ‘Kalalaki, dyanan mo ko pon hêñ maêkan. ⁶ Nilumatêng ya kaatag ya kaluguran ko ya nagdann di, ya ubat ha marayo, noa, ayn akon maipakan kana.’ ⁷ Embayro man, ay hinabi nan kaluguran na ha lalêñ bali na, ya wana, ‘A mo kon abalaêñ. Nakakabat ya ilwangan, ta angkabêlêw kay, anggan maának ko. A ko kaimata hêñ mam-in kailangan mo.’

⁸ “Anhabiêñ ko kamoyu ya no a ya dayi mimata gawan ha pamilulugud la, ay mimata ya gawan pamalêkpêk hêñ hata kaluguran na, bayo idin nay kailangan hêñ kaluguran na. ⁹ Kabay wangko kamoyu, pakapakikwaan yoy kailangan yo kan Apo Namalyari, ta dyanan na kaw. Pakatapolên yo ya kailangan yo kana, ta hawpan na kaw. Pakabaêgêñ yo ya, ta gilamêñ na kaw hêñ nanad ha kabat ya loatêñ. ¹⁰ Daygêñ yoy habayto, ta hilay ampakikwa ay dyanan. Hilay ampanapol hêñ kailangan la kana ay makatapol. Hilay ampamaêg ay gilamêñ hêñ nanad ha kabat ya loatêñ. ¹¹ Ayn miha man kamoyu ya mam-in nabiay yan utan ya makamatsi ha anak yo, no kikwa yan kêñan lanêñ. ¹² Ayn etaman mam-in mahlay ya konipit ha anak na, no kikwa yan poga. ¹³ Makasalanan kaw man, ay kamwang kaw hêñ mam-in ikakangêd

ha maának yo. Hi Apo Namalyari pon kaya, ya Tatang tamo ha langit, ya ayn kasalanan, ay yarin a ya mamahapat hên Espiritu na kanlan balang kikwan habayto kana!"

*Ya kapangyarihan ni Apo Jesus ay ubat kan Apo Namalyari, alwan ubat kan Satanas
(Mateo 12:22-30; Marcos 3:20-27)*

¹⁴ Minghan impaplag ni Apo Jesus ya mihay narawak ya a angkahêlêk ya hinumapat, hên nammaomêl ha mihay lalaki. Hêñ inumalih yay na, ay ampakahabi yay nay omêl. Nag-êpapah hilay kaltan ya atsi bayro. ¹⁵ Noa, panhabiên lan kaatag, ya pamaalih ni Apo Jesus hên nangarawak ya a angkahêlêk, ay ha kapangyarihan ni Satanas,* ya poon lan nangarawak ya a angkahêlêk. ¹⁶ Hilay kaatag etaman, ay labay la yan subukên, kabay hinabi la kana ya mamipahlêk yan palatandaan, ya ubat ha langit, ta êmén la mamwangan no pêtêg hên atsi kana ya kapangyarihan ni Apo Namalyari. ¹⁷ Muwang ni Apo Jesus ya laman ihip la, ya êndat la no ubat kan Satanas ya kapangyarihan na. Kabay hinabi na, "No alimbawa ta mipapatsi ya angkalokopan hên mihay bansa, ay mahira ya habayto. Êmbayro êt ya malyari ha mipapamília ya mipapatsi. ¹⁸ No mipapatsi hilay angkalokopan ni Satanas, ay mahira bayto ya pamanlokop na. Panhabiên yo ya ampamaalih akon nangarawak ya a angkahêlêk ha kapangyarihan ni Satanas. ¹⁹ No êmbayro awud, ay anto baytoy ubatan kapangyarihan hên kalamo yo, ya ampamaalih hên

* **11:15** Beelzebul ha habin Griego.

nangarawak ya a angkahêlêk? Hila êt ya ampamaptêg hên mali kaw. ²⁰ Ha kapangyarihan ni Apo Namalyari ya pamaalíh ko hên nangarawak ya a angkahêlêk. Ya labay habiên hên habayto, ay atsi kamoyu ya pamanlokop ni Apo Namalyari.

²¹ “No main mihay makhaw, ya mal-at ya almas, ya ampamantay ha bali na, ay a makwa ya hinon atsi kana. ²² Noa, no main lumatêng ya makhaw êt kana, ay hambutêna ya, ta kowêna ya almas ya an-asaan na, haka ya kaganawan ya atsi kana, ta iatag-atag na.

²³ “Hilay ayn pon ha lokop ko, ay kapatsi ko. Haka hilay a ampanawop hên manipon hên tawo ta êmêna hila makilamo kangko, ay ampamidayo hên tawo kangko.

*Ya pamag-orong nan narawak ya a angkahêlêk
(Mateo 12:43-45)*

²⁴ “No umалиh ha mihay tawo ya narawak ya a angkahêlêk, ya hinumapat kana, ay tawaktawakén nay namala ya luta, ta manapol yan mapagpatékbékan na. Noa, ayn yan matapol. Kabay wana ha nakêm na, ‘Mag-orong ko ha tawo ya ubatan ko.’ ²⁵ Pag-orong na, ay malatêng nay ubatan na, ya ayn êt napahili kana, malinis, haka nakakumpini, ya nakal-an hên togêlan. ²⁶ Kabay managyat yan pitoy kapareho nan a angkahêlêk, ya narawak êt kana, ta paglamo na bayro. Haka humwén hila, kabay lalo yay nan kaingalo ya hatoy tawoy inorongan na.”

Ya mantêg iningalwan

²⁷ Kaban ampaghabi ya pon hi Apo Jesus, ay main mihay babayi bayro ha kal-atan, ya naghabi

hêñ makhaw kan Apo Jesus, “Iningalwan ya nami-anak haka namahoho kamo.” ²⁸ Noa, hinabi ni Apo Jesus kana ya êmén di, “Lalo hêñ an-ingalwan ya ampanggilam haka anhumonol ha habi ni Apo Namalyari.”

*Ya toro ni Apo Jesus tungkol kanlan ampanapol
hêñ palatandaan ya ubat ha langit
(Mateo 12:38-42)*

²⁹ Kaban ampi-tsi-tsipon hilay kal-atan ha dani ni Apo Jesus, ay inhundo nay pamaghabi na, ya wana, “Bapan dawak hilay tawo amêhêñ. Ampanapol hilan kapapaêpapah ya palatandaan ya ubat ha langit. Noa, ayn ipahlêk kanla, no alwan nanad ha naipahlêk hêñ hato, ya kapapaêpapah ya nalyari kan Propeta Jonas.[†] ³⁰ No ay-êmén yan nag-in palatandaan kanlan taga-balayan Ninive, hi Propeta Jonas, ay êmén êt bayro hiko, ya Taga-Langit, ya In-anak Tawo, ay mag-in palatandaan kanlan tawo amêhêñ. ³¹ Ha Allon Pamanukom ni Apo Namalyari, ay mirêng ya Reyna hêñ Sheba hêñ hato hêñ habyanan na kaw. Mipakarêng-êy kaw, ta agyan hadayay dayo na, ay nilako na hi Arin Solomon, ta labay nan gilamén ya toro na. Amêhêñ, ay main di ya matag-ay ya tungkulon kan Arin Solomon, noa, a kaw ampanggilam. ³² Ha Allon Pamanukom ni Apo Namalyari, ay mirêng hilay taga-Ninive, ya nipaghêhêñ pamanyag lan kasalanan, hêñ haton nagilam lay toro ni Propeta Jonas, ta habyanan la kaw, gawan main di ya matag-ay ya tungkulon kan Propeta Jonas, yan

[†] **11:29** No ay-êmén hi Propeta Jonas ha tatloy allo haka tatloy yabi, ha bitokan kahlayan pating.

Lucas 11:33

lxx

Lucas 11:39

a kaw naghêhêñ nanalibokot ha pamanyag yon kasalanan.”

Nangalimbawa hi Apo Jesus hêñ tungkol ha hawang

(Mateo 5:15; 6:22-23)

³³ Hinabi nay na êt ni Apo Jesus, ya wana, “Ayn mamagkêt hêñ atâng, bayo ihinêp o itagpêñ. Noa, ya atâng ay idin ha mantêg hêñ pamyanan atâng, ta êmêñ mahawangan ya danan lan anhumwêñ.

³⁴ Ya mata yo ay nanad pag-atâng yo. No nahawang ya mata yo, ay mahawangan êt ya nakêm yo. Noa, no napukakê ya angkahêlêk yo, ay nanad nariglêm êt ya nakêm yo. ³⁵ Kabay kaillag kaw, ta kayno ya êndat yon hawang, ya atsi kamoyu, ay kariglêman awud. ³⁶ No nahawangan ni Apo Namalyari ya nakêm yo, ta ayn man pêrad ya kariglêman bahêñ, ay hadyay hawang ya biyay yo, ya nanad angkahawangan hêñ hadyay hawang ya atâng.”

Hilay Pariseo haka hilay mánoron Kautuhan ni apo Moises ay hinabyanan ni Apo Jesus

(Mateo 23:1-36; Marcos 12:38-40)

³⁷ Hêñ nayari yay nan nanoro hi Apo Jesus, ay main Pariseo ya nanagyat kana hêñ mangan. Kabay nakilako ya, haka inarap nay kaêñ. ³⁸ Nag-êpapah ya habaytoy Pariseo hêñ napansin na, ya a ya pon nag-uyah gamêt na hi Apo Jesus, bayo ya nangan.[‡] ³⁹ Kabay wani Apo Jesus kana, “Hikaw ya Pariseo, ay maialimbawa ha mihay ampan-guyah bat hêñ bulin baso haka bokot pinggan, ya

[‡] **11:38** Gawan kanlan Israelita, ay bawal mangan no a pon nag-uyah hêñ pahonol ha paniwala la.

a ampanguyah hēn mantēg dêmêk. Ta ampan-guyah kaw hēn gamêt yo, noa, ampaulayan yoy nakêm yo, ya hadyay kahibaan haka karawakan. **40** Mulala kaw lawêh! Ya nanyag hēn lawini, ay hiya êt ya nanyag hēn nakêm. **41** Noa, idin yo dayi kanlan ayn maêkan ya laman hēn pinggan yo, ta habaytoy mamalinis hēn kabooan hēn atsi kamoyu.

42 “Kaingalo kaw ya Pariseo! Mangêd ya an-idin yo kan Apo Namalyari ya ikamapo hēn bulong ya pan-ihabug yo ha habaw yo, noa, angkapaulayan yoy maalagá, ya katoynungan haka ya paman-lugud yo kan Apo Namalyari. Dapat yon idin kana ya ikamapo, noa, paan yon paulayan ya katoynungan haka ya pamanlugud yo kana.

43 “Kaingalo kaw ya Pariseo! Ta labay yoy pinakamangêd ya iknoan ha sinagoga,§ haka labay yon galangên la kaw ha balayan. **44** Kaingalo kaw ya Pariseo! Maialimbawa kaw ha pinangilbêngan ya bawal hēn torakan ya ayn palatandaan, ya angkatorakan tawo gawan a la muwang. Ha hêlêk lan tawo ay mangêd kaw, yan antoroan yo hila hēn manyag kasalanan hēn a la muwang.”

45 Amêhêñ, hinabi nan mihay mánoron Kautuhan ni apo Moises kana, ya wana, “Mánoro, ha hinabi mo, ay angkahugatan kay etaman.”

46 Kabay hinabi ni Apo Jesus, “Kaingalo kaw etaman, ya mánoron Kautuhan ni apo Moises, ta

§ **11:43** Ya pinakamahlay ya pagsimbaan lan Israelita ay ha Jerusalem, noa, main nanaway pagsimbaan ya nag langan sina-goga ha balang balayan ya nag mapoy Israelita ya nag ahawa.

hadyay bêyat ya an-ipadyag yo kanlan kaatag, noa, pêrad man, ay a kaw ampanawop kanla.

⁴⁷ Kaingalo kaw, ta ampamadyag kaw hên pantson lan propeta ni Apo Namalyari ya pinatsi lan ninuno yo. ⁴⁸ Ya panyag yon habayto, ay pamaptêg ya an-umuyon kaw ha dinyag lan ninuno yo. Pinatsi lay propeta ni Apo Namalyari, bayo ampamadyag kaw pon êt hên pantson lan pinatsi la. ⁴⁹ Gawan êmbayro, ay hinabi nan kamwangan ni Apo Namalyari, ‘Iutoh ko kanla hilay mâmipamwang hên an-ipaihip ko kanla haka hilay apostol. Ya kaatag ay patsên la. Ya kaatag êt ay pairapan la.’ ⁵⁰ Kabay tanggapêñ lan tawo amêhêñ ya parusa, gawan ha pangamatsi lan habaytoy mâmipamwang, paubat hên dinyag nay hata luta angga amêhêñ. ⁵¹ Mal-at ya pinatsi paubat hên pinatsi hi Abel, angga ha pinatsi hi Zacarias, ya pinatsi ha pilatan hên pamiulaman hên an-iátang kan Apo Namalyari haka ya Templo. Anhabiên ko kamoyu, parusaan ya tawo amêhêñ, gawan ha pangamatsi lan habayto.

⁵² “Kaingalo kaw ya mónoron Kautuhan ni apo Moises! Inalíh yoy susi hên kabat ha balin nag kamwangan tungkol ha kalabayan ni Apo Namalyari. A kaw anhumwên, bayo ambawalêñ yo êt hilay labay humwên.”

⁵³ Hêñ nayari yan naghabi, ay nimitay na hi Apo Jesus bayro ha bali. Paubat hên habayto, ay minusmus la ya hêñ Pariseo haka mónoron Kautuhan ni apo Moises. Mal-at ya an-ikotang la kana ta ⁵⁴ inimatongan la ya, ta êmêñ la yan madakêp ha pamaghabi na.

12

*Kaillag kaw kanlan magbabara
(Mateo 10:26-27)*

¹ Hêñ hato, libo-liboy ni-tsi-tsipon angga ha nangapitotorak hilan bitsih. Naghabi ya pon hi Apo Jesus kanlan tagahonol na, ya wana, “Kaillag kaw ha pampaalsa lan Pariseo, ya pagbabara lan anhumonol hila kan Apo Namalyari. ² Ayn intago ya a mamwangan haka mihungbung. ³ Ya hinabi yo ha nariglêm, ay magilaman ha nahawang. Ya inanah yo ha bali yo, ay miangaw.”

*No hino ya dapat kalimwan
(Mateo 10:28-31)*

⁴ “Anhabién ko kamoyun kaluguran ko, paan yon kalimwan ya labay mamatsin lawini yo, ta lawini yon bêngat ya mapatsi la. A la man magêtan ha impiyerno ya kaêlwa yo. ⁵ Anhabién ko kamoyu no hino ya dapat yon kalimwan. Kalimwan yo hi Apo Namalyari, ta panga-ubat nan mangwan biyay, ay main ya êt hêñ kapangyarihan hêñ mamilapon kaêlwa yo ha apoy ya taganán a mparê ha impiyerno. Awo. Habién ko kamoyu, hiya ya kalimwan yo, alwan kaatag.

⁶ “Noa, hadyay lugud ni Apo Namalyari, ta agyan hilay nanaway manok lalê, ay a na am-paulayan. ⁷ Agyan habot ulo yo, ay muwang nay bilang. Kabay paan kaw malimo. A na kaw paulayan, ta maalagá kaw kanlan mal-at ya manok lalê.”

*Dapat tamon ipamwang ya paniwala tamo kan Apo Jesus
(Mateo 10:32-33; 12:32; 10:19-20)*

⁸ Hinabi nay na êt ni Apo Jesus, “Hilay alwan marêng-êy hên mamaptêg ha arapan hên kal-atan ya hila ay ampaniwala kangko, ya Taga-Langit, ya In-anak Tawo, ay a ko etaman ikarêng-êy ha arapan lan anghel ni Apo Namalyari. ⁹ Noa, hilay ampaghabi ha arapan hên kal-atan, ya a hila ampaniwala kangko, ay habiên ko etaman lano ha arapan lan anghel ni Apo Namalyari, ya a ko hila muwang.

¹⁰ “Hilay maghabi hên pamanira kangko, ya Taga-Langit, ya In-anak Tawo, ay mapatawad. Noa, hilay maghabi hên pamaniran Espiritu ni Apo Namalyari, ay a mapatawad.

¹¹ “Idikil la kaw ha sinagoga haka la kaw gêtan kanlan kaatag ya manungkulan, ta kotangên la kaw, noa, paan kaw manyagah no hinoy pakibat yo, ¹² ta habayto êt ay mamitoro kamoyu ya Espiritu ni Apo Namalyari no hinoy habiên yo.”

Ya ayn minúwang ya mabandi

¹³ Amêhêñ, ya miha kanlan kal-atan, ay naghabi kan Apo Jesus, ya wana, “Mánoro, iutoh mo ha kaka ko ya atagan na ko ha mana naêñ ha tatang naêñ.” ¹⁴ Wani Apo Jesus kana, “Pata kotangên mo kangkoy habain? Alwan tungkulan ko hên manlingon ha pamiatag hên mana yo.” ¹⁵ Bayo wana kanlan kal-atan, “Illagan yoy nakêm yo ha kaganawan karidyaan, ta ya biyay ay a angkakwa ha mal-at ya pibadian.” ¹⁶ Amêhêñ, in-alimbawa ni Apo Jesus hên êmêñ di, ya wana, “Ya mihay mabandi ay nakagapah hên hadyay lakê ha luta na. ¹⁷ Amêhêñ, nangihip ya hata mabandi no hino ya daygêñ na, ta kulang ya pamyanan na

hêñ nagapah na. ¹⁸ Naihipan na ya agwatêñ nay pamyanan na hêñ nagapah na, ta manyag yan bayo, ya mahlay, ya pamyanan nan kaganawan pibandian na. ¹⁹ Ta atsi ha ihip na, no manyag yan habayto, ay mahabi na ha nakêm na ya pamamatuloy na tana, mangan, minêm, haka mag-pakahigla, ta a yay na maalihan hêñ hinon maêkan ha mal-at ya taon. ²⁰ Noa, wani Apo Namalyari kana, ‘Mulala ka! Amêhêñ yabi, ay maalihan kan biyay. Kabay a mina mapakinabangnan ya imbunton mo ya para kamon bêngat.’” ²¹ Hêñ nayari ni Apo Jesus ya habaytoy alimbawa na, ay wana, “Êmbayroy malyari kanlan ampaybunton hêñ pibandian, noa, ampagkulang hila ha arapan ni Apo Namalyari.”

*Ya paniwala kan Apo Namalyari
(Mateo 6:25-34)*

²² Bayo hinabi ni Apo Jesus kanlan tagahonol na, ya wana, “Paan kaw manyagah, no hinoy maêkan yo, ta êmêñ kaw mabiyay. Paan kaw êt manyagah no hinoy maitakop yo. ²³ Gawan ya biyay ay maalagá ha kaêñ, haka ya lawini ay maalagá ha takop. ²⁴ Hêlkêñ yoy manok lalê. A hila ampananêm o ampanggapah man, haka ayn hilan pamyanan hêñ nagapah la. Êmbayro man, ay ampananêñ hila ni Apo Namalyari. Taganán maalagá kaw kanlan manok lalê, kabay a na kaw paulayan! ²⁵ Manyagah kaw man, ay a yo mapakarang ya biyay yo! ²⁶ No pêrad man, ay a yo mapakarang ya biyay yo ha kayagahan yo, ay mata manyagah kaw hêñ tungkol ha hinoman! ²⁷ Awta manyagah kaw no hinoy itakop yo! Ihipêñ yo

tanay pamantumubo hēn bulaklak. A hila ampagobra o ampanayi man hēn takop la. Agyan hi Arin Solomon, ha kal-atan bandi na, ay a ya nakapagtakop hēn nanad kahampatan hēn mihay bulaklak. ²⁸ No ya lamon, ya angkabiyyay pon amêhēn, bayo ulamēn pangawatah, ay ampahampatēn ni Apo Namalyari, yarin a na kaw dyanan takop! Kulang awud ya paniwala yo kana. ²⁹ Kabay paan kaw manyagah ha panapol yon maêkan haka mainêm yo. ³⁰ Ta hilay a ampagpalokop kan Apo Namalyari, ay panay hēn ampanyagah no hinoy maêkan haka mainêm la. Noa, hikaw ay paan yo hilan totoêñ, ta muwang ni Apo Namalyari ya Tatang tamo ya kailangan yoy habayto. ³¹ Kabay unaêñ yoy pagpalokop yo kan Apo Namalyari, ta idin na ya kaganawan kailangan yo.”

Ya toro ni Apo Jesus ya tungkol ha pibandian ha langit

(Mateo 6:19-21)

³² Amêhêñ, hinabi nay na êt ni Apo Jesus kanlan tagahonol na, ya wana, “Paan kaw malimo agyan pêpêrad kaw, ta mahigla hi Apo Namalyari, ya Tatang yo hēn ilamo na kaw ha pamanlokop na. ³³ Ihaliw yoy pibandian yo, ta mam-i kaw kanlan ampangailangan. Ya mangêd ay manipon kaw hēn pibandian ha langit, ta ha êmbayro, ay nanad kaw hēn main pamyanan pera ya a mahira, haka a maалиhan laman. Ta habaytoy pibandian ay a maplak, haka a êt mahira hēn anag. ³⁴ Dapat yon daygêñ ya habayto, ta no anto ya pibandian yo, ay atsi êt bayro ya nakêm yo.”

Ya mihay mangêd ya ipoh ay panay nakal-an

³⁵ Hinabi nay na êt ni Apo Jesus, ya wana, “Dapat panay kaw hên nakal-an, hên nanad ha mihay mangêd ya ipoh ya panay nag dêkêt ya solo, ta êmên kaw ³⁶ mag-in nanad kanlan panay nakal-an hên tampol manloat danan hên amo la uston mamaêg ya, pamanlumatêng nan ubat ha kasálan. ³⁷ Hadyay higla lan ipoh, no malatêng hilan amo la hên nakal-an. Paiknoêñ hilan amo la, ta hiyay mamiapag kaêñ la. ³⁸ Hadyay higla lan ipoh no malatêng na hilan nakal-an, pammuli na hên bonak yabi o maranon man. ³⁹ Pakaihipêñ yoy hatsi, no muwang na dayi hên nag bali no hinon oras hên lumatêng ya manakaw, ay a na ya paulayan hên mahowêñ ya bali na. ⁴⁰ Hikaw man, ay kailangan nakal-an kaw, ta hiko ya Taga-Langit, ya In-anak Tawo, ay biglan lumatêng.”

*Ya mihay ipoh ay dapat mapaypaniwal-an
(Mateo 24:45-51)*

⁴¹ Amêhêñ, wani Pedro, “Panginoon, hinabi moy hatoy alimbawa para bêngat kannaêñ hên labin-loway tagahonol mo o para ha kal-atan?” ⁴² Kabay wani Apo Jesus, “Ya ipoh ya mapaypaniwal-an haka magaling, ay hiya ya dyanan tungkulon no main yan lakwêñ ya amo na. Hiya ya manalan bali na, haka mamiarasyon hên iluto lan kapareho nan ipoh, hên allo-allo. ⁴³ Hadyay higla hên ipoh, no malatêng na yan amo na hên ampanyag kalabayan na ha pag-orong na. ⁴⁴ Pakagilamêñ yo, dyanan na yan tungkulon hên amo na hên manalan hên hinon pibandian na. ⁴⁵ Noa, no ihipêñ nan hatoy ipoh ya mabuyot pon lumatêng ya amo na, bayo umpisaan nan pakatumbukêñ

ya kapareho nan ipoh, ya lalaki haka babayi, ta mangan ya tana haka maglahing êt,⁴⁶ ay no biglan lumatêng ya amo nan hatoy ipoh, ay parusaan nay ipoh na hên hadyay bêyat, bayo ilamo na ya kanlan a ampaniwala, bayro ha parusa ya ayn angga.

⁴⁷ “Ya ipoh ya ampakamwang kalabayan hên amo na, noa, a ya nakal-an hên honolên ya habayto, ay parusaan ya hên mabyat ya parusa. ⁴⁸ Noa, ya ipoh ya a ampakamwang no hinoy panibawal hên amo na, ya nakadyag hên bawal ya dapat pamarusaan kana, ay parusaan hên alwan mabyat. Hilay dinyanan ni Apo Namalyari hên mal-at, ay mal-at etaman ya tapolên kanla. Hilay pinatsiwal-an hên mal-at, ay panapolan êt hên mal-at.”

*Main pamigagampi gawan main maniwala kan
Apo Jesus haka main a maniwala*
(Mateo 10:34-36)

⁴⁹ Wanay na êt ni Apo Jesus, “Atsi ko di ha luta hên ampantan hên nanad apoy ya pamana tol ni Apo Namalyari. Dayi napagkêtan ana ya habayto. ⁵⁰ Noa, hadyay bêyat ya kailangan kon danan pon. Habayto ya ampamagulon ihip ko angga ha a ya pon matupad. ⁵¹ Paan yon ihipên ya nantan akon pamikiúmang ha miha ta miha, ta hikoy pangubatan hên pamigagampi, gawan main maniwala kangko, haka main a maniwala. ⁵² Paubat amêhêñ, no alimbawa ta main limay katawo ha mihay pamilya, ay alwan parehoy ihip la, ta ya tatlo ay mihay ihip kanlan lowa. ⁵³ Ta hilay ampaniwala haka hilay a ampaniwala, ay alwan parehoy ihip. Ya tatang ay mihay ihip ha

anak nay lalaki. Ya indo ay mihay ihip ha anak nay babayi. Ya ampo ya babayi ay mihay ihip ha manuyang nay babayi.”

Dapat maintindihan ya labay habiēn hēn angkalyari amêhēn panaon
(Mateo 16:2-3)

⁵⁴ Wanay na êt ni Apo Jesus kanlan kal-atan, “No mahélék yo ya naborêg ha dapit kanaboan allo, ay habiēn yo, ‘Manguran ya.’ Ay manguran ya bay. ⁵⁵ No angkapansin yoy angin ya ubat ha kabalah-balahan, ay habiēn yo, ‘Mag-in hadyay omot amêhēn.’ Ay mag-in hadyay omot bay. ⁵⁶ Ampagbabara kaw! Muwang yo no hinoy labay habiēn hēn angkakyari amêhēn panaon!”

Dapat makiúmang ha kapatsiyo
(Mateo 5:25-26)

⁵⁷ Wana êt ni Apo Jesus, “Pata a kaw manimbángan no hinoy hépat? ⁵⁸ No main mamidikil kamoyu, ta gêtan la kaw ha mánlingon kaso, ay mangêd ya makikatoynungan kaw pon kanla ha dann, ta êmén a la kaw na gêtan ha mánlingon kaso. Ta kayno idin na kaw ha magbantay hēn hukulan, ta ikulung kaw. ⁵⁹ Kabay bayro kaw tana ha hukulan angga ha a yo mabayaran ya kaganawan ya ipabayad la kamoyu.”

13

Dapat paghêhêan ya kasalanan

¹ Hêñ habayto, kaban ampaghabi ya pon hi Apo Jesus, ay nilumatêng ya ungnoy namihumbung kana, ya wanla, “Impapatsi ni Gobernador Pilato ya ungnoy taga-probinsyan Galilea kaban ampangátang hila hêñ ampakikwan patawad kan Apo Namalyari.” ² Hinabi ni Apo Jesus kanla, ya wana, “Êndat yo no mabyat ya kasalanan lan hata taga-Galilea kanlan kasalanan lan kaatag ya taga-Galilea, gawan êmbayro ya nalyari kanla? ³ Alwa! Noa, anhabiên ko kamoyu, no a yo paghêhêan hêñ talibatokan ya pamanyag yon kasalanan, ay matsi kaw ngan etaman. ⁴ Ihipêñ yo hilay labinwalo ya natsi hêñ natumba ya tawer ha Siloe. Êndat yo no mabyat ya kasalanan la kanlan kasalanan lan kaatag ya ampaidi ha balayan Jerusalem? ⁵ Alwa! Noa, anhabiên ko kamoyu, no a yo paghêhêan hêñ talibatokan ya pamanyag yon kasalanan, ay matsi kaw ngan etaman.”

Ya alimbawa tungkol ha poon kayo ya nag langan igos

⁶ Amêhêñ, nam-i yan alimbawa hi Apo Jesus, ya wana, “Main mihay lalaki ya nag poon kayoy igos ha pananêman nan ubas. Minghan nanapol yan tagêy hêñ hatoy igos, noa, ayn. ⁷ Kabay hinabi na ha ampanayhay hêñ tanaman na, ya wana, ‘Tatloy nay taon hêñ ampanapol akon tagêy hêñ hata igos, noa, ayn. Potohêñ mina, ta bêngat ya tanan angkahayang ya luta.’ ⁸ Noa, hinabi nan ampanayhay hêñ tanaman, ya wana, ‘Apo, paulayan mo ya pon hata taon, ta gambolêñ koy poon na, ta dyanan ko yan abono. ⁹ No managêy

ya ha taon, ay mangêd. No a ya êt managêy, ay ipapotoh mina bayto kangko.’ ”

Namaalih hi Apo Jesus hên hakit hên mihay babayi ya nakuba

¹⁰ Mihay allon pamagsimba, ay ampanoro ya hi Apo Jesus ha miha kanlan sinagoga. ¹¹ Main babayi bayro ya hinapatan hên namakuba kana, hên labinwaloy taon ana. A nay nan maitoy-nung ya bokot na. ¹² Hên nahêlêk na ya ni Apo Jesus, ay wana ha babayi, “Ayn kay nan hakit!” ¹³ Impalunto nay gamêt na ha nakuba, kabay tambêng yan tinumoynung ya bokot na, bayo pinuri na hi Apo Namalyari. ¹⁴ Noa, nanuluk ya main tungkulon ha sinagoga, gawan allon pamagsimba, hên namaalih hi Apo Jesus hên hakit nan nakuba. Kabay wana kanlan kal-atan, “Main anêm ya allo ya nakal-an ha pamag-obra. Kabay dapat ipaalih yoy hakit yo ha miha kanlan habaytoy anêm ya allo, alwa ha allon pamagsimba.” ¹⁵ Kabay wani Apo Jesus kanla, “Hikaw ya ampagbabara! No main kaw hên baka o asno ya nakah-êl, ay yarin a yo yan okalên ta êmên ya kainêm, ha allo man hên pamagsimba! ¹⁶ Hata babayi, ya mihay kaapo-apoan ni apo Abraham, ay atsi ha aypan kapangyarihan ni Satanas hên main nanan labinwaloy taon, kabay kailangan yan okalên, agyan allo hên pamagsimba.” ¹⁷ Hên nahabi nay habayto, ay nipakarêng-êy hilay an-humalanghang kana. Noa, hilay kaatag bayro ay nipaghigla ha mangangêd ya kapapaêpapah ya dinyag na.

Ya pamanlokop ni Apo Namalyari ay in-alimbawa ni Apo Jesus ha pamantumubo hên mihay nanaway but-o

(Mateo 13:31-32; Marcos 4:30-32)

¹⁸ Amêhêñ, inhundo ni Apo Jesus ya panoro na, ya wana, “Nanad hino kaya ya pamanlokop ni Apo Namalyari? Hino kaya ya pangialimbawaan ko hên pamanlokop na? ¹⁹ Ya pamanlokop ni Apo Namalyari ay maialimbawa ha pamantumubo hên mihay nanaway but-o ya intanêm. Iibon man ya but-o, ay hinumlay yan nag-in kayo, kabay nipanyag halay ya manok-lalê ha hanga na.”

In-alimbawa ni Apo Jesus ya pamanlokop ni Apo Namalyari ha pampaalsa

(Mateo 13:33)

²⁰ Hinabi nay na êt ni Apo Jesus, ya wana, “Hinoy pangialimbawaan ko hên pamanlokop ni Apo Namalyari? ²¹ Ya pamanlokop ni Apo Namalyari ay maialimbawa ha pampaalsa ya pinakigawgaw hên mihay babayi ha kal-atan hên arina, haka nilum-at ya habaytoy kal-atan.”

Ya toro ni Apo Jesus ya tungkol ha makpit ya ilwangan

(Mateo 7:13-14, 21-23)

²² Kaban inhundo ni Apo Jesus ya pammita na ha balayan Jerusalem, ay nanoro ya ha kaganawan balayan haka kaganawan baryo ya angkadan na. ²³ Minghan main naghabi kana, ya wana, “Apo, pêpêrad bêngat ya madyanan biyay ya ayn angga?” ²⁴ Hinabi ni Apo Jesus, ya wana,

“Pakangêrên yon humwên ha makpit ya ilwan-gan. Anhabiên ko kamoyu, mal-at ya mapilit hên humwên, noa, a hila makahowên.

²⁵ “No ingkabat nan nag bali ya ilwangan, ta mirêng kaw hên mamaêg hên mamaêg, ya habiên yo, ‘Panginoon pahowênen mo kay!’ ay habiên na kamoyu, ‘A ko muwang no hino kaw.’ ²⁶ Bayo habiên yo, ‘Ay-êmên mon mahabi ya habayto, ha napagkaaêm naên ka, ta nanoro ka di ha logal naên.’ ²⁷ Amêhên, habiên nay na êt hên nag bali, ya wana, ‘A ko muwang no hino kaw. Pakarayo kaw kangko, hikaw ya nipanyag karawakan.’ ²⁸ Hadyay tangih yo bayto, haka mipang-ngê-ngêt kaw ha hadyay ilab boy ha hadyay huluk ya matanam yo, ta mahêlêk yo hilay unan natsi, hi apo Abraham, hi apo Isaac, hi apo Jacob haka hilay mâmipamwang hên an-ipaihip kanla ni Apo Namalyari ya atsi ha pamanlokop na, noa, hikaw etaman, ay itaboy. ²⁹ Habaytoy allo, ay mal-at ya alwan Israelita ya ubat ha ayri man ya logal di ha luta, ya kiaêm ha kaluto ha pamanlokop ni Apo Namalyari ha langit. ³⁰ Pakagilamên yo. Main kaatag ya êndat yon a hila makahowên ha paman-lokop ni Apo Namalyari, yan itad hilan hêpat hên humwên. Main kaatag êt ya êndat yon itad hilan hêpat hên humwên, yan a hila makahowên.”

*Ya pamanlugud ni Apo Jesus kanlan tagabalyan Jerusalem
(Mateo 23:37-39)*

³¹ Hêñ habayto, ay main nilumatêng ya ungnoy Pariseo. Hinabi la kan Apo Jesus, ya wanla,

“Pakarayo ka di, ta labay na kan patsēn ni Gobernador Herodes Antipas.” ³² Amêhêñ, wani Apo Jesus kanla, “Habién yo kan Gobernador Herodes Antipas, ya habaytoy manloko, ya ampamaalíh akon hakit haka nangarawak ya a angkahêlêk amêhêñ haka nobukah. Haka ha ikatlon allo ay yarién ko ya dyag ko. ³³ Ihundo koy pammita ko ha balayan Jerusalem amêhêñ, nobukah haka makalwa, ta alwan mangêd para ha mihay propeta ni Apo Namalyari hên matsi ha kaatag ya logal no alwan ha Jerusalem.”

³⁴ Hinabi nay na êt ni Apo Jesus, ya wana, “Kinalgalo kaw ya taga-Jerusalem, ta pinagbabato yoy propeta ni Apo Namalyari angga ha hilay natsi. Kata-ungno kataw nan labay lokopén hên nanad ha pamanlokop hên mihay toan manok ha hiwhiw na. Noa, a kaw mabay hên palokop kangko. ³⁵ Kabay booy nakêm kataw nan paulayan. A yo ko pon mahêlêk, angga ha a yo habién ya habaytsi, ‘Iningalwan ya in-utoh ni Apo Namalyari.’ ”

14

Namaalíh hi Apo Jesus hên hakit hên mihay lalaki

¹ Mihay allon pamagsimba lan Israelita, ay hinagyat hi Apo Jesus hên mangan ha bali hên mihay manungkulán lan Pariseo. Inimatónan la hi Apo Jesus. ² Kaban an-imatónan la ya, dinumani kan Apo Jesus ya mihay lalaki ya ginumayá ya lawini gawan hakit. ³ Kabay hinabi ni Apo Jesus kanlan Pariseo haka kanlan máñoron Kautuhan ni apo Moises, ya wana, “Ay-êmén ya nakahulat ha Kautuhan ni Apo Namalyari? Bawal kano hên

mamaalih hēn hakit ha allon pamagsimba o ahē?”

⁴ Noa, a hila nagtonoy. Ya dinyag ni Apo Jesus ay namaalih ya hēn hakit nan lalaki, bayo impabita na ya. ⁵ Amêhēn, hinabi ni Apo Jesus kanla, “No alimbawa ta anak yo, o baka yoy manabo ha malalē ya pangahoyan, yarin a yo tambēng ialih ya habayto, allo man hēn pamagsimba?” ⁶ Noa, ayn naghabi.

Ya mangēd ya ugali ha kaluto

⁷ Napansin ni Apo Jesus ya hilay kaatag ya hinagyat bayro ha kaluto hēn hatoy Pariseo, ay nikno ha iknoan hēn manungkulān agyan alwa hilan manungkulān. Kabay tinoroan na hila, ya wana, ⁸ “No alimbawa ta main managyat kamo ha kaluto hēn kasal, ay paan kan mikno ha iknoan hēn manungkulān, ta kayno main lumatēng ya manungkulān, ⁹ bayo habiēn na kamo hēn hatoy nanagyat kamo, ‘Kalalaki ko, idin mo pon kanan manungkulān ya habain ya iknoan.’ Kabay mipakarēng-êy kay na, ta mikno ka tana ha pinakamarayo ya iknoan. ¹⁰ No in-agkat ka ha kaluto, ya mangēd, ay mikno ka tana ha pinakamarayo ya iknoan, ta kayno habiēn nan nanagyat kamo, ‘Kalalaki ko, dumani ka di ha mangēd ya iknoan.’ Ha êmbayro ay, mahêlêk lan kaatag ya atsi ha kaluto no ay-êmēn kan dinayêw. ¹¹ Hilay mapagmatag-ay, ay iaypa, haka hilay maaypay nakêm ay itag-ay.”

¹² Amêhēn, hinabi ni Apo Jesus ha nanagyat kana, “No magkaluto ka, paan mon bêngat hēn hagyatēn hilay kaluguran mo, kamag-anak mo haka hilay karani mo hēn bali ya mabandi. Ta

lano, ay hagyat n la ka  t, kabay matumbahan la kay na. ¹³ No magkaluto ka, ay hagyat n mo hilay mangairap, hilay lumbo, hilay pilay, haka hilay buwag. ¹⁴ A hila man makahagyat kamo, ay humigla ka, ta tumbahan na kan hagyat n lano ni Apo Namalyari ha mangoman mabiyay hilay banal.”

*Ya alimbawa ya tungkol ha mahlay ya kaluto
(Mateo 22:1-10)*

¹⁵ H n nagilam h n miha kanlan ampangan bayro ha bali nan Pariseo ya hinabi ni Apo Jesus, ay wana kana, “Bapan higla lan tawo ya kilamo ha kaluto ha pamanlokop ni Apo Namalyari.” ¹⁶ Am h n, wani Apo Jesus, “Main mihay lalaki ya nagkaluto, ta mal-at ya hinagyat na. ¹⁷ H n nakalutoy na, ay in-utoh na hilay ipoh na h n ba g n hilay hinagyat na, ta habi n na ya  m n di, ‘Kaw na di, ta nakal-an ya ka n tamo.’ ¹⁸ Noa, balang miha kanla ay naghabi, ‘Pasinsya kaw na, ta a ko makalako ha kaluto.’ Ya una ay naghabi ha ipoh, ya wana, ‘A ko makalako ha kaluto, gawan nakahaliw akon tamnan ko, ya kailangan kon hiraw n.’ ¹⁹ Hinabi h n miha, ‘Nakahaliw akon limay paris h n baka. Dapat ko hilan subuk n h n panyarol. Pasinsya kaw na.’ ²⁰ Hinabin mihay na  t, ya wana, ‘Babayo kay kasal, kabay a ko makalako ha kaluto.’ ²¹ Nuli ya habaytoy ipoh, ta in-ubuh nan hinabi ya habayto ha amo na. Hadyay huluk h n amo h n habaytoy ipoh. Hinabi na ha ipoh, ya wana, ‘Galing n mo ha dann h n balayan, ta hagyat n mo hilay mairap, hilay lumbo, hilay pilay, haka hilay buwag.’ Kabay

nammita yay nay ipoh. ²² Hêñ nag-orong ya ipoh, ay wana, ‘Hinonol koy utoh mo, Apo. Noa, makwal pon ya panganan.’ ²³ Kabay hinabi nan amo ha ipoh na, ya wana, ‘Pakahagyatêñ mo hilay ayn bali, ya nag hawong ha danin dann ha laylay balayan, ta êmén mapno ya bali ko. ²⁴ Anhabien ko kamoyu ya ayn miha man kanlan una kon hinagyat ya makataway hêñ kaluto ko.’ ”

*Hilay tagahonol ni Apo Jesus ay kailangan lan
ibalag ya kaganawan maalagá kanla
(Mateo 10:37-38)*

²⁵ Minghan, hêñ mal-at ya nakilako kan Apo Jesus, ay inarap na hila, ta hinabi na kanla, ²⁶ “Hilay labay hêñ magpalokop kangko, ta mag-in tagahonol ko, ay kailangan lugurêñ la ko hêñ igit êt ha toa la, ahawa la, anak la, kaka la, ali la, haka sarili la. ²⁷ Haka hilay alwan nakal-an hêñ magtêéh hêñ pamairap, o matsi man, ha pamanhumonol la kangko hêñ nanad ha pamwat hêñ nabyat ya koros, ay alwan hêpat hêñ mag-in tagahonol ko. ²⁸ Dapat yon pakaihipêñ pon ya kairapan hêñ mag-in tagahonol ko. Habaytoy nanad ha mihay labay hêñ manyag hêñ matag-ay ya bali, ya pakaihipêñ na pon mangêd, no hukad ya kaganawan kailangan na, ta êmén mayari ya bali. ²⁹ Ta, no a nan pakaihipêñ hêñ mangêd, ta bat nay nan umpisaañ daygêñ, bayo, no a na mayari, ay kailyan la yan balang makahêlêk hêñ bali na, ta katarêktarêk ya nayari. ³⁰ Wanla, ‘Hêlkêñ yo! Hatsi ay nag-umpisan manyag bali, noa, a na impayari.’ ³¹ Êmbayro êt ya mihay ari ya main mapon liboy hundaloh, ya labay hêñ lumaban ha kaatag ya ari

ya nag lowampon libo ya hundaloh, ay pakaihipên na pon hêñ mangêñ no kaya na. ³² Ta no a na kaya, kaban marayo ya pon ya kapatsi na, ay main yan iutoh ya makihabi pon ha kapatsi na ya makikatoynungan ya tana. ³³ Embayro êt kamoyu no labay yo hêñ mag-in tagahonol ko, ay pakaihipên yo pon no kaya yon ibalag ya kaganawan maalagá kamoyu, bayo kaw magpalokop kangko. Ta no a yo kaya, ay a kaw malyarin mag-in tagahonol ko.”

*Ya ahin ya naalihan alat
(Mateo 5:13; Marcos 9:50)*

³⁴ “Mangêñ ya ahin. Noa, no naalihan yay nan alat, ay ahinan maiorong ya alat na. ³⁵ A ya magamit hêñ pamataba man hêñ luta. Kabay itapon la tana. Hikaw ya ampanggilam kangko, pakaihipên yoy toro ko!”

15

*Hilay a pon nagpalokop kan Apo Namalyari, ay
nanad hilan tupa ya nitama
(Mateo 18:12-14)*

¹ Amêhêñ, hilay máningil buwih haka kaatag êt ya mapanyag nangarawak, ay dinumani kan Apo Jesus ta manggilam hêñ anhabiêñ na. ² Anhumulapo hilay Pariseo haka hilay mánoron Kautuhan ni apo Moises, ya wanla, “Têh! Habaytsi ay ampananggap hêñ makasalan, bayo ampakiaêm ya êt kanla!” ³ Kabay dinyanan hila ni Apo Jesus hêñ hata alimbawa,

⁴ “No alimbawa ta main miha kamoyu ya nag magatoh ya tupa, ta nitama ya miha, ay hinoy daygêñ na? Siguradon ibalag na pon ya siyamapo

boy siyam bayro ha pagpastolan la, ta tapolên nay habaytoy miha ya nitama hêñ angga ha matapol nay habayto. ⁵ Pamakatapol nan habaytoy tupa, ay bapan higla nay na. Kabay bakayêñ na yan paorong. ⁶ Panlumatêng na ha bali na, ay hagyatêñ nay kaluguran na haka karani nan bali, ta wana kanla, ‘Magpakahigla kitamo, ta natapol koy tupa ko ya nitama.’ ⁷ Embayro êt ha langit, ay siguradon magpakahigla hila ha mihay makasalanan ya maghêhê hêñ manalibokot ha pamanyag karawakan, kisa ha siyamapo boy siyam ya êndat lan mangêd hila haka a lay nan kailangan hêñ kikwan patawad.”

Ya pera ya nakatak

⁸ Inhundo ni Apo Jesus ya pamaghabi na, ya wana, “O alimbawa ta main babayi ya nag mapoy pera ya pilak, bayo nakatak ya miha, hinoy daygêñ na? Pagkêtan nay pag-atâng, palisan nay bali, ta pakatapolên nan mangêd angga ha matapol na ya nakatak. ⁹ Pamakatapol na hêñ habaytoy pera, ay hagyatêñ na hilay karani nan bali, haka kaluguran na ta magpakahigla hila. ¹⁰ Embayro êt ya kahiglaan lan anghel ni Apo Namalyari, gawan main mihay makasalanan ya maghêhê hêñ manalibokot ha pamanyag karawakan.”

Ya makotaw ya miyawhay ya nanad nitama

¹¹ Inhundo ni Apo Jesus ya pamaghabi na, ya wana, “Main mihay lalaki ya nag anak hêñ loway miyawhay. ¹² Amêhêñ, hinabi nan poto ha tatang na, ya wana, ‘Tatang, idin mina kangko amêhêñ ya atag ko ha pibandian mo, ya mana naêñ lowan

mitaali.’ Kabay inatag nan tatang la ya pibandian na kanlan lowa. ¹³ A nabuyot, ay inhaliw nan poto ya atag nay bandi, ta nammita yan palako ha kaatag ya bansa ya marayo. Bayro nan inhayang ya atag nay bandi na ha pamanyag karawakan. ¹⁴ Ha kabuyutan, ay naubuh nay nan nagastos ya atag na. Hêñ habayto ay nagkamain lonoh bayro. Kabay pérad tana, ay natsi yay na dayi. ¹⁵ Ya dinyag na ay nakiamo yay na pon ha mihay tagabayro ya namiutoh kana hêñ mamakan hêñ baboy na. ¹⁶ Labay na dayin makiékan ha pangkaén lan baboy, noa, a la ya dinyanan. ¹⁷ Hêñ napakaihip-ihip nan mangêd ya dinyag na, ay hinabi na ha nakêm na, ya wana, ‘Hilay ipoh hêñ tatang ko ay angkahawa ha pangan, kaban hikong kit, ay pérad tanan matsu ha hadyay lonoh ko di. ¹⁸ Mag-orong ako ha tatang ko, ta habiên ko kana, “Tatang, nakadyag akon kasalanan kan Apo Namalyari haka kamo. ¹⁹ Alwa mo kinan baégén anak mo. Daygén mo ko tanan mihay ipoh mo.” ²⁰ Kabay nammita yay nan pauli ha tatang na.

“Marayo ya êt ha bali la, ay napatsilyapan yay nan tatang na. Naingalwan na yan tatang na kabay nuwayu ya hêñ nanupa ha anak na, ta tinakêh haka inaro na ya. ²¹ ‘Tatang,’ wanán anak, ‘nakadyag akon kasalanan kan Apo Namalyari haka kamo. Alwa mo kinan baégén anak mo.’ ²² Noa, binaég nan tatang na ya ipoh na, ta wana, ‘Galingén yo. Kowên yoy pinakamahampat ya takop, ta ipatakop yo kana. Pahing-hingan yo ya haka dyanan yo yan pag-apin bitsih. ²³ Patsên yoy pinakamatabay biseron baka, ta magpakahigla

kitamo! ²⁴ Magpakahigla kitamo, gawan hata anak ko ya nanad natsi, ay angkabiyay awud! Hiyay nanad nitama, noa, nilumatêng ya awud!’ Kabay nagpakahigla hila.

²⁵ “Hêñ habayto, ay atsi ya ha panamnan la ha marayo ya kaka na, ya punganay. Hêñ narani yay na ha bali la, ay nagilam nay tsig-tsigan haka hayawan. ²⁶ Kabay binaêg nay mihay ipoh la, ta wana, ‘Hinoy angkalyari di?’ ²⁷ Kabay wanen ipoh, ‘Apo, nilumatêng ya ali mo. Impapatsi hêñ tatang mo ya pinakamatabay biseron baka, gawan nilumatêng ya hêñ nabiyay.’ ²⁸ Amêhêñ, hinumuluk ya punganay. A na labay humwên ha bali. Kabay inumawah ya tatang na, ta inamungmung na ya, ta êmêñ ya humwên. ²⁹ Noa, wana ha tatang na, ya wana, ‘Mal-at ya taon kinan ampanawop kamo hêñ nanad ipoh. Ya kaganawan an-iutoh mo kangko, ay hinonol ko. Noa, miha man ya biseron kambing, ay ayn kan indin kangko ya maipapatsi naêñ dayi hêñ kaluguran ko, ta êmêñ kay magpakahigla. ³⁰ Hata poto mo, ay nanayang bandi mo ha pamabayi na, bayo pinamatsi mo ya êt hêñ pinakamatabay biseron baka!’ ³¹ Kabay wanen tatang na, ‘Anak ko, alwan êmbayro. Panay katan kalamo. Ya kaganawan pibandian ko ay pibandian mo. ³² Noa, hata ali mo ya nanad natsi, ay angkabiyay awud! Hiyay nanad nitama, noa, nilumatêng ya awud! Kabay kailangan kitamon magpakahigla.’ ”

16

Ya narawak ya pinatsiwal-an hêñ pibandian

¹ Hinabi nay na êt ni Apo Jesus kanlan tagahonol na, ya wana, “Main mihay mabandi ya main pinatsiwal-an hên pibandian na. Noa, main naghabi ha mabandi ya panhayangên ya pibandian na hên pinatsiwal-an na. ² Kabay impabaêg nan mabandi ya habaytoy pinatsiwal-an na, ta wana kana, ‘Hinoy hatsi ya angkalêngê ko tungkol kamo? Ipahlêk mo kangko ya hulat mo ha nagastos mo ha pibandian ko, ta paubat amêhên alway nan hika ya patsiwal-an ko.’ ³ Kabay hinabi nan hata pinatsiwal-an ha nakêm na, ya wana, ‘Alihan akon ámo ko ha tungkulan ko. Hino kaya ya daygên ko? A ko agyu ya mabyat ya obra, nanad pag-obra ha luta. Marêng-êy ako etaman hên magpalimos. ⁴ Awo bay, muwang kina ya daygên ko, ta êmên la ko hagyatêñ ha bali la, agyan alihêñ na ko ha tungkulan ko.’

⁵ “Miha-miha nan binaêg hilay main utang ha amo na. Hinabi na ha una, ya wana, ‘Ungnoy utang mo ha amo ko?’ ⁶ Kabay wanana nag utang, ‘Dinalan ya hukat hên langis.’ Amêhêñ, hinabi nan pinatsiwal-an ha nag utang, ya wana, ‘Iawah moy listahan utang mo. Tambêng kan mikno, ta hagilyan mon limampo.’ ⁷ Bayo hinabi nan pinatsiwal-an ha kaatag ya main utang, ya wana, ‘Ungnoy utang mo?’ Kabay wanana nag utang, ‘Dinalan ya kaban hên trigo.’ Amêhêñ, hinabi nay na êt hén hatoy pinatsiwal-an, ya wana, ‘Iawah moy listahan utang mo, ta hagilyan mon walumpo.’ ⁸ Hén napansin nan amo ya dinyag nan pinatsiwal-an nan pibandian na, ay dinayêw na ya. Dinayêw na ya, alwan gawan pamanloko na

kana, noa, gawan magaling yan mangihip. Pêtêg bay magaling hilan mangihip hên ikakangêd la ha sarili la, hilay a ampagpalokop kan Apo Namalyari, kisa kanlan nagpalokop kana.”

⁹ Wana êt ni Apo Jesus ha tagahonol na, “Anhabiên ko kamoyu, gamitên yoy pibandian yo ha pamanawop hên kalamo yo di ha luta, ta êmên lano ha langit, ha ayn nanan pera, ay mahigla la kaw tanggapên lan kalamo yo ya atsi bayro gawan ha hawop yo kanla. ¹⁰ Ya mapaypaniwal-an ha pêrad, ay mapaypaniwal-an ha mal-at. Ya a mapaypaniwal-an ha pêrad, ay a etaman mapaypaniwal-an ha mal-at. ¹¹ No alwa kaw hên mapaypaniwal-an ha pibandian di ha luta, ay ayn etaman mamipatsiwala kamoyu hên mantêg pibandian ha langit. ¹² No alwa kaw hên mapaypaniwal-an ha pibandian hên kaatag, ay ayn bayton mam-i kamoyu, hên mag-in taganán kamoyu.

¹³ “Ayn hinoman ya makapaghuyo ha loway amo hên booy nakêm. Ta lugurên nay miha, haka kahêmêkan nay miha, o huyuên nan mantêg ya miha, ta hatoy miha, ay pahawaan na. Embayro êt, ay a yo kayan huyuên hi Apo Namalyari no ubuhêن yoy hêkaw yo ha pibandian.”

*Hino-hino kay na hên ya toro ni Apo Jesus
(Mateo 11:12-13; 5:31-32; Marcos 10:11-12)*

¹⁴ Hêن nagilam lan Pariseo ya hinabi ni Apo Jesus, ay kinailyan la ya gawan kamata hilan pera. ¹⁵ Kabay hinabi na kanla, ya wana, “Ampagbabara kaw ha arapan hên kapareho yo, noa, muwang ni Apo Namalyari ya nakêm yo. Ya bapan

hampat ha ihip hēn tawo, ay kapahuluk kan Apo Namalyari.

¹⁶ “Ya impamwang lan māmipamwang hēn an-ipaihip kanla ni Apo Namalyari, haka ya impamwang lan Kautuhan ya impahulat na kan apo Moises, ay tungkol ha pamanlokop ni Apo Namalyari. Haka hi Juan Bautista ya nag-umpisa hēn nanupad hēn habaytoy impamwang la. Paubat ha pamanlumatēng na, ay an-iaral ya Mangēd ya Habi tungkol ha pamanlokop ni Apo Namalyari haka mal-at ya ampamilit hēn palokop kana. ¹⁷ Noa, nataluh hēn alihēn ya luta haka ya angkahēlēk ha langit kanan daygēn ayn pukat ya miha man ya naipēk ya gulis kanlan habaytoy Kautuhan ni Apo Namalyari, ya hinulat ni apo Moises.”

¹⁸ Hinabi na êt ni Apo Jesus, ya wana, “Ya lalaki ya mamihiyay hēn ahawa na, bayo mag-ahawan kaatag, ay nakadyag kasalanan gawan namabayi ya. Êmbayro êt ya lalaki ya nangahawa hēn babayi ya inhiyay, ay nakadyag ya êt kasalanan hēn namabayi.”

Ya mabandi haka hi Lazaro

¹⁹ Hinabi nay na êt ni Apo Jesus, ya wana, “Main mihay mabandi ya ampagtakop hēn makamal ya takop. Allo-allo, ay angkahawa ya ha hinon labay nan kaēn. ²⁰ Main etaman mihay mairap bayro ya nag langan Lazaro ya napnoan hēn nuka, ya panibul-ih lan kit ha arapan bali nan hatoy mabandi. ²¹ Atsi ya bayro, ta labay na dayin makaêkan agyan momo hēn mabandi. Kaingalo yan kit, ta main êt bayron aho ya ampipanapoh hēn nuka na. ²² Hēn

natsi hi Lazaro, hiyay gintan hēn anghel ni Apo Namalyari ha langit, ha dani ni apo Abraham. Natsi ya êt ya hatoy mabandi, bayo in-ilbêng.

²³ “Hiyay gintan ha Hades. Kaban ampagdusa ya bayro ay naningla ya. Bayro ha marayo, ay nahélék na hi apo Abraham haka hi Lazaro. ²⁴ Kabay nan-angaw ya, ya wana, ‘Apo Abraham, ingalwan mo ko dayi. Iutoh mo hi Lazaro ya ibahá nay tampoh hēn panoro na ha lanêm, ta pakébêlén nay dila ko, ta angkairapan ako di, gawan hadayay omot hēn hata apoy.’ ²⁵ Noa, wani apo Abraham, ‘Anak ko, muwang mo hēn angkabiyay ka pon, ay hinumawa ka ha kaganawan mangangêd, kaban nagtêêh yan kairapan hi Lazaro. Amêhêñ, ay mahigla ya bayri hi Lazaro, kaban hika ay ampagirap. ²⁶ Miha êt, ay main bapan lalêñ bêngaw ha pilatan tamo. Kabay a kay makalako kamoyu, haka a kaw makalako di.’

²⁷ “Hinabi nay na êt hēn mabandi, ‘No êmbayro awud, ay iutoh mo dayi hi Lazaro ha balin tatang ko. ²⁸ Ta habiêñ na dayi kanlan limay kapotoh pohêl ko ya kaillag hila, ta êmén hila a miabot di ha logical hēn hadayay pamagdusa.’ ²⁹ Noa, wani apo Abraham, ‘Atsi kanlan kapotoh pohêl mo ya inhulat ni apo Moises haka ya inhulat lan kaatag ya mámpamwang hēn an-ipaihip kanla ni Apo Namalyari ya paniwal-an la dayi.’ ³⁰ Wanan mabandi, ‘Kulang ya habayto apo Abraham. Noa, no main mangoman mabiyay ya natsi, ya mangaral kanla, ay paghêhêan la bayto ya kasalanan la.’ ³¹ Noa, wani apo Abraham, ‘No a la paniwal-an ya inhulat ni apo Moises, haka ya inhulat lan kaatag ya mámpamwang hēn an-ipaihip kanla ni Apo Na-

malyari, ay a hila êt mapaniwala ha pamwang hêñ mihay natsi, ya nabiyay oman.’”

17

*Ya pangubatan hêñ pamanyag kasalanan
(Mateo 18:6-7, 21-22; Marcos 9:42)*

¹ Amêhêñ, wani Apo Jesus kanlan tagahonol na, ya wana, “Taganán lumatêng kantamo ya tuksô hêñ manyag kasalanan, noa, kaingalo ya ampan-gubatan hêñ tuksô. ² Hinoman ya pangubatan hêñ pamanyag kasalanan hêñ mihay maaypa ya nakêm hêñ nanad kanlan habaytsi ya ampaniwala kangko, ay mangêd pon kana, ya bayo ya mag-in pangubatan hêñ habayto, ay patsêñ ya hêñ êl-an yan mahlay ya bato ha lêey na, ta ilêmêñ ya ha malalê ya lanêñ. ³ Kabay kaillag kaw.

“No ya kapareho mo ay nakadyag hêñ kasalanan kamo, ay kailangan habyanan mo ya, ta êmêñ ya maghêhê ha pamanyag nan kasalanan. No maghêhê ya, ay patawarêñ mo ya. ⁴ Kataungno ya man hêñ mikasalanan kamo, ha mihay allo, ta panay yan maghêhê, ay dapat mo yan patawarêñ.”

Ya paniwala kan Apo Namalyari

⁵ Amêhêñ, hinabi lan apostol kana, ya wanla, “Panginoon, pahanan moy paniwala naêñ kan Apo Namalyari.” ⁶ Hinabi ni Apo Jesus, ya wana, “Nanawa man ya paniwala yo kan Apo Namalyari, ya nanad bat but-on mustasa, ay mahabi yo kanan hata kayo, ‘Ulutêñ moy sarili mo, ta magálih ka ha dagat!’ ay humonol ya kamoyu.”

Ya tungkulan hêñ ipoh

⁷ Inhundo ni Apo Jesus ya pamaghabi na, ya wana, “Waringan, no main kaw hēn ipoh ya nilumatēng ya ubat ha panyarolan o kaya ha pag-pastolan, yarin mahabi yo kana ya, ‘Ka di, ta mangan!’ ⁸ Alwa. Ya habiēn yo kana ay ‘Pangilan mo kon kaēn. Bayo maghagili kan takop, ta mamiyatag ka kangko, ta kaban ampangan ako, ay gawangan mo kon hinon kailangan ko. Pangayari ko, ay hikay nay mangan.’ ⁹ A yo ya man pahalamatan no daygēn nay kaganawan in-utoh yo kana. ¹⁰ Embayro êt ya dapat yon daygēn pamakadyag yon kaganawan impadyag ni Apo Namalyari kamoyu. Paan kaw nan manapol hēn pamandayēw. Habiēn yo tana ya, ‘Hikay ay ipoh bēngat. Kabay andaygēn naēn bēngat ya tungkulun naēn.’ ”

Namaalih hi Apo Jesus hēn hakit hēn mapoy nag ketong

¹¹ Ha pammita lan Apo Jesus palako ha balayan Jerusalem, ay nagdann hila ha pilatan hēn probinsyan Samaria haka probinsyan Galilea. ¹² Hēn pa-howēn hilay na ha mihay baryo, ay nakatupa hila hēn mapoy nag hakit hēn ketong ya tinunggēn ha marayo-dayo, ¹³ ta in-angaw la, ya wanla, “Panginoon Jesus, ingalwan mo kay.” ¹⁴ Hēn nahēlēk na hila, ay wana kanla, “Pahlēk kaw kanlan pari ta êmēn la ipamwang ya ayn kaw nan hakit.” Kaban ampammita hila, ay ampiālīh ya hakit la. ¹⁵ Hēn napansin la, ya naalīh ya hakit la, ay nag-orong ya miha kan Apo Jesus, haka na in-ikhaw ya pamag-puri na kan Apo Namalyari. ¹⁶ Nandoko ya ha arapan ni Apo Jesus, ta nagpahalamat. Habayto ay

mihay taga-probinsyan Samaria. ¹⁷ Bayo hinabi ni Apo Jesus, ya wana, “Mapo ya inalihan hakit. Ato hilay nay siyam? ¹⁸ Pata ayn nag-orong kanla hēn nagpuri kan Apo Namalyari? Hatsin bēngat ya alwan Israelita ya nag-orong.” ¹⁹ Amêhēn, hinabi ni Apo Jesus kana, “Mita kay na, ta naalih ya hakit mo gawan ha paniwala mo.”

Ya toro tungkol ha pamanlumatēng hēn paman-lokop ni Apo Namalyari haka ya pag-orong ni Apo Jesus

(Mateo 24:23-28, 37-41)

²⁰ Minghan, ay labay lan Pariseo hēn mamwangan kan Apo Jesus no makanon lumatēng ya pamanlokop ni Apo Namalyari. Kabay wani Apo Jesus kanla, “Ya umpisa hēn pamanlokop ni Apo Namalyari ay a mahēlēk hēn mata. ²¹ Ayn makapaghabi hēn, ‘Hēlkēn yo! Nag-umpisay na di!’ o ‘Nag-umpisay na do!’ Ta ha kaptēgan, ya pamanlokop ni Apo Namalyari ay atsi ha nakēm lan ampaniwala kana.”

²² Bayo wana kanlan tagahonol na, “Lumatēng ya allo, ay labay-labay yon mahēlēk ya pamanlumatēng ko, ya Taga-Langit, ya In-anak Tawo. Noa, a yo ko mahēlēk. ²³ Main maghabi kamoyu, ‘Nag-orong yay na ya Mesias, ya Cristo, ya Māmiligtas ta atsi ya di!’ Wanla êt hēn kaatag, ‘Atsi ya bayro!’ Noa, paan kaw maniwala kanla, hēn kihonol kanla hēn manapol kangko. ²⁴ Ta no ay-êmēn magkulibid ya kimat, ya mag-ahnag ha marayo, haka mahēlēk hēn balang miha, ay êmbayro êt ya pag-orong ko, hēn Taga-Langit, ya In-anak Tawo. ²⁵ Noa, kailangan tēhēn ko

pon ya mal-at ya kairapan, ta araên la ko hêñ tawo amêhêñ. ²⁶ No ay-êmêñ ya karawakan pamimiyay la hêñ haton nabiyyay hi apo Noe, ya nagpalokop kan Apo Namalyari, ay êmbayro êt mag-in narawak ya pamimiyay no marani yanay pag-orong ko, ya Taga-Langit, ya In-anak Tawo. ²⁷ Hêñ haton nabiyyay hi apo Noe, ay a la ginilam ya paypamwang na. Inhundo lan angkabiyay hêñ hato ya pangan, pamamminêñ, haka pamiaahawa la angga ha hinumwêñ hilan apo Noe ha dinyag nay barko. Kabay naubuh hilan natsi ha lubug. ²⁸ Êmbayro êt hêñ hato, hêñ nabiyyay pon hi apo Lot. Inhundo lan tagabalyan Sodoma ya pangan la, pamamminêñ la, kapanapolan la, pananêñ la, haka pamadyag hêñ bali la. ²⁹ Noa, ha allon pamag-alíh lan Lot bayro ha Sodoma, ay naubuh hilan natsi, gawan pinauranan na hila ni Apo Namalyari hêñ apoy haka sulpud.* ³⁰ Êmbayro êt ya malyari ha pag-orong ko, ya Taga-Langit, ya In-anak Tawo.

³¹ “Habaytoy allo, no main atsi ha bubungan bali la, ay paan hilay nan tumaoy hêñ mangwan pibadian la ha lalêñ bali la. Paan hilay nan muli ya atsi ha panamnan. ³² Ihipêñ yo ya nalyari ha ahawa ni apo Lot, hêñ haton natsi ya, gawan namalingay ya hêñ ampag-alíh hila ha balayan Sodoma. ³³ Hilay a mabay hêñ mangoman ya pamimiyay la, ay maalihan hêñ biyay. Noa, hilay nakal-an hêñ manalibokot ha pamimiyay la, gawan ha paniwala la kangko, ay dyanan hêñ biyay ya ayn angga. ³⁴ Pakagilamêñ yo, ha

* ^{17:29} Genesis 19:1-29.

yabin pag-orong ko, no alimbawa ta main loway nabêlêw ha mihay papag, ay gêtan ha langit ya ampaniwala, noa, ibalag ta parusaan ya a ampaniwala. ³⁵ No alimbawa ta main loway babayi ya ampanggiling, ya ampaniwala ay gêtan ha langit, noa, ya a ampaniwala ay ibalag ta parusaan. ³⁶ Ha pag-orong ko, no alimbawa ta main loway lalaki ya ampilamo hên ampag-obra ha panaman, ya ampaniwala ay gêtan ha langit, noa, ya a ampaniwala ay ibalag ta parusaan.” ³⁷ Amêhêñ, nangotang hilay tagahonol ni Apo Jesus, ya wanla, “Panginoon, anton matupad ya habayto?” Kabay wani Apo Jesus kanla, “No anto ya bangkay, ay bayro êt mi-tsi-tsipon ya uwak.”†

18

Ya alimbawa ya tungkol ha babayi ya ayn têgêñ ha pangabala na ha mihay mánlingon kaso

¹ Amêhêñ, nangalimbawa yay na êt hi Apo Jesus, ta toroan na hilay tagahonol na ya kailangan panay hilan manalangin hên a hila humawa ha pamanalangin. ² Hinabi ni Apo Jesus, ya wana, “Ha mihay balayan, ay main mánlingon kaso ya a angkalimo kan Apo Namalyari, haka ayn yan anggalangêñ ya tawo. ³ Bayro ha balayan, ay main babayi ya bawo, ya ayn têgêñ hên mangabala kanan hata mánlingon kaso, ta panhabiêñ na, ‘Hawpan mo kon lumaban ha kapatsi ko.’

† **17:37** Anhabiêñ lan kaatag, ya labay habiêñ hên hata kahabian, ay tambêng mamwangan lano. Wanla êt hên kaatag, ya labay habiêñ hên hatsi, ay hilay a pon nagpalokop kan Apo Namalyari, ay nanad hilan natsi haka mananggap hilan parusa la.

⁴ Ha pangabala na kana, ay a na ya pon dinambi, noa, hēn a nay na matêêh, ay wana ha nakêm na, ‘A ko angkalimo kan Apo Namalyari, haka ayn akon anggalangên ya tawo, ⁵ noa, hawpan ko yay na, gawan ayn têgêñ ya pangabala na kangko, ta pêrad tana, a kina matêêh ya pangabala na kangko.’” ⁶ Amêhêñ, wani Apo Jesus kanla, “Pakaihipêñ yoy hinabi hêñ hatoy mânlingon kaso ya agyan narawak ya ugali na, ay nanawop ya kanan babayi ya bawo. ⁷ Hi Apo Namalyari pon kaya, ya makatoynungan, yarin a ya tambêng manawop kanlan pinili na hêñ mag-in kana, ya ampamaêg kana hêñ allo-yabi. ⁸ Panhabiêñ ko kamoyu, tambêng na hilan lingonêñ ha ikakangêd la. Noa, pamag-orong ko, ya Taga-Langit, ya Inanak Tawo, ay makalatêng ako kaya hêñ tawo ya main paniwala hêñ êmbayro, ya ayn têgêñ hêñ manalangin?”

Ya alimbawa ya tungkol ha panalangin hêñ loway lalaki

⁹ Nam-i yay na êt hi Apo Jesus hêñ hata alimbawa kanlan kaatag, ya êndat la no mahonol hila kan Apo Namalyari, bayo ammusmusêñ lay kapareho la. ¹⁰ Wana kanla, “Main loway lalaki ya hinumwêñ hêñ manalangin ha Templo. Ya miha ay Pariseo, haka ya miha ay máningil buwih. ¹¹ Nirêng ya Pariseo ha marayo-dayo, ta in-ikhaw nay panalangin na, ya wana, ‘Apo Namalyari, ampagpahalamat ako kamo, ta alwa kon nanad kanlan kaatag ya mapanakaw, mapanloko, haka mamabayi. Alwa ko êt nanad kanan hata máningil buwih. ¹² Loway allo ha balang parominggo, ay

ampagtêh ko hên a ko ampangan, ta êmén a maabala ya panalangin ko kamo. Ampam-i ko êt kamon ikamapo hên kaganawan angkatsikap ko.’ ¹³ Noa, ya hatoy máningil buwih, ay ampanalangin ha marayo. A ya makatsingla, haka pandug-dugêna êt ya pagaw na gawan hadayay dêng-êy na, ta wana, ‘Apo Namalyari, ingalwan mo ko, ya mihay makasalanan.’ ¹⁴ Panhabiêñ ko kamoyu ya hatoy máningil buwih, ay nuli hên pinatawad ha kasalanan, noa, hatoy Pariseo, ay a pinatawad. Hilay mapagmatag-ay, ay iaypa, noa, hilay maaypa ya nakêm ay itag-ay.”

*Inhalangin ni Apo Jesus ya nanganaway anak
(Mateo 19:13-15; Marcos 10:13-16)*

¹⁵ Nanganaway anak man, ay anggêtan kan Apo Jesus, ta ihalangin na hila hên ipalunto nay gamêt na ha ulo la. Hêñ nahêlêk lan tagahonol ni Apo Jesus ya hata manianak-anak, ay binawal lay am-pantan kanla. ¹⁶ Noa, binaëg ni Apo Jesus hilay manianak-anak, bayo wana kanlan tagahonol na, “Paulayan yo hilay anak hên paidani kangko. Paan yo hilan bawalêñ. Ta hilay maaypa ya nakêm ya nanad kanla, ay hila ya ilamo ha pamanlokop ni Apo Namalyari. ¹⁷ Pakagilamêñ yoy hatsi. Hilay a manoto ha paniwala hên nanaway anak ha pagpalokop la kan Apo Namalyari, ay a makapak-ilamo ha pamanlokop na.”

*Ya mihay nag tungulan, ya mabandi ya Israelita, ya nangotang no hino ya dapat nan daygên ta êmén ya madyanan biyay ya ayn angga
(Mateo 19:16-30; Marcos 10:17-31)*

¹⁸ Main mihay Israelita, ya nagtungkulon, ya nangotang kan Apo Jesus, ya wana, “Mangêd ya Mánoro, hino ya dapat kon daygên, ta êmên ako madyanan hên biyay ya ayn angga?” ¹⁹ Wani Apo Jesus kana, “Pata binaëg mo kon mangêd? Hi Apo Namalyarin bêngat ya mangêd. ²⁰ Muwang moy Kautuhan ni Apo Namalyari, ‘Paan mamabayi. Paan makilalaki. Paan mamatsin kparehon tawo. Paan manakaw. Paan manistigos ha alwan kaptêgan. Galangên moy toa mo.’” ²¹ Bayo wanana lalaki, “Mánoro, panhonolên ko ya kaganawan ya habayto paubat hên anak ako pon.” ²² Hêñ nagilam ni Apo Jesus ya hinabi na, ay wana, “Miha pon ya kailangan mon daygên. Iubuh mon ihaliw ya pibandian mo, bayo idin moy habaytoy naablian kanlan mangairap, ta madyanan kan mantêg pibandian ha langit. Pangayari mon madyag ya habayto, ay mag-orong ka di, ta humonol ka kangko.” ²³ Noa, hêñ nagilam nay hinabi ni Apo Jesus, ay naglungkot ya, ta miha yay mabandi.

²⁴ Nadambi ni Apo Jesus ya naglungkot ya lalaki, kabay wana, “Taganán alwan nataluh hêñ makapakilamo ha pamanlokop ni Apo Namalyari ya hilay mabandi! ²⁵ Pêtêg ya. Nataluh hêñ mag-dann ha lubot karayêm ya mihay kamelyo kanan makapakilamo ha pamanlokop ni Apo Namalyari ya mihay mabandi.” ²⁶ Hilay nakagilam hêñ habayto, ay nangotang, “Hino awud ya miligtas, hêñ makapakilamo ha pamanlokop ni Apo Namalyari?” ²⁷ Wani Apo Jesus, “Ya a madyag hêñ tawo, ay madyag ni Apo Namalyari.”

Lucas 18:28

civ

Lucas 18:36

²⁸ Amêhên, wani Pedro, “Ay-êmên kay, ya tagahonol mo? Imbalag naêñ ya bali naêñ, ta êmên kay humonol kamo.” ²⁹ Hinabi etaman ni Apo Jesus, “Pakagilamên yo! Hilay nangibalag bali la, o ahawa la, o kapotoh pohêl la, o toa la, o anak la, gawan ha pagpalokop la ha pamanlokop ni Apo Namalyari, ³⁰ ay madyanan hêñ mal-at kanan imbalag la, kaban atsi hila pon di ha luta. Bayo lano madyanan hila êt hêñ biyay ya ayn angga.”

*Ikatlon pangungkat ni Apo Jesus, ya patsêñ ya
(Mateo 20:17-19; Marcos 10:32-34)*

³¹ Impapawa ni Apo Jesus ya labinloway tagahonol na, ta wana kanlan bêngat, “Pakagilamên yo! Anlumakat kitamo ha Jerusalem, ta maubuh hêñ matupad ya hinulat lan mámpamwang hêñ an-ipaihip kanla ni Apo Namalyari ya tungkol kangko, ya Taga-Langit, ya In-anak Tawo. ³² Ta idin la ko kanlan alwan Israelita. Musmusêñ la ko, dul-an la ko, ³³ pagpapatokêñ la ko, bayo la ko patsêñ. Noa, ha ikatlon allo, ay mabiyay kon oman!” Habaytoy hinabi ni Apo Jesus. ³⁴ Noa, a naintindihan hêñ labinloway tagahonol na, ya nagilam la, gawan habayto ay a pon impamwang kanla, kabay a la nakway labay nan habiêñ.

*Namamukat hi Apo Jesus hêñ mihay buwag
(Mateo 20:29-34; Marcos 10:46-52)*

³⁵ Amêhên, hêñ andumani hilan Apo Jesus ha balayan Jerico, ay main bayron buwag ya ampi-kno ha danin dann ya ampakikwan pera. ³⁶ Hêñ nagilam nay kal-atan ya ampipagdann ha dani na, ay labay nan mamwangan no hinoy angkalyari.

³⁷ Main naghabi kana ya hi Apo Jesus ya tagabalyan Nazaret ay ampagdann bayro. ³⁸ Kabay nan-angaw ya, ya wana, “Apo Jesus, ya kaapo-apoan ni Arin David, ingalwan mo ko dayi!” ³⁹ Binawal yan maglabak hēn hatoy ampita ha unaan lan Apo Jesus, noa, impakakhaw nan inangaw, “Kaapo-apoan ni Arin David, ingalwan mo ko dayi!” ⁴⁰ Hēn nagilam ni Apo Jesus ya angaw na, tinunggēn ya ta main yan in-utoh, ta akayēn lay buwag hēn idani kana. Hēn narani yanay buwag, ay wani Apo Jesus kana, ⁴¹ “Hinoy labay mon daygēn ko kamo?” Amēhēn, wanān buwag, “Panginoon, labay kon makahēlēk ako.” ⁴² Kabay hinabi ni Apo Jesus, “Makahēlēk ka, gawan ha paniwala mo kangko.” ⁴³ Tambēng yan nakahēlēk, kabay nakihonol yay na kan Apo Jesus kaban ampuriēn na hi Apo Namalyari. Hēn nahēlēk lan atsi bayro ya nalyari, ay pinuri la etaman hi Apo Namalyari.

19

Nabayo ya ugali ni Zaqueo

¹ Nilumatēng hilan Apo Jesus ha balayan Jerico, ta bayro hilan nipadann ha balayan. ² Main lalaki bayro ya nag langan Zaqueo. Hi Zaqueo ay ampa-maala kanlan mangwan buwih, kabay mabandi ya. ³ Labay na dayin mahēlēk hi Apo Jesus, ta êmēn na ya mapuliah, noa, a na ya mahēlēk, gawan kaltan, ta pandak yan kit. ⁴ Kabay ya dinyag na, ay nuwayu ya ha unaan lan Apo Jesus, ta nunik ya ha kayon sikomoro, ta êmēn na ya mahēlēk. ⁵ Nahēn niabot hilan Apo Jesus ha nag kayo, ay

tsiningla na ya, ta wana, “Zaqueo, galingên mon tumaoy, ta maniraw ako ha bali mo amêhêñ.”
6 Kabay ginaling nan tinumaoy, ta mahigla yan nanagyat kanlan Apo Jesus ha bali na. **7** Hilay kaltatan ya atsi bayro ay nanotol, ya wanla, “Awta bay maniraw hi Apo Jesus ha balin makasalanan!”
8 Kaban ampikno hila ha bali lan Zaqueo ay nirêng ya hi Zaqueo, ta wana kan Apo Jesus, “Panginoon, ya kagitna hêñ pibandian ko ay idin ko kanlan ampangailangan. Ha balang miha ya pinirayit ko, ay iorong ko hêñ kaapat ya napiRAYIT ko kanla.”
9 Nahêñ nagilam ni Apo Jesus ya hinabi na, ay wana, “Amêhêñ ay nailigtas ya hata pamilya, ta hi Zaqueo ay ampaniwala kan Apo Namalyari hêñ nanad ha paniwala hêñ ninuno yo hi apo Abraham. **10** Gawan hiko ya Taga-Langit, ya In-anak Tawo, ay atsi ko di ha luta ta êmêñ ko hila tapolêñ haka iligtas ha kaparusaan ya hilay nitama.”

*Hilay ampaghuyo ha Panginoon ay dapat gamitêñ ya impatsiwala kanla ha ikakangêd
(Mateo 25:14-30)*

11 Kaban anggilamêñ lay habi ni Apo Jesus, ay in-istorya na ya hata alimbawa, gawan marani yay nan lumatêng ha balayan Jerusalem. Haka gawan êndat la no tampol mipairêng bayro ya pamalokop ni Apo Namalyari, haka bayron mikno hi Apo Jesus hêñ mamaala kanla ha bansom Israel.
12 Kabay impamwang ni Apo Jesus kanla no ay-êmêñ ya dapat mag-in pamimiyay la, kaban an-êngganan lay pag-orong na, ta wana, “Main mihay nag tungkulon, ya mita ha marayoy bansa, ta

tanggapêñ nay karapatan nan mag-ari, bayo mag-orong yay na ta êmên ya mamaala ha kabansa na.

¹³ Bayo ya nammita ay binaëg nay mapo kanlan ipoh na, ta binalagan na hila hén tsi-tsi mihan pera ya ginto, ta wana kanla, ‘Pakal-atêñ yoy hata pera, ta êmên ya lum-at kaban ayn ako pon di.’

¹⁴ Amêhén, gawan angkahêmékan la yan kabansa na, ay ha pammita na, ay main hilan in-utoh ha nag tungkulon bayro ha marayoy bansa, ta wanla, ‘A naêñ labay ya habaytsi hén mag-in ari naêñ.’

¹⁵ “Êmbayro man, hiya ay nag-in ari, bayo nag-orong yay na. Nahén nilumatêng ya ha bali na, ay impabaëg nay ipoh na, ta êmên na mamwangan no ungnoy tubo la ha imbalag nay pera kanla.

¹⁶ Dinumanî kana ya una, ta hinabi na, ya wana, ‘Apo, ya pera moy ginto ay tinumubo hén mapoy peran ginto.’

¹⁷ “‘Magaling,’ wanen ari, ‘Hika ay mihay mangêd ya ipoh. Gawan mapaypaniwäl-an ka ha pérâd, ay manalan ka hén mapo ya balayan.’

¹⁸ “Nilumatêng ya ikalwan ipoh, ta wana, ‘Apo, ya pera moy ginto ay tinumubo yan limay pera ya ginto.’

¹⁹ “Kabay hinabi nan ari kana, ya wana, ‘Hika ay manalan hén limay balayan.’

²⁰ “Amêhén, nilumatêng yay na êt ya mihay ipoh, ta wana, ‘Apo, atsi di ya pera moy ginto, ya impunggoh ko ha panyo ko, bayo ko ya in-hinép.

²¹ Dinyag koy habayto ta malimo ko kamo.

Muwang ko ya hadyay igapit mo. Ampangwa ka hén alwa mon pinaghayngêtan, bayo ampamutsi kan alwa mon intanêm.’

²² “Kabay hinabi nan ari kana, ya wana, ‘Hika ay mihay narawak ya ipoh. Gawan ha habi mo, ay hatolan ka hēn parusaan. Muwang mo awud ya maigpit ako. Ampangwa kon alwa kon pinaghayngētan, bayo ampamutsi ko hēn alwa kon intanêm. ²³ No êmbayro awud, awta a mo indin ya pera ko ha bangko, ta êmēn mo dayin maiorong kangko ya habayto hēn kalamoy tubo ha bangko?’ ²⁴ Bayo wana kanlan atsi bayro, ‘Kowêñ yoy peray ginto, ya atsi kana, ta idin yo ha main mapo.’ ²⁵ Noa, hinabi la kana, ‘Apo, main yay nan mapo!’ ²⁶ Kabay hinabi nan ari, ‘Anhabiên ko kamoyu, hilay tapat ha pamanggamit hēn indin kanla, ay dyanan ko pon êt. Noa, hilay alwan tapat ha pamanggamit hēn indin kanla, ay alihêñ êt kanla ya pêrad ya atsi kanla. ²⁷ Amêhêñ, gêtan yo di kangko hilay kapatsi ko, ya a nabay hēn hiko ay mag-in ari la, ta patsêñ yo hila ha arapan ko.’ ”

Mal-atya ampagpuri kan Apo Jesus hēn ampan-daraho yay na ha balayan Jerusalem

(Mateo 21:1-11; Marcos 11:1-11; Juan 12:12-19)

²⁸ Ubat nan hinabi ya habayto ni Apo Jesus, ay inhundo lay pammita la ha Jerusalem. Hi Apo Jesus ay ampammita ha arapan lan kalamo na. ²⁹ Nahêñ andumani hilay na ha baryon Betfage, haka baryon Betania ha Tawgtug Olibo, ay im-pauna ni Apo Jesus ya lowa kanlan tagahonol na, ta wana kanla, ³⁰ “Muna kaw ha humonoy baryo. Panhumwêñ yo bayro, ay mahêlêk yoy mihay biseron asno, ya nakah-êl, ya a pon na-hakyan. Okalêñ yoy habayto, ta gêtan yo di. ³¹ No main mangotáñ kamoyu no awta an-okalêñ

yoy habayto, ay habiēn yo, ‘Kailangan yan Panginoon.’ ”

³² Kabay nammita hilay nay loway in-utoh na. Haka natapol la etaman ya biseron asno ya nanad hinabi ni Apo Jesus kanla. ³³ Kaban an-okalēn la ya, ay hinabi lan nag asno, ya wanla, “Pata anokalēn yoy habain ya bisero?”

³⁴ Hinabi lan in-utoh ni Apo Jesus, ya wanla, “Kailangan yan Panginoon.” Kabay pinaulayan hila etaman.

³⁵ In-akay lay bisero kan Apo Jesus, haka la inamakan pangkēbēl la, bayo himmakay hi Apo Jesus. ³⁶ Inhundo lan Apo Jesus ya pammita lan palakon Jerusalem. Ha pandanan lan Apo Jesus, ay nami-amak hilay atsi bayro hēn pangkēbēl la, gawan ha panggalang la kana. ³⁷ Nahēn andumani hilay na ha palohan ha Tawtgug Olibo, ay nagkanta hila hēn bapan higla, hilay kal-atan ya antoroan na ya anhumonol kana, ta ampuriēn la hi Apo Namalyari, gawan ha nahēlēk lay kapapaēpapah ya dinyag ni Apo Jesus. ³⁸ Ya pamagpuri la ay êmēn di, “Puriēn ya ampamaala ya in-utoh ni Apo Namalyari! Nakapakiúmang kitamo kan Apo Namalyari! Puriēn hi Apo Namalyari!”

³⁹ Amêhēn, bayro ha kal-atan ya anhumonol kan Apo Jesus, ay main ungnoy Pariseo ya naghabi kana, ya wanla, “Mánoro, bawalēn moy tagahonol mo hēn magpuri kamo.” ⁴⁰ Kabay wani Apo Jesus, “Anhabiēn ko kamoyu, no a la kon puriēn hēn habaytsi ya tagahonol ko, ay hilay bato tana ya magpuri kangko.”

Hi Apo Jesus ay nanangih gawan ha kakdêyan nakêm lan taga-Jerusalem

⁴¹ Nahên narani hilan Apo Jesus ha balayan Jerusalem, hên nahêlêk nay balayan, ay tsinangihan nay taga-Jerusalem, ⁴² ta wana, “No muwang yo dayi amêhêñ no hino ya mam-in kapatékbêkan nakêm yo, ay alwa kaw dayin kapaingalo! Noa, a yo muwang. ⁴³ Lumatêng lano ya allo ay libotêñ la kaw hên kapatsi yo êmêñ a kaw makaalih. Bayo hipitêñ la kaw angga ha mamalibot. ⁴⁴ Hiraêñ lay balayan yo angga ha mag-in patag ya ubatan bali yo. Patsêñ lay hinoman ya atsi bayro, gawan a yo dinambi hi Apo Namalyari hên nilumatêng ya hên mamiligtas kamoyu.”

Namitaboy hi Apo Jesus hên ampipagtinda ha Templo

(*Mateo 21:12-17; Marcos 11:15-19; Juan 2:13-22*)

⁴⁵ Amêhêñ, ay hinumwêñ ya hi Apo Jesus ha Templo, ta intaboy na hilay ampipagtinda hên ayop ya gamitêñ ha átang. ⁴⁶ Hinabi na kanla, ya wana, “Nakahulat ha habi ni Apo Namalyari, ya wanana hulat, ‘Ya bali ko ay ambaêgêñ balin panalanginan.’* Noa, dinyag yo yan logal ya panlokoan yon kapareho yo!”†

⁴⁷ Allo-allo ay nanoro ya hi Apo Jesus ha Templo. Noa, labay la yan patsêñ lan máñoron Kautuhan ni apo Moises. Labay la yan patsêñ hên toa ya nag tungkulon ha bansa. Haka labay la ya êt hên patsêñ lan ampamaala kanlan pari. ⁴⁸ Noa, a la ya

* **19:46** Isaias 56:7. † **19:46** Jeremias 7:11.

mapatsi, ta mal-at ya labay-labay hēn manggilam habi na.

20

*No antoy ubatan hēn tungkulan ni Apo Jesus
(Mateo 21:23-27; Marcos 11:27-33)*

¹ Mihay allo hēn atsi ya hi Apo Jesus ha Templo hēn ampamitoro hēn Mangangēd ya Habi, ay dinumani kana hilay mánoron Kautuhan ni apo Moises, ya hilay toa ya nag tungkulan ha bansa, haka hilay ampamaala kanlan pari. ² Hinabi la kana, “Habién mo kannâen no hinoy tungkulan mo hēn manyag hēn pandaygēn mo. Habién mo êt no hinoy nam-i kamô hēn habain ya tungkulan.” ³ Kabay wani Apo Jesus, “Main ako pon hēn kotangēn kamoyu. ⁴ Hinoy nam-i hēn tungkulan kan Juan Bautista hēn mamawtismo? Hi Apo Namalyari o tawo?” ⁵ Kabay pinihahabian la, ya wanla, “Hinoy habién tamo? No habién tamo ya ‘Ubat kan Apo Namalyari ya tungkulan ni Juan Bautista,’ ay habién na bayto, ‘Pata a yo yan pinaniwal-an?’ ⁶ Noa, no habién tamo ya ‘Ubat ha tawo,’ ay batoén la kitamo, hēn kal-atan di, ta ha ihip la, hi Juan ay mihay propeta ni Apo Namalyari.” ⁷ Kabay hinabi la kan Apo Jesus, ya wanla, “A naén muwang no antoy ubatan tungkulan ni Juan Bautista.” ⁸ Bayo wani Apo Jesus, “No êmbayro awud, ay a ko etaman habién kamoyu no antoy ubatan tungkulan ko.”

*In-alimbawa ni Apo Jesus ya sarili na ha anak ya anlugurén ya pinatsi, haka ha bato ya intapon
(Mateo 21:33-46; Marcos 12:1-12)*

⁹ Amêhêñ, nangalimbawa yay na êt hi Apo Jesus, ya wana kanlan ampanggilam, “Minghan main lalaki ya nag luta ya tinamnan nan ubas. Impatsiwala na ha kaatag ya ubasan na, ta maglaêh ya ha kaatag ya bansa. ¹⁰ Hêñ pamutsi hêñ habaytoy ubas, ay in-utoh nay mihay ipoh na, hêñ kowêñ ya atag na kanlan paypaniwal-an ubasan na. Noa, tinumbuk lay ipoh na, bayo impaorong la ya, hêñ ayn anggêtan. ¹¹ Kabay in-utoh nay na êt ya kaatag ya ipoh na, noa, tinumbuk la ya êt, impakarêng-êy la ya, bayo impaorong la ya hêñ ayn anggêtan. ¹² Nahêñ in-utoh nay na êt ya ikatlon ipoh na, ay hinugat-hugat la ya êt, bayo impaplag la ya. ¹³ Kabay, pan-ihip-ihipêñ nan nag ubasan no hino ya daygêñ na. Naihipan nan iutoh ya anlugarêñ nan anak nay lalaki, ta wana, ‘Siguradon igalang lay anak ko.’ ¹⁴ Noa, hêñ nahêlêk lan paypaniwal-an ubasan ya anak nan nag ubasan, ay nihahabi hila, ya wanla, ‘Hatsi ya paypamanaan na hêñ ubasan. Patsêñ tamo ya, ta êmêñ mapagbandi tamo ya hata ubasan na.’ ¹⁵ Kabay pinaalih la ya ha ubasan ta pinatsi la ya.”

Amêhêñ, kinotang ni Apo Jesus hilay ampanggilam, “Hino kaya ya daygêñ hêñ nag ubasan kanlan paypaniwal-an na? ¹⁶ Siguradon lakwêñ nay paypaniwal-an na, ta patsêñ na hila, bayo ipatsiwala nay na ha kaatag ya ubasan na.”

Hêñ nagilam lay habayto, ay wanla, “Paan dayin malyari ya habayto!” ¹⁷ Noa, pinakahêlêk ni Apo Jesus hilay ampamaala ha Templo, ta wana kanla, “Hino awud ya labay habiêñ hêñ habaytsi ya nakahulat ha Kahulatan ya impahulat ni Apo

Namalyari?

‘Ya bato ya intapon lan manyag bali,
ay nag-in pinakamaalagáy bato
ta êmén mag-in napah-êy ya bali.’*

¹⁸ Hilay matata kanan hata bato ay mangatutuk-
ihan but-o, haka hilay matat-an hén hata bato ay
mangatatapong.”

*Ya pamayad hén buwih
(Mateo 22:15-22; Marcos 12:13-17)*

¹⁹ Naintindihan lan mónoron Kautuhan ni apo Moises haka hilay ampamaala kanlan pari, ya hilay in-alimbawa di ha manyag bali, haka ha nangarawak ya paypaniwal-an ubasan, kabay labay la yan tambéng hén dakpén, noa, malimo hila ha kal-atan. ²⁰ Kabay inimattonan la ya haka hila namiutoh hén ungno ya waringan mangéd hila, ya mangotáng kan Apo Jesus. Noa, labay la yan madakép ha pamaghabi na, ta êmén la ya magétan ha kapangyarihan hén gobernador. ²¹ Améhén, hinabi lan hata magbabara kan Apo Jesus, “Mánoro, muwang naén ya kaptégan ya panhabién mo haka panoro mo. An-itoro moy kalabayan ni Apo Namalyari, ha hinoman ya am-panggilam gawan alwa kan mapamili, ta pantag ya panlék mo ha balang miha. ²² Kabay main kay hén labay mamwangan kamo. Ayon ha Kautuhan tamon Israelita, ay malyarin mam-in buwih kanan Emperador o ahé?” ²³ Noa, muwang ni Apo Jesus ya pagbabara la, kabay hinabi na kanla, ya wana, ²⁴ “Ipahlék yo kangko ya mihay sintimos hén pilak. Hinoy nag lupa

* **20:17** Awit 118:22-23.

hêñ angkakit yo bahêñ? Hinoy nag langan ya nakahulat bahêñ?” Hinabi la etaman, “Kanan Emperador.” ²⁵ Kabay wani Apo Jesus, “No êmbayro awud, ay idin yo kanan Emperador ya kana, haka idin yo kan Apo Namalyari ya kan Apo Namalyari.” ²⁶ Kabay a la ya madakêp hi Apo Jesus ha habi na ha arapan lan kal-atan. Ayn hilay nan mahabi ta nag-êpapah hila ha habi na.

*Ya kotang ya tungkol ha pangabiyay oman
(Mateo 22:23-33; Marcos 12:18-27)*

²⁷ Amêhêñ, ay main ungro ha mihay pangkat lan Israelita ya ambaêgêñ Saduseo ya dinumani kan Apo Jesus. Hilay Saduseo ay a ampaniwala ha pangabiyay oman. Haka hinabi la kan Apo Jesus, ya wanla, ²⁸ “Mánoro, nanulat ya hi apo Moises ha Kautuhan hêñ para kantamo, ya wanana hulat, ‘No main mitaahawa, ta natsi ya lalaki hêñ a hila nagkaanak, ay dapat ya kahonol nan natsi, ay ipaahawa kanan bawo. No magkaanak hila, ay habaytoy anak, ay itad anak nan natsi.’ ²⁹ Minghan, ay main pitoy mikakahonol ya lalaki. Nakapag-ahawa ya punganay, noa, natsi ya hêñ a ya nagkaanak. ³⁰ Bayo pinagahawa nan humonol ha punganay ya hata bawo, noa, natsi ya etaman ya humonol ha punganay hêñ a nagkaanak. ³¹ Êmbayro êt ya nalyari ha ikatlon kahonol. Balang miha kanlan pitoy mikakahonol ay nakapag-ahawa hêñ hata babayi, noa, naubuh hilan natsi hêñ a nagkaanak. ³² Bayo natsi ya êt ya hata bawo. ³³ Amêhêñ, ha allon mangoman mabiyay, hinoy nay taganán mag-in ahawa

nan hata babayi, ta balang miha kanlan habaytoy pitoy mikakahonol ay nag-in ahawa na?”

³⁴ Kabay wani Apo Jesus kanlan Saduseo, “Ya pamag-ahawa ay din bêngat amêhén ha luta. ³⁵ Hilay babayi haka lalaki ya an-itad ni Apo Namalyari hên anak na, ya biyayêñ nan oman, ay a hilay nan mag-ahawa ha ikalwan biyay. ³⁶ Manoto hilay na kanlan anghel ha langit, ya a ampag-ahawa, haka a hilay na matsi. Hila ay anak ni Apo Namalyari ta biniyay na hilan oman. ³⁷ Agyan ya hulat ni apo Moises ay ampamaptêg ya biyayêñ oman ya nangamatsi, ta bayro ha hulat na ya tungkol ha maaypa ya kayoy andungkêt, mabáha tamo ya hinabi ni apo Moises hên tungkol kan Apo Namalyari ya hiyay ‘Diyos ni Abraham, Isaac, haka ni Jacob.’[†] ³⁸ Hiyay alwan Diyos lan natsi, noa, hiyay Diyos lan angkabiyay, ta balang miha ya natsi, ay angkabiyay ha hêlêk na.” ³⁹ Main ungno kanlan mánoron Kautuhan ni apo Moises ya naghabi, ya wanla, “Mangêd ya hinabi mo, Mánoro.” ⁴⁰ Hinabilay habayto, ta marêng-êy hilay na hên mangotâng pon kan Apo Jesus.

Hi Cristo, ya Mesias, ay alwan bêngat kaapo-apoan ni Arin David, noa, hiyay Panginoon ni Arin David etaman

(Mateo 22:41-46; Marcos 12:35-37)

⁴¹ Amêhén, hinabi ni Apo Jesus kanla, ya wana, “Ay-êmén lan mahabi ya Mesias, ya Cristo, ya impangakon Mámiligtas ya pinili ni Apo Namalyari hên mamaala ay kaapo-apoan bat ni Arin David? ⁴² Mismon hi Arin David, ya ninuno tamo, ay

† **20:37** Exodus 3:6.

namihulat ha Kahulatan ha Awit hēn tungkol ha Mesias, ya Cristo, ya wana,
 ‘Hinabi ni Apo Namalyari ha Panginoon ko,
 “Mikno ka ha dapit panabtab ko hēn mamaala hēn
 kalamo ko,
 43 angga ha mahambut ko hilay kapatsi mo,
 ta idin ko hila ha aypan kapangyarihan mo.” ’ ’‡
 44 Wana êt ni Apo Jesus, “Hēn hato, ay hi Arin David ya namaêg hēn ‘Panginoon ko,’ ha Mesias, ya Cristo, ya impangakon Mámiligtas ya pinili ni Apo Namalyari hēn mamaala. Kabay muwang tamo, ya hiyay Panginoon haka kaapo-apoan ni Arin David.”

Kaillag ha toro lan mánoron Kautuhan ni apo Moises
(Mateo 23:1-36; Marcos 12:38-40)

45 Kaban ampanggilam hilay kal-atan, ay hinabi ni Apo Jesus kanlan tagahonol na, ya wana,
 46 “Kaillag kaw ha toro lan mánoron Kautuhan ni apo Moises. Labay-labay la hēn mibita-bitā hēn nakatakop hēn makarang, ta êmēn ipamwang ya matag-ay ya tungkulān la. Labay la êt hēn galangēn, haka dayêwēn hila hēn kal-atan ha balayan. Ya kaatag pon ya andaygēn la ta êmēn ipamwang ya matag-ay ya tungkulān la, ay ampilién lay pinakamangêd ya iknoan ha sinagoga haka ha kaluto. 47 Anlokoên la êt ya bawo ya babayi, ta êmēn la makwa ya pibandian la, bayo magma-mangêd hilan ikarang ya panalangin la ha arapan hēn kal-atan. Kabay hadyay pamarusa kanla lano!”

‡ 20:43 Awit 110:1.

21

*Ya alay hêñ mihay bawo ya babayi
(Marcos 12:41-44)*

¹ Kaban atsi ya pon ha Templo hi Apo Jesus, ay napansin na hilay mabandi, ya ampam-in alay la ha pamyanan alay. ² Nadambi na etaman ya mihay bawo ya babayi, ya mairap, ya nam-in loway sintimos ha pamyanan alay. ³ Kabay wani Apo Jesus kanlan tagahonol na, “Pakagilamêñ yo, hata bawo ay nam-i hêñ mal-at kanan indin lan kal-atan mabandi. ⁴ Ta hilay kaatag ay nam-i hêñ a la pon kailangan, noa, hata bawo ay in-ubuh nan indin ya panaliw nan maêkan na.”

*Inungkat ni Apo Jesus ya pamanira hêñ Templo
(Mateo 24:1-2; Marcos 13:1-2)*

⁵ Hilay ungro kanlan tagahonol ni Apo Jesus ay ampihabian lay kahampatan hêñ Templo. No ay-êmêñ kahapat ya bato ya pinaglolog haka ya kahampatan hêñ hino-hino kay na hêñ ya impapdpak ha lolog. ⁶ Amêhêñ, hinabi ni Apo Jesus, ya wana, “Lumatêng lanoy allo, ay manga-aagwat ngan ya hata bato ya pinaglolog ya angkahêlêk yo.”

*Ya hadyay pamairap ya lumatêng
(Mateo 24:3-14; Marcos 13:3-13)*

⁷ Amêhêñ, nangotang hilay tagahonol na kana, “Mánoro, makanon malyari ya habayto, haka ay-êmêñ naêñ mamwangan no maranin malyari ya habayto?”

⁸ Kabay wani Apo Jesus, “Kaillag kaw, ta êmêñ a kaw maloko, ta mal-at ya maghabin êmêñ

di, ‘Hiko ya Cristo ya impangako ni Apo Namalyari. Nilumatêng ya panaon hên anggaan hên luta.’ Yabay ya habiên la, noa, paan kaw maniwala kanla. ⁹ Paan kaw malimo ha magilaman yoy tungkol ha manigulo-gulo haka patsian, ta habayto ay kailangan lumatêng pon, noa, a pon tambêng lumatêng ya anggaan hên luta.” ¹⁰ Amêhén, inhundo nay na êt ni Apo Jesus ya pamaghabí na, ya wana, “Milalaban hilay bansa haka hilay angkalokopan hên mihay bansa ay milalaban ha kabansa la. ¹¹ Lumatêng ya mangakhaw ya layon. Lumatêng êt ya hadyay lonoh haka salot ya ubatan hên hino-hino kay na hên ya hakit ya ikamatsi lan tawo ha mal-at ya logal. Lumatêng êt ya kapalimo haka kapapaêpapah ya mangalyari ha angkahêlêk ha langit.

¹² “Noa, bayo malyari ya habayto, ay dakpêñ la kaw, haka pairapan la kaw, ta gêtan la kaw kanlan toa ya nag tungkulon ha hinon sinagoga, kotangêñ la kaw, bayo ikulung la kaw. Gawan ha paniwala yo kangko, ay gêtan kaw kanlan ari haka gobernador. ¹³ Ha êmbayro ay maipamwang yo kanla ya Mangêd ya Habi tungkol kangko. ¹⁴ Uston iarap la kaw kanlan manungkulon, ay pataniêhén yoy nakêm yo. A kaw manyagah no hinoy habiên yo hên pamakibat ha kotang la, ¹⁵ ta ipaihip ko kamoyu ya mangêd yon habiên, ya a la kayan labanan o hambutêñ hên kapatsi yo. ¹⁶ Miha êt, hila man ya toa yo, kapotoh pohêl yo, kaatag êt ya kamag-anak yo, haka hilay kaluguran yo ay may-upit kamoyu, kabay ya kaatag kamoyu ay patsêñ. ¹⁷ Kahêmêkan kaw hên kal-atan gawan paniwala

yo kangko. ¹⁸ Noa, a na kaw paulayan ni Apo Namalyari, ta miha man ya habot ulo yo, ay a miabot ha impiyerno. ¹⁹ Têêhêñ yoy habayto, ta êmén kaw madyanan hêñ biyay ya ayn angga.”

Inungkat ni Apo Jesus ya pamanira ha balayan Jerusalem

(*Mateo 24:15-21; Marcos 13:14-19*)

²⁰ “Uston mahêlêk yoy balayan Jerusalem ya napalibutan hêñ hundaloh, ay mamwangan yoy na bayto ya marani yana ya pamanira kana. ²¹ Ha allon habayto ay kailangan muwayun magtago ha babo, ya hilay taga-probinsyan Judea. Hilay atsi ha balayan Jerusalem ay kailangan hêñ mag-alih. Hilay atsi ha pananêman la, ay paan mag-orong ha balayan. ²² Gawan habaytoy panaon hêñ pamarusa, ta êmén matupad ya nakahulat, ya impamwang lan mámpamwang hêñ an-ipaihip kanla ni Apo Namalyari hêñ hato. ²³ Kanan habayto, ay kaingalo hilay nabuktot haka hilay ampamahoho, ta mabyat ya kairapan ya maranasan la di ha luta, ta ya tobag ni Apo Namalyari ay lumatêng kanlan Israelita. ²⁴ Main hêñ matsi ha gulo, bayo ya kaatag ay gêtan ta ikulung ha marayo ya bansa. Ya balayan Jerusalem ay pakahiraên lan alwan Israelita, ya a ampagpalokop kan Apo Namalyari, angga ha mayari ya panaon ya indin kanla.”

Ya pamanlumatêng oman ni Apo Jesus ya Taga-Langit, ya In-anak Tawo

(*Mateo 24:29-31; Marcos 13:24-27*)

²⁵ Wana êt ni Apo Jesus, “Pangayarin habaytoy hadayay kairapan, ay mahêlêk yoy kapapaêpapah ha allo, ha buwan, haka ha bêtêwêñ. Alwan

bêngat habayto, noa, man-awk êt ya tandulon ha dagat kabay manyagah hilay tawo ha balang bansa. ²⁶ Hilay tawo ay mangabunsol, gawan hadyay limo la kaban an-ihipên lay angkalyari ha boon luta, ta mayêgyêg hilay bêtêwêh haka maubuh hên mangayêgyêg ya angkahêlêk ha langit. ²⁷ Kanan habayto, ay mahêlêk la ko ha lêmm, ya Taga-Langit, ya In-anak Tawo, ya anlumatêng, hên main kapangyarihan, haka ya kapahilêw ya kahampatan ni Apo Namalyari.” ²⁸ Wanay na êt ni Apo Jesus kanlan tagahonol na, ya wana, “No magumpisan malyari ya habayto ya kapapaêpapah, ay pataniêhêh yoy nakêm yo, ta marani yanay pangakbus kamoyu.”

*Ya toro ya makwa ha poon kayon igos
(Mateo 24:32-35; Marcos 13:28-31)*

²⁹ Bayo wani Apo Jesus hên nangalimbawa, “Hêlkên yoy poon kayon igos, haka kaatag êt ya poon kayo. ³⁰ No mamayo yan bulong, ay muwang yoy na ya marani yanay kaingitan. ³¹ Embayro êt, no mahêlêk yoy nan maubuh hên malyari ya habayto ya kapapalimo, ay mamwangan yoy marani yanay pamanlokop ni Apo Namalyari. ³² Pakagilamên yo. Maubuh hên matupad ya habayto kaban main pon di ha luta hên kapareho yon Israelita. ³³ Ya angkahêlêk ha langit, haka ya luta ay main anggaan, noa, ya habi ko ay ayn anggaan.”

Dapat panay hên nakal-an

³⁴ Hinabi nay na êt ni Apo Jesus, ya wana, “Kaillag kaw ta êmên a kaw mipahobohob ha kahibaan, pamaglahing, haka kayagahan ha kailangan yo

ha biyay di ha luta. Ta êmén a kataw malatngan ya a nakal-an ha allon pamanlumatêng kon oman. ³⁵ Gawan ha biglan lumatêng ya habaytoy allo, ay maubuh hên mabigla hilay tawo ha boon luta. ³⁶ Kabay kailangan panay kaw nakal-an ha balang oras. Dapat panay kaw manalangin ya dyanan na kaw hên hêkaw, ta êmén a kaw mahambut hên hinoman ya angkalyari di, ta êmén kaw makapakiarap kangko, ya Taga-Langit, ya In-anak Tawo.”

³⁷ Allo-allo ay ampanoro ya hi Apo Jesus ha Templo ya atsi ha balayan Jerusalem. Balang yabi ay anlumakat ya ha Tawgtug Olibo ta bayro yan ampagdahêl. ³⁸ Kabay maranon hên allo-allo, ay ampammita ya kal-atan, hên manggilam toro na ha Templo.

22

Ya pamamulong kan Apo Jesus (Mateo 26:1-5; Marcos 14:1-2; Juan 11:45-53)

¹ Amêhêñ, ay marani yanay pista lan Israelita ya ambaêgêñ lan Pistan Puto ya ayn Pampaalsa haka ya Pistan Pangaligtas ha Egipto.* ² Hilay mánoron Kautuhan ni apo Moises, haka hilay ampamaala kanlan pari, ay ampamulong kan Apo Jesus, no ay-êmén la yan maipapatsi hên ayn makamwang, gawan malimo hila ha kal-atan, ya ampanggilam toro na.

In-upit ni Judas Iscariote hi Apo Jesus (Mateo 26:14-16; Marcos 14:10-11)

* **22:1** Paskwa. Hêlkên ha panlêkan labay habiêñ hên habi di ha bokotan hên hata Bibliya.

³ Amêhêñ, hi Satanas ay hinumapat kan Judas, ya ambaêgêñ lan Iscariote, ya miha kanlan labin-loway tagahonol ni Apo Jesus. ⁴ Kabay nammita yay na hi Judas hêñ makihabi kanlan ampamaala kanlan pari haka kanlan ampamaala kanlan bantay ha Templo, no ay-êmêñ na mai-upit hi Apo Jesus. ⁵ Hinumigla hila etaman ya i-upit ni Judas hi Apo Jesus kanla, haka nangako hila ya dyanan la yan pera. ⁶ Nabay ya etaman hi Judas, kabay paubat hêñ habayto, ay ampangihip yay na no ay-êmêñ na yan maidin ha gamêt la, hêñ a mamwan-gan hêñ kal-atan.

*Hi Apo Jesus ay namipal-an hêñ pangkaêñ la ha
Pistan Pangaligtas ha Egipto*

(Mateo 26:17-25; Marcos 14:12-21; Juan 13:21-30)

⁷ Amêhêñ, nilumatêng ya unan allo hêñ Pistan Puto ya ayn Pampaalsa. Habaytoy allon pamatsi lan Israelita hêñ anak tupa, ya kênaêñ la no man-aboy nay allo hêñ habayton yabi hêñ Pistan Pangaligtas ha Egipto.† ⁸ Namipal-an hi Apo Jesus kan Pedro haka kan Juan hêñ pangkaêñ ha Pistan Pangaligtas, ta wana, “Mita kaw na, ta il-an yoy pangkaêñ tamo amêhêñ yabi ha pista.” ⁹ Kabay nangotang hilan Pedro, “Atoy labay moy legal ya pangil-anan naêñ hêñ kaêñ tamo?” ¹⁰ Wani Apo Jesus, “Panlumatêng yo ha balayan Jerusalem, ay matupa yoy mihay lalaki ya ampantan banga ya nag lanêm. Pakihonolan yo ya ha bali ya howêñêñ na, ¹¹ ta habiêñ yo ha nag bali, ya êmêñ di, ‘Labay nan Mánoro ya itoro mo kannaêñ, no

† **22:7** Paskwa.

antoy kuwarto ya panganan nan kaên ha Pistan Pangaligtas, hên kalamo na kay ya tagahonol na.’ ¹² Kabay ipahlêk na kamoyu ya mihay mahlay ya kuwarto ya nakal-an ha tag-ay. Bayro yon il-an ya kaên tamo ha pista.” ¹³ Nammita hilay nay loway tagahonol, haka natupad ya balang hinabi ni Apo Jesus kanla. Kabay in-il-an lay nay kaên ha pista.

*Nangan hi Apo Jesus haka hilay labinloway apostol na hên pangkaên ha Pistan Pangaligtas
(Mateo 26:26-30; Marcos 14:22-26; 1 Corinto 11:23-25)*

¹⁴ Hêñ oras hêñ mangan hêñ pangkaên ha Pistan Pangaligtas, ay inarap lan Apo Jesus ya kaên la. ¹⁵ Amêhêñ, wana kanlan labinloway apostol na, “Bayo ko magdanas hêñ pamagdusa, ay boon nakêm kon labay hêñ mapagkaêm kataw pon hêñ mangan hêñ habaytsi ya pangkaên ha Pistan Pangaligtas. ¹⁶ Anhabîen ko kamoyu, ya a kina oman mangan pangkaên ha Pistan Pangaligtas angga ha a pon matupad ya labay habiên hêñ habaytsi ha pamanlokop ni Apo Namalyari.” ¹⁷ Amêhêñ, dinampot nay pamminêman ya nag alak ta impahalamat nay hatsi kan Apo Namalyari, bayo hinabi na kanla, ya wana, “Piatagan yoy hatsi laamêhêñ. ¹⁸ Ta anhabîen ko kamoyu, ya a ko pon minêm oman hêñ alak, angga ha a pon lumatêng ya pamanlokop ni Apo Namalyari.” ¹⁹ Amêhêñ, nadampot yan puto ta impahalamat nay habayto kan Apo Namalyari, haka na pino-potoh, bayo inggawang na kanla, ta wana, “Habaytsi ya lawini ko, ya an-idin ko ha ikakangêd yo. Dapat panay yon daygêñ ya habaytsi, ta êmên yo ko maihipan.”

²⁰ Émbayro êt, hêñ nayari hilan nangumapon, ay nandampot yan pamminêman ya nag alak, ta wana, “Habaytsi ya daya ko, ya mamoganggang ha pamatawad hêñ kasalanan hêñ kal-atan. Yabay ya nanad pinakapirma hêñ bayoy kahundoan ni Apo Namalyari kanlan pinili na hêñ mag-in kana.

²¹ “Noa, ya mihay kaaêm tamo di, ay mangi-upit kangko. ²² Hiko ya Taga-Langit, ya In-anak Tawo ay taganán matsu, ta habaytoy tinalagá ni Apo Namalyari. Noa, taganán kaingalo ya mangi-upit kangko.” ²³ Amêhêñ, ampikokotang hilay labinlowa no hino kanla ya manyag hêñ êmbayro.

Ya pamihubak lan tagahonol ni Apo Jesus no hino kanla ya main matag-ay ya tungkulan

²⁴ Ampihuhubakan lan tagahonol ni Apo Jesus no hino kanla ya main matag-ay ya tungkulan.

²⁵ Kabay hinabi ni Apo Jesus kanla, ya wana, “Hilay ari haka hilay kaatag ya ampamaala, ay ampamiyatay kanlan atsi ha lokop la hêñ manyag kalabayan la, yan labay la êt hêñ mabaêg hila hêñ maingaloén. ²⁶ Noa, dapat alwan êmbayro kamoyu, ta ya pinakamatag-ay, ay dapat mag-in pinakamaaypa. Haka ya ampamaala, ay kailangan maghuyo. ²⁷ Hino ya matag-ay ya tungkulan? Ya ampikno ha lamisaan, o ya ampamigawang hêñ hinon kailangan nan ampikno? Taganán habaytoy ampikno ya nag tungkulan! Noa, hiko ay atsi di hêñ nanad ha mihay ampaghuyo.

²⁸ “Hikaw ay panay kon nakalamo, ha kairapan man ya dinanan ko, ya nanad pamanubuk kangko. ²⁹ Kabay, no ay-êmêñ nan indin kangko ya tungkulan hêñ mamaala, ni Apo Namalyari,

ya Tatang ko, ay êmbayro êt ay dyanan kataw hêñ tungkulan hêñ mamaala. ³⁰ Lano ay mapagkalamo kataw hêñ mangan ha lamisaan ya atsi ha pamanlokop ko. Mikno kaw ha iknoan hêñ ari ta mamaala kaw kanlan Israelita, ya hilay kaapoapoan lan labinloway anak ya lalaki ni apo Israel.”

Impamwang ni Apo Jesus ya habiên ni Simon Pedro ya a na ya muwang
(Mateo 26:31-35; Marcos 14:27-31; Juan 13:36-38)

³¹ “Simon, manggilam ka,” wani Apo Jesus, “Nakihabi hi Satanas kan Apo Namalyari ya subukêñ na kaw ya labinloway tagahonol, haka paulayan na ya ni Apo Namalyari. ³² Noa, inhalangin kata Simon, ya a dayin maalíh ya paniwala mo kangko. Haka ha pag-orong hêñ nakêm mo ay dapat mon pataniêhêñ ya nakêm hêñ kapareho mon ampaniwala.” ³³ Kabay hinabi ni Simon Pedro, ya wana, “Panginoon, nakal-an akon magpakulung haka matsu hêñ kalamo mo.” ³⁴ “Pedro,” wani Apo Jesus, “pakagilamêñ mo, bayo mangkatsi ya manok amêhêñ yabi, ay katatlo mon habiên ya a mo ko muwang.”

Ya aral ni Apo Jesus kanlan tagahonol na

³⁵ Amêhêñ, hinabi ni Apo Jesus kanlan tagahonol na, ya wana, “Yarin nagkulang kaw hêñ in-utoh kataw hêñ ayn pera, ayn balutan, haka ayn pag-apin bitsih yo!” “A kay, Apo,” wanla etaman. ³⁶ “Noa, amêhêñ, ya balang miha ya main, ay kailangan mantan pera haka balutan la. Haka hilay ayn panlaban ay kailangan manaliw hilan panlaban la, ihaliw la man ya takop la, ta

êmén hila main hén panaliw. ³⁷ Ta kailangan matupad ya nakahulat ya tungkol kangko bayro ha Kahulatan ya impahulat ni Apo Namalyari kan Propeta Isaias, ya wana, ‘Intad la yan mapanyag karawakan.’[‡] Haka ya inhulat ya tungkol kangko ay angkatupad améhén.” ³⁸ Kabay hinabi lan tagahonol na, “Panginoon, hélkén moy hatsi. Main kitamo hén loway êtak ya panlaban.” Wana etaman ni Apo Jesus, “Hukad ya.”

*Nanalangin hi Apo Jesus ha Tawtgug Olibo
(Mateo 26:36-46; Marcos 14:32-42)*

³⁹ Nahén ubat hilan nangan pangkaén ha Pistan Pangaligtas, ay nammita hilan Apo Jesus ha Tawtgug Olibo, ya panlakwén la no yabi. ⁴⁰ Hén nilumaténg hilay na bayro, ay hinabi ni Apo Jesus kanlan tagahonol na, ya wana, “Manalangin kaw kan Apo Namalyari, ta êmén a kaw mahambut hén tukso.” ⁴¹ Napaidayo ya kanla hén marayo-dayo ta nandoko yan nanalangin, ya wana, ⁴² “Tatang ko ha langit, no labay mo, ay a mo ko dayin paulayan hén magdanas ako hén hatsi ya mabyat ya kairapan ya lumaténg kangko. Êmbayro man, alwan kalabayan ko, noa, ya kalabayan mo ya honolén ko.” ⁴³ Kaban ampanalangin ya ay nagpahlék kana ya mihay anghel, ya ubat ha langit, ya namahékaw kana. ⁴⁴ Gawan ha kabyatan laman ihip na, ay lalo nan imboo ya nakém na ha panalangin, kabay ya hayngét na, ay nanad daya ya ampantolo ha luta.

⁴⁵ Hén niréng ya, hén ubat nanalangin, ay nag-orong yay na ha andyanan lan tagahonol na. Nalatngan na hila hén angkabélèw gawan

[‡] **22:37** Isaias 53:12.

hadyay lungkot la. ⁴⁶ Pinukaw na hila, ta wana kanla, “Pata angkabêlêw kaw? Mimata kaw, haka kaw manalangin ta êmén kaw a mahambut§ hên tukso.”

*Ya pamandakêp kan Apo Jesus
(Mateo 26:47-56; Marcos 14:43-50; Juan 18:3-11)*

⁴⁷ Kaban ampaghabi ya pon hi Apo Jesus, ay main nilumatêng ya kal-atan, ya ampangamat kan Judas Iscariote ya miha kanlan labinloway tagahonol na. Dinumani ya kan Apo Jesus ta aroén na ya dayi. ⁴⁸ Noa, wani Apo Jesus kan Judas, “Aro awud ya pinay-upit mo kangko, ya Taga-Langit, ya In-anak Tawo.” ⁴⁹ Hêñ nahêlêk lan tagahonol, ya kalamo ni Apo Jesus, ya angkalyari, ay wanla, “Panginoon, labay mon gamitêñ naêñ ya hata panlaban naêñ?” ⁵⁰ Amêhêñ, bat yan nanigpah ya miha kanlan tagahonol na hêñ têkk hêñ mihay ipoh hêñ pinakapoon pari. ⁵¹ Noa, wani Apo Jesus, “Paan!” Tinalan nay têkk, ta in-orong na ya ha mana, ya hatoy têkk.

⁵² Amêhêñ, wani Apo Jesus kanlan ampagbantay ha Templo, kanlan toa ya nag tungkulon ha bansa, haka kanlan ampamaala kanlan pari, ya ampipandakêp kana, “Andakpêñ yo ko hêñ nanad pandakêp ha mapanyag karawakan. ⁵³ Allo-allo atsi ko bahêñ kamoyu ha Templo, unin a yo ko dinakêp. Noa, amêhêñ ya panaon yo, haka panaon ya indin kan Satanas, ta êmén na madyag ya karawakan ya labay nan daygêñ.”

Katatlo nan hinabi ni Pedro ya a na balay hi Apo Jesus

(*Mateo 26:57-58, 69-75; Marcos 14:53-54, 66-72; Juan 18:12-18, 25-27*)

⁵⁴ Dinakêp la hi Apo Jesus ta gintan la ya ha bali nan pinakapoon pari. Hi Pedro ay nangamat kanla ha marayo-dayo. ⁵⁵ Hên nilumatêng hilay na ha balin pinakapoon pari ay namagkêt hilan apoy, kabay nakilamo hi Pedro kanlan ampanêngéy bayro. ⁵⁶ Hên napansin yan mihay ipoh ya babayi, ha hawang hên apoy, ay pinuliah na ya, ta wana, “Habain ya lalaki ay kalamo ni Jesus.” ⁵⁷ Noa, hinabi ni Pedro, ya wana, “Alwa. A ko ya man muwang.” ⁵⁸ A nabuyot ay napansin yay na êt hi Pedro, hên mihay lalaki, ya naghabi, “Miha ka êt kanla!” Noa, hinabi na etaman ni Pedro, “Alwan hiko.” ⁵⁹ Hên nakalabah ya miha êt ya oras, ay main ana êt mihay lalaki ya ampamilit, ya wana, “Siguradon hata lalaki ay kalamo ni Jesus gawan taga-Galilea ya êt.” ⁶⁰ Noa, hinabi ni Pedro, ya wana, “A ko muwang ya panhabiên mo!” Kaban ampaghabi ya pon, ay nangkatsi ya mihay manok. ⁶¹ Namalingay hi Apo Jesus ta pinakahêlêk na hi Pedro. Kabay naihipan ni Pedro ya hinabi ni Apo Jesus kana ya, “Bayo mangkatsi ya manok amêhêñ yabi, ay katatlo mon habiêñ, ya a mo ko muwang.” ⁶² Kabay inumawah ya hên hadyay tangih na.

Kinailyan la hi Apo Jesus haka la ya tinumbuk
(*Mateo 26:67-68; Marcos 14:65*)

⁶³ Hi Apo Jesus etaman ay kinailyan haka tinumbuk hên ampipagbantay kana. ⁶⁴ Tinagpênan lay mata na hên panyo haka la ya kinotang, “Hinoy

nanumbuk kamo? Habiên mo!” ⁶⁵ Mal-at êt ya kaatag ya hinabi la, ya pammusmus kana.

*Hi Apo Jesus ay in-arap ha Sanedrin
(Mateo 26:59-66; Marcos 14:55-64; Juan 18:19-24)*

⁶⁶ Pangamaranon, ay ni-tsi-tsipon hilay kalamo hêñ Sanedrin, ya angkaboo hêñ toa ya nag tungkul-an ha bansa, boy hilay ampanoro hêñ Kautuhan ni apo Moises, haka hilay ampamaala kanlan pari. In-arap kanla hi Apo Jesus ta lingonêñ lay kasona, ya wanla, ⁶⁷ “Habiên mo kannâen no hika ya Mesias, ya Cristo, ya pinili ni Apo Namalyari hêñ mag-in habaytoy Mámilitgas ya impangako na.” Noa, wana kanla, “Agyan habiên ko kamoyu, ay a yo ko paniwal-an. ⁶⁸ Haka no kotangêñ kataw, ay a kaw man makibat. ⁶⁹ Noa, ubat amêhêñ, hiko, ya Taga-Langit ya In-anak Tawo, ay mikno ha dapit panabtab ni Apo Namalyari ya Makapang-yarihan.” ⁷⁰ Kabay wanla, “No êmbayro awud, ay anhabiên mo ya hika ay Anak ni Apo Namalyari.” Bayo wani Apo Jesus, “Awo, hikaw nay ampaghabin hikoy habayto.” ⁷¹ Kabay wanla, “A tamina kailangan hêñ kaatag êt ya tistigos, ta nagilaman tamina ya hinabi na.”

23

*Hi Apo Jesus ay in-arap kan Gobernador Pilato
(Mateo 27:1-2; 11:14; Marcos 15:1-5; Juan 18:28-38)*

¹ Amêhêñ, naubuh hilan nirêng ya kalamo hêñ Sanedrin, ta gintan la ya hi Apo Jesus hêñ in-arap kan Gobernador Pilato, ya gobernador hêñ

probinsyan Judea. ² Binad-an la ya, ya wanla kan Gobernador Pilato, “Narakêp naên ya habaytsi. Alwan mangêd ya panhabiên na ha kal-atan, ya a hila kano kailangan hên mamayad hên buwih ha pinakapoon ha bansan Roma, haka hiya kano ya Mesias, ya Cristo, ya mihay ari.” ³ Amêhêñ, kinotang ni Gobernador Pilato hi Apo Jesus, ya wana, “Awta? Hika ya ari hên Israelita?” Hinabi etaman ni Apo Jesus, “Hinabi mina, Gobernador.” ⁴ Kabay wani Gobernador Pilato kanlan poon pari haka kanlan kaatag, “Ayn akon angkahêlêk ya ikadikil hên hata lalaki.” ⁵ Noa, lalo lan impalêkpêk, ya wanla, “Gawan ha panoro na di ha probinsyan Judea, ay nahulhulan hilay nay tawo hên manobag ha gobyernon Roma. Nag-umpisa yan nanoro ha probinsyan Galilea, bayo amêhêñ atsi yay na di.”

Hi Apo Jesus ay in-arap kan Gobernador Herodes Antipas

⁶ Hêñ nagilaman ni Gobernador Pilato ya habaytsi, ay kinotang na no taga-probinsyan Galilea hi Apo Jesus. ⁷ Hêñ namwangan ni Gobernador Pilato ya hi Apo Jesus ay taga-probinsyan Galilea awud, ya sakop ni Gobernador Herodes Antipas, ay in-utoh na hêñ gêtan la ya hi Apo Jesus kana, ta atsi ya etaman bayro ha Jerusalem hêñ habayto. ⁸ Hadyay higla ni Gobernador Herodes Antipas hêñ nahêlêk na hi Apo Jesus, gawan mal-at ya nagilam na, ya tungkol kana, haka nabuyot nay nan labay mahêlêk ya kapapaêpapah ya dyag na. ⁹ Kabay pinagkokotang ni Gobernador Herodes Antipas hi Apo Jesus.

Noa, a ya naghabi hi Apo Jesus. ¹⁰ Hadyay huluk lan poon pari haka hadyay huluk lan mánoron Kautuhan ni apo Moises ha pamara la kan Apo Jesus. ¹¹ Hi Apo Jesus ay pinagmumusmus haka kinailyan ni Gobernador Herodes Antipas haka hilay hundaloh na. Ha pammusmus la kana ay pinatakopan la ya hén mahampat ya nanad takop hén ari, bayo impaorong la ya kan Gobernador Pilato. ¹² Hén hato, ay mikapatsi hi Gobernador Pilato haka hi Gobernador Herodes Antipas, noa, habayton allo êt ay napolugud hilay nay lowa.

*Hi Apo Jesus ay hinatolan hén matsi ha koros
(Mateo 27:15-26; Marcos 15:6-15; Juan 18:39--
19:16)*

¹³ Pinatsipon ni Gobernador Pilato hilay ampa-maalang kanlan pari, hilay kaatag ya ampamaala, haka hilay kal-atan Israelita. ¹⁴ Ta wana kanla, “Gintan yo ya hatsi ya lalaki kangko gawan alwa kanon mangêd ya panoro na kanlan kal-atan. Pinakakotang ko ya, noa, ayn akon nahêlêk kana ya kasalanan ya an-ibara yo kana. ¹⁵ Hi Gobernador Herodes Antipas man, ay ayn yan nahêlêk kanay kasalanan, kabay impaorong na ya kantamo di. Ayn yan dinyag ya pamatsan kana. ¹⁶ Kabay ipalatiko ko ya tana, bayo ibuhan ko ya.” ¹⁷ (Balang Pistan Pangaligtas ha Egipto,* ay kailangan ni Gobernador Pilato hén ibuhan ya miha kanlan nakahukul.)

¹⁸ Noa, ya kal-atan ay nan-angaw, ya wanla, “Patsên hi Jesus! Hi Barrabas tana ya labay naêñ

* **23:17** Paskwa. Hêlkêñ ha panlêkan labay habiêñ hén habi di ha bokotan hén hata Bibliya.

hêñ ibuhan mo!” ¹⁹ (Nakahukul hi Barrabas gawan nakilamo ya kanlan kal-atan ya nanyag hêñ halanghang ha gobyernon Roma ha balayan Jerusalem, haka gawan namatsi yan tawo.)

²⁰ Labay na dayi ni Gobernador Pilaton mibuhan hi Apo Jesus, kabay naghabi yan oman ya ibuhan dayi hi Apo Jesus. ²¹ Noa, in-angaw la, ya wanla, “Ipako ya ha koros! Ipako ya ha koros!”

²² Katatlo nan hinabi ni Gobernador Pilato, ya wana, “Awta? Hinoy kasalanan na? Ayn akon nahêlêk kana ya pamatsan kana. Ipalatiko ko ya tana, bayo ibuhan ko ya.”

²³ Noa, impapakaangaw lan poon pari haka lan kaatag, ya ipako ya ha koros. Kabay ayn yay nan madyag hi Gobernador Pilato. ²⁴ Pinaulayan na hilay na ha kalabayan la. ²⁵ Hinonol nay kalabayan lan kal-atan, ta imbuhan na hi Barrabas, ya nakahukul gawan nanalanghang ya ha goberno, haka gawan namatsi yan tawo. Indin na ya hi Apo Jesus ha gamêt la, ta êmên la madyag ya kalabayan la.

Hi Apo Jesus ay impako ha koros

(Mateo 27:32-44; Marcos 15:21-32; Juan 19:17-27)

²⁶ Amêhêñ, gintan la hi Apo Jesus hêñ hundaloh ta ipako la ya ha koros. Ha pammita la ay nakatupa hila hêñ mihay lalaki ya nag langan Simon ya taga-Cirene, ya anhumwêñ ha balayan. Dinakêp la ya ta impabalangaw lay koros kana hêñ ampakihonol kan Apo Jesus.

²⁷ Hadyay kal-atan ya hinumonol kana. Kalamo la ya kaatag ya babayi ya hadyay tangih, ta antangihan la ya. ²⁸ Namalingay hi Apo Jesus, ta wana kanla, “Hikaw ya babayi ya taga-Jerusalem, paan yo ko tangihan, noa, tangihan yoy sarili yo haka maának yo, ²⁹ ta lumatêng lano ya allo ya habiên la, ya iningalwan hilay a nakaanak haka a namahoho. ³⁰ Habaytoy panaon ay habiên la kanlan tawtgug, ya wanla, ‘Gêymaan yo kay.’ Wanla êt kanlan bung-oy, ‘Taphonan yo kay.’ ³¹ Ta no êmên di ya daygên la ha kayoy nailê, ay hino bayto ya daygên la ha kayoy nayango?†”

³² Main êt loway lalaki, ya parehon mapanyag karawakan ya gintan hên patsên kalamo ni Apo Jesus. ³³ Hên nilumatêng hila ha legal ya ambaêgên lan Golgota o Bungo, ay bayro la hilan impako hên hundaloh, ha tatloy koros. Ya miha ay atsi ha koros ha dapit panabtab ni Apo Jesus, haka ya miha ay atsi ha koros ha dapit uki na. ³⁴ Amêhêñ, nanalangin ya hi Apo Jesus, “Tatang ko ha langit, patawarên mo hila ta a la muwang ya pandaygên la.” Hilay hundaloh etaman, ay nangwan takop ni Apo Jesus ta inatag-atag lan píngpalabonutan. ³⁵ Mal-at ya atsi bayro hên ampanlêk kaban ammusmüsén la ya hén ampamaala ha Templo, ya wanla, “Inligtas nay kaatag. No hiya ya Mesias, ya Cristo, ya impangakon Mámilitgas ya pinili ni Apo Namalyari hén mamaala, pata a na mailigtas ya sarili na!” ³⁶ Hilay hundaloh ay nammusmus

† **23:31** Mal-at ya maghabin ya labay habiên hatsi ay no êmên di ya daygên la kan Apo Jesus ya ayn kasalanan ay mabyat êt ya daygên la kanlan Israelita ya main kasalanan.

kana etaman. Painêmén la ya dayin nangihoy alak,³⁷ ta wanla kana, “No hika ya Ari lan Israelita, iligtas moy sarili mo!”³⁸ Atsi ha koros, ha ugton ulo na, ya nakahulat (ha habin Griego, Latin, haka Hebreo), ya wanana hulat, “Hatsi ya Ari lan Israelita.”

³⁹ Minusmus ya êt hêñ miha kanlan loway mapanyag karawakan ya nakapako ha koros hêñ karani na, ya wana, “No hika ya Mesias, ya Cristo, ya impangakon Mámiligtas ya pinili ni Apo Namalyari hêñ mamaala, ay iligtas moy sarili mo, haka hikay.”⁴⁰ Noa, tinobag na yan kapareho nan mapanyag karawakan, ya wana, “Ayn kan limo kan Apo Namalyari? Pare-pareho kitamon amparusaan hêñ patsên.”⁴¹ Hêpat kanta ya habayto ta nakadyag kitán kasalanan, noa, hiya etaman, ay ayn yan kasalanan.”⁴² Bayo hinabi na kan Apo Jesus, ya wana, “Apo, a mo kon liwaan, ustón ampamaala kay na.”⁴³ Kabay, hinabi ni Apo Jesus kana, ya wana, “An-ipangako ko kamo, ya amêhêñ êt, ay mapagkalamo mo ko ha langit, ha Paraiso.”

Ya pangamatsi ni Apo Jesus

(Mateo 27:45-56; Marcos 15:33-41; Juan 19:28-30)

⁴⁴ Hêñ marani yanay ugtoy allo, ay dinumiglêm ya boon luta angga ha alas tres hêñ maapon.⁴⁵ Sakton dinumiglêm, ay biglan nawakwak hêñ napibonak ya makogpaw ya takop ya pinagpênlán bayro ha lalê hêñ Templo ha Jerusalem. ⁴⁶ Amêhêñ, nan-angaw hi Apo Jesus hêñ hadyay hêkaw, ya wana, “Tatang ko ha langit, ipaulay kina kamo ya kaélwa ko.” Hêñ nayari nan

hinabi ya habayto ay natsi yay na. ⁴⁷ Hêñ nahêlêk nan ampamaala kanlan hundaloh, ya pangamatsi ni Apo Jesus, ay pinuri na hi Apo Namalyari, ya wana, “Pêtêg bay awud! Ayn yan kasalanan ya habaytsi!” ⁴⁸ Hêñ nahêlêk lan kal-atan ya ni-tsitsipon, ya nalyari, ay nuli hila hêñ andugdugêñ lay pagaw la, gawan hadyay lungkot la. ⁴⁹ Noa, hilay kabalay ni Apo Jesus, kalamo hilay babayi ya nakihonol kana hêñ nanaglap kana, hêñ paubat ha probinsyan Galilea, ay nakairêng ha marayodayo kana, ta andungawan lay angkalyari.

Ya pamilbêng kan Apo Jesus

(Mateo 27:57-61; Marcos 15:42-47; Juan 19:38-42)

⁵⁰ Main bayro hêñ mihay lalaki, ya hi Jose, ya taga-balayan Arimatea ha probinsyan Judea. Hiyay mapanyag kangêran haka anhumonol ya ha Kautuhan ni apo Moises. Hiyay mihay kalamo hêñ Sanedrin. ⁵¹ Noa, a ya nakiyon ha dinyag la kan Apo Jesus. Pan-êngganan nay pamanlokop ni Apo Namalyari. ⁵² Dinumani ya kan Gobernador Pilato, ta pinakikwaan nay bangkay ni Apo Jesus, ta iilbêng na ya. Nabay ya etaman hi Gobernador Pilato. ⁵³ Kabay kingwa ni Jose ya bangkay ni Apo Jesus, hêñ in-aypa, haka na kinêlkêlan hêñ makarang ya takop, ya naputsi. Bayo inhowên na ya ha pay-ilbêngan ha lêyang ya bato, ya a êt pinay-ilbêngan. ⁵⁴ Hêñ habayto ay allon pamaglêan ha allon pamagsimba lan Israelita.

⁵⁵ Hilay babayi ya nakihonol kan Apo Jesus ya ubat ha probinsyan Galilea, ay nakilako kan Jose. Nahêlêk lay pinay-ilbêngan kan Apo Jesus haka no

ay-êmên inhowên bayro ya bangkay na. ⁵⁶ Bayo nag-orong hilay na ha balayan, ta namil-an hilan pabango, ya idin la ha bangkay ni Apo Jesus.

A la tambêng nagêtan kanay habaytoy pabango, ta nagpainawa hila ha allon Sabado ha pamanhumentol ha Kautuhan.

24

Hi Apo Jesus ay nabiyay oman

(Mateo 28:1-10; Marcos 16:1-8; Juan 20:1-10)

¹ Dali allo êt hèn allon Dominggo, ay nammita hilay nay babayi ha pinay-ilbêngan ta idin lay hatoy pabango ya in-il-an la ha bangkay ni Apo Jesus. ² Nalatngan lay natulid anay hadyay hêlay bato, ya intakap ha lêyang ya pinay-ilbêngan kan Apo Jesus. ³ Kabay hinumwêñ hila, noa, a la matapol ya bangkay ni Apo Jesus. ⁴ Kaban ampikokotang hila no hinoy nalyari ha bangkay ni Apo Jesus, ay bigla lan nahêlêk ya loway lalaki, ya nakatakop hèn ampangislap, ya nakairêng ha dani la. ⁵ Gawan hadyay limo la, ay nandoko hilan napaidêngdêng. Hinabi kanla hèn loway lalaki, “Awta pantapolèñ yoy nabiyay ha pay-ilbêngan hèn natsi? ⁶ Ayn yay na di, ta nabiyay yan oman. Ihipêñ yoy hinabi na kamoyu bayro ha probinsyan Galilea, ya ⁷ hiya, ya Taga-Langit, ya In-anak Tawo ay idin ha gamêt lan makasaralan. Ipako la ya ha koros. Bayo pangaubat hèn tatloy allo ay mabiyay yan oman.”

⁸ Amêhêñ, naihipan lan babayi ya habaytoy hinabi na. ⁹ Kabay nag-orong hilay na ha balayan, ta inhumbung la ha labinmiha haka kanlan kalamo la ya nalyari. ¹⁰ Ya namihumbung

hêñ habayto kanlan apostol ay hilan Maria Magdalena, hi Juana, hi Maria ya indo ni Santiago, haka hilay kaatag ya babayi ya kalamo la. ¹¹ Noa, êndat lan apostol, no alwan pêtêg ya panhabiêñ lan babayi, gawan nanad hilan namurit ya ampi-paghabi. Kabay a la hila pinaniwal-an. ¹² Embayro man, hi Pedro ay nuwayun nako bayro ha pinay-ilbêngan kan Apo Jesus. Hêñ nilumatêng ya bayro ay ayn yan nahêlêk, no alwan hatoy naputsi ya takop ya pinangêlkêl kan Apo Jesus. Bayo nuli ya hêñ ampag-êpapah ha nalyari.

*Nagpahlêk hi Apo Jesus kanlan loway tagahonol na ha dann
(Marcos 16:12-13)*

¹³ Habaytoy allo ay main lowa kanlan tagahonol ni Apo Jesus ya atsi ha dann hêñ palako ha mi-hay baryo ya nag langan Emaus, ya main labin-mihay kilometro ya dayo ha balayan Jerusalem. ¹⁴ Ampihabian lay balang nalyari. ¹⁵ Kaban ampi-habi hila ha pammita la, ay dinumani kanla hi Apo Jesus hêñ napaipantag kanlan loway ampammita. ¹⁶ Nahêlêk la ya, noa, a pinaulayan ni Apo Namalyari hêñ mabalayan la hi Apo Jesus. ¹⁷ Kinotang na hila, ya wana, “Hinoy ampihabian yo?”

Tinunggêñ hila. Angkahêlêk ha mata la ya malungkot hila. ¹⁸ Ya miha kanla, ya hi Cleopas, ay naghabi, ya wana, “Mimiha mo siguro kanlan kal-atan lan naniraw ha Jerusalem ya a nakagilam hêñ nalyari bayro hêñ ungnoy allon bêngat ya nalabah.”

¹⁹ Kabay kinotang ni Apo Jesus, “Hinoy nalyari?”

Wanla etaman, “Ya nalyari kan Apo Jesus ya taga-Nazaret. Hiya ay mihay propeta ni Apo Namalyari. Ya kapapaépapah ya dinyag ni Apo Jesus, haka ya hinabi na ay ampamaptêg ya ubat kan Apo Namalyari ya kapangyarihan na. Muwang lan tawo ya habayto. ²⁰ Hiyay impapatsi lan ampamaala kanlan pari haka lan kaatag ya main tungkulan, kabay hiya ay impako ha koros. ²¹ Èndat naên no hiyay mangakbus hên banson Israel. Noa, main nanan tatloy allo hên pinatsi la ya. ²² Nag-épapah kay ha ungnoy babayi, ya kalamo naên, ya atsi bayro nangun maranon ha pinay-ilbêngan la kana, ²³ hên inhumbung la kannaên ya ayn ana bayro ya bangkay na. Wanla êt ya nakahêlêk hila hên anghel ni Apo Namalyari ya nipaghabi kanla ya biniyay oman hi Apo Jesus. ²⁴ Ya kaatag kanlan kalamo naên ay nagtagloh etaman bayro ha pinay-ilbêngan kana. Nahêlêk la êt ya nanad ha hinabi lan babayi, noa, a la ya êt nahêlêk hi Apo Jesus.”

²⁵ Amêhêñ, hinabi ni Apo Jesus kanla, ya wana, “Kakakdêyan hên ulo yo! Pata a yo ampaniwalan ya habi lan mâmipamwang hên an-ipaihip kanla ni Apo Namalyari? ²⁶ Ta hila ya namipapêt hên tungkol ha Mesias, ya Cristo, ya impan-gakon Mámiligtas ya pinili ni Apo Namalyari hên mamaala ya taganán kailangan yan magdanas hên hadyay irap bayo ya mag-orong ha langit hên mamaala hên kalamo ni Apo Namalyari.” ²⁷ Impamulah ni Apo Jesus kanla ya kaganawan ya tungkol kana ya nakahulat ha Kahulatan ya impahulat ni Apo Namalyari, ubat ha inhulat ni

apo Moises, haka ha inhulat lan kaganawan ya kaatag ya mampipamwang hēn an-ipaihip kanla ni Apo Namalyari.

²⁸ Hēn andumani hilay na ha baryon Emaus, ya lakwēn la, ay nanad magpaitagloh ya hi Apo Jesus. ²⁹ Noa, hinagyat la yan magdahēl pon hēn kalamo la, ya wanla, “Pamibalayan mipatēl makē! Magdahēl ka pon di, ta êmēn makalamo naēn ka pon.” Kabay nakilako ya kanla. ³⁰ Hēn atsi hilay na ha arapan kaēn, ay nangwa ya hi Apo Jesus hēn puto ta pinahalamatan nay habayto kan Apo Namalyari. Hēn nayari nan pinahalamatan ay pinotoh nay habayto, bayo indin nay na kanla. ³¹ Hēn dinyag nay habayto, ay nabalayan la ya. Hiya awud hi Apo Jesus. Noa, bat yan naplak ha arapan la. ³² Nihabi hilay nay lowa, ya wanla, “Kabay awud nanad apoy ya atsi ha nakēm ta nangun ha dann, hēn an-ipamulah nay Kahulatan ya impahulat ni Apo Namalyari.”

³³ Tambēng hilay nan nag-orong ha balayan Jerusalem, kabay nalatngan la bayro hilay labin-mihay tagahonol ni Apo Jesus kalamo lan kaatag, ³⁴ ya ampaghabi kanlan lowa, ya wanla, “Nabiyay yan oman hi Apo Jesus. Nagpahlēk ya kan Simon Pedro!” ³⁵ Amēhēn, impamwang lan hata lowa ya nalyari ha dann, haka no ay-êmēn la yan nabalayan hi Apo Jesus hēn pinotoh nay puto.

Nagpahlēk hi Apo Jesus kanlan tagahonol na ha Jerusalem

(Mateo 28:16-20; Marcos 16:14-18; Juan 20:19-23; Dyag 1:6-8)

³⁶ Kaban ampaghabi hila pon ya lowa, ay biglan nagpahlék kanla hi Apo Jesus, ta hinabi na kanla, ya wana, “Patékbékén ni Apo Namalyari ya nakém yo.” ³⁷ Noa, nakatsigag hila haka hadyay limo la, ta êndat la no ampakahélék hilan kamana. ³⁸ Kabay hinabi na kanla, ya wana, “Pata hadyay limo yo? Pata ampag-alangan kaw? ³⁹ Hêlkén yoy gamêt ko haka bitsih ko. Hikoy hatsi. Gap-an yo, haka pakapoliahén yoy lawini ko. Alwa kon kamana, ta ya mihay kamana ay ayn but-o haka ayn laman.” ⁴⁰ Hên nahabi nay na ya habayto, ay impahlék nay gamêt haka bitsih na kanla. ⁴¹ Hadyay kahiglaan la hên nabalayan la ya, noa, ampag-épapahan la pon no taganán hiya, kabay wana kanla, “Main kaw hên maêkan di?” ⁴² Kabay dinyanan la ya hên mihay yunit kênan laném ya in-iyaw. ⁴³ Kinna nay habayto ha arapan la.

⁴⁴ Bayo hinabi na kanla, “Habaytsi ya labay kon habién kamoyu hên panay kataw napagkalamo, ya kailangan maubuh hên matupad ya nakahulat ya tungkol kangko ha libro hén Awit, haka ha inhulat ni apo Moises, haka ha inhulat lan kaatag ya mámipamwang hên an-ipaihip kanla ni Apo Namalyari.” ⁴⁵ Impamulah na kanla ya Kahulatan ya impahulat ni Apo Namalyari, ⁴⁶ ta wana kanla, “Habaytsi ya nakahulat, ‘Ya Mesias, ya Cristo, ya impangakon Mámiligtas ya pinili ni Apo Namalyari hén mamaala ay kailangan matsi. Bayo panga-ubat hên tatloy allo ay mabiyay yan oman.’” ⁴⁷ Nakahulat êt ya êmén di, ‘Ha kapangyarihan na ay kailangan iaral ya tungkol ha pamaghêhê haka ha pamatawad hên kasalanan ha balang

bansa paubat ha balayan Jerusalem.’ ⁴⁸ Hikaw ya mamaptêg kangko, ya mamipamwang ha balang nalyari hên nanad ha impamwang la hên hato. ⁴⁹ Impangako ni Apo Namalyari, ya Tatang ko, ya ipahapat na kamoyu ya Espiritu na, haka lano ipagtan ko ya kamoyu. Noa, mangênggan kaw pon di ha balayan angga ha lumatêng ya kamoyu hên main kapangyarihan.”

*Hi Apo Jesus ay gintan ha langit
(Marcos 16:19-20; Dyag 1:9-11)*

⁵⁰ Amêhén, pinakalamo ni Apo Jesus hilay tagahonol na hên palakon baryon Betania. Hên narani hila bayro, ay intag-ay nay gamêt na ta inhalangin na hila ya ingalwan hila ni Apo Namalyari. ⁵¹ Kaban an-ihalangin na hila, ay hiyay gintan ha langit. ⁵² Pinuri la ya, bayo nag-orong hila ha balayan Jerusalem hên hadyay higla. ⁵³ Paubat hên habayto, ay panay hilan atsi ha Templo hên ampurién hi Apo Namalyari.

Ya habi ni apo namalyari: Bayon tsipan - Ayta Mag-antsi New Testament in Ayta, Mag-antsi

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

d2289d90-e8af-5f04-a1e1-312fd0921aff